

LUCAS REMBICUACHIA JESUS RECOCUER RESENDAR SAN LUCAS

Lucas oicuachía Teófilo upe

1-2 Imboeteipri Teófilo, setá ava oicuachía yuvireco opacatu aracahendar mbahe imombehupri mboaviyesa cūritei yande pãhuve co Jesucristo recocuer resendar. Acoi ava yipisuive osepia vahe omombehu tupri vahe Jesucristo recocuer ava upe yuvireco, ahe omombehu tupri avei yuvireco cheu. ³ Sese che avei opa aseca tupri yipisuive opacatu co mbahe cua tupri ãgua, Teófilo. Ichui che amoingatu tupri pota icuachiapri sesendar ndeu nara avei sereco. ⁴ Evocoyase nde ereicua tupri ra co porombohesa supi eté vahe acoi nde mbohe agüer.

Tüpa rembiguai omombehu Juan Oporoãpiramo vahe ha ãgua

⁵ Yipindar Jesús ha renondeve, Herodes mborerecuar ivi Judea rupindar recose aracahe, ahesa aipo judío pahi secoi Zacarías serer vahe. Ahe pahi Abías rupindar secoi. Sembireco aipo pahi Aarón suindar, ahe serer Isabel. ⁶ Co ñuvirio secocuer aviye tupri Tüpa upe; viroya tupri opacatu Yar porocuaíta yuvireco. Evocoyase ndipoi eté que ava “mara” ehi vahe yuvireco chupe. ⁷ Zacarías rumo yipisuive ndatahi vahe. Esepia, sembireco ndimembii vahe ité, iyavei oyoya ité ocuacua-cuacua mi yuvireco.

⁸ Ñepeí ari aipo osupiti icuaita tũparo pipe imboetasa reseve iporaviqui ãgua Tũpa rovaque yuvireco. ⁹ Pahi recosa ité ěgüe ehi aracahe suive, ahese iporavosa Zacarías yipindar yasiapri tũparo maranehi pipe oique vaheã itaisi rapí ãgua. ¹⁰ Itaisi rapí viteseve aipo, opacatu ava oyerure yuvireco ocarve. ¹¹ Aheseve aipo oyemboyecua yande Yar rembiguai itaisi renda maranehi ique coti chupe. ¹² Tũpa rembiguai repiase aipo, oyembosiquiyé iteanga. ¹³ Tũpa rembiguai rumo aipo ehiño chupe:

—Zacarías —ehi—, eresiquiye eme. Tũpa osendu nde yeruresa. Sese nde rembireco Isabel imembira ndeu. Ahe nde rahir rer-ra Juan. ¹⁴ Ereviharetera sese, iyavei oyemboviharetera opacatu ava yuvireco nde rahir ohase. ¹⁵ Esepia niha, nde rahir secocuer tuvichara oico Tũpa rovaque. Ndoihiu chietera uva ricuer sai vahe, iyavei que ambuae mbahe sai vahe; secoira rumo Espiritu Santo rese ohaẽhi viteseve. ¹⁶ ěgüe ehira omonguerẽhi setá ava judío Yar Tũpa reroya iri ãgua oico. ¹⁷ Ahe virecora espíritu pĩratasa oyese oyoyara Tũpa ñehe mombehusar Elías rese ‘ava guahir rese tiñero yuvireco oyeupe’ oya, ‘toyembohe avei ava ndiporeroyai vahe yuvireco seco catupri vahe aracuasa mboyeroya ãgua rese’ oyapave. ěgüe ehira ava mbohe imoingatu yande Yar pisi ãgua sereco —ehi chupe.

¹⁸ Evocoyase,

—¿Mara ahera pĩha aipo reroya? Che rumo acuacuami eté vichico, iyavei che rembireco ocuacuami avei no —ehi Tũpa rembiguai upe.

19 —Aní —ehi chupe—. Che aico Tũpa rembiguai Gabriel, Tũpa rovaingar. Ahe niha che mbou ndeu che ñehe ãgua iyavei co ñehesa aviye vahe mombehu ãgua. 20 Nde rumo ndereroyai acoi amombehu vahe ndeu. Sese co pĩpe suive ité nandehengatui chira eico. Osupitise voi che remimombehugüer, acoi ohasa nde rahir, ahese ramo ndehengatura —ehi aipo Tũpa rembiguai chupe.

21 Osãro pucu tẽi aipo ocarve ambuae imboetasa eta yuvireco. “¿Mahera pĩha nose vitei tũparo pĩpe sui?” ehi tẽi yuvireco chupe. 22 Osese aipo tũparo pĩpe sui, niñehengatui voi eté. “Ñaro osepia mbahe tũparo pĩpe” ehiño ité aipo imboetasa eta yuvireco chupe. Ipo ãta-ãta tẽi aipo oñehengatuẽhise mbahe mombehu oico.

23 Ipare omboaviyese ocuaita tũparo pĩpe, oyevi oso güetave. 24 Coiye aipo sembireco Isabel ipuruha oico. Judío porocuita mboyeroyasave nose iri eté ambuae ava piri poyandepo yasi rupi. Ipihañemoñeta: 25 “Yar Tũpa ité êgüe ehi cheu ava che rese ñeheẽhi iri ãgua yuvireco” ehi vorivetesa pĩpe aracahe.

Tũpa rembiguai Jesús yesu ãgua omombehu

26 Coiye seis yasi pĩpe Tũpa omondo güembiguai Gabriel tecua Nazaret ve ivi Galilea rupi 27 cuñatai ndaseco marai vahe upe iñehe ãgua; ahe serer María. Ahe omenda pota vahe cuimbahe mborerecuar guasu David suingar José serer vahe rese. 28 Tũpa rembiguai oique co cuña rõtave aipo ehi chupe:

—¿María, Tūpa nde rovasa, erereco mbahe icatupri vahe pĩtiviisa Yar Tūpa suindar! Tūpa nde rese ité secói; nde rovasa catu opacatu cuña sui —ehi chupe.

²⁹ Tūpa rembiguai repiase, “¿Mara oya pĩha co aipo ehi cheu?” ehi tēi osiquiyepave opĩhañemoñeta rereco. ³⁰ Evocoyase Tūpa rembiguai aipo ehi chupe:

—María, eresiquiye eme. Esepia niha, Tūpa ité nde poravo nde rovasa ãgua. ³¹ Cũritei voira rumo ndemembira: ererecora nde membri; ahe serer-ra Jesús. ³² Ahe niha secouvicha catu vaherã secoira; “Tūpa seco ivate vahe Rahir secói” ehira yuvireco chupe. Iyavei niha Yar Tūpa ité omoinguera mborerecuar guasu seco ãgua inungar tamoi David aracahe. ³³ Mborerecuar guasu secoira judío recua rupi apirēhi vaherã; imborerecuasa niha apirēhi vaherã ité secoira —ehi.

³⁴ Evocoyase ahe aipo ehi:

—¿Mara ahera vo aipo che membri viña? Esepia niha, ndaico vitei vahe cuimbahe rese —ehi Tūpa rembiguai upe.

³⁵ —Espíritu Santo ogüeyira nde harive iva quiha nungar; Tūpa güeco pĩratasa pipe nde momembira. Sese acoi ohase nde membri seco maranehi vahe, “Tūpa Rahir” hesara chupe. ³⁶ Cũritei nde mu Isabel avei ocuacuami pipe imembí oico; ahe niha ndimembí vahe yipindar viña, cũritei rumo vireco seis yasi omembri vie pipe. ³⁷ Esepia niha, Tūpa upe ndipoi eté mbahe yavai vahe —ehi.

³⁸ Evocoyase María aipo ehi:

—Che Yar rembiguai aico, tayaviye ayase Tūpa remimbotar cheu nde ñehe rupi —ehi.

Aipo ihe pare, Tūpa rembiguai oyepepi oso ichui.

María oso omu Isabel piri

³⁹ Ahese María oso voi eté ivitri rupi tecua ivi Judea ve. ⁴⁰ Aheve aipo Zacarías rēta pipe oiquese oso, oyapo “avirave” omu Isabel upe. ⁴¹ Evocoyase Isabel rie pipe omi imembri ñehe renduse. Ahese Espiritu Santo oique Isabel aviterve. ⁴² Ipare osapucái pĩrata aipo ehi chupe vorivetesave:

—¡Tūpa nde rovasa cuña opacatu sui, iyavei oso-vasa nde membri! ⁴³ Noromohai eté che piri ereyu vaheṛã viña, che Yar si. ⁴⁴ Esepia, cheu “avirave” ereyapose, che membri omi voi vorivetesave che rie pipe. ⁴⁵ ¡Sovasapri ereico! Esepia, ereroya ité ñehesa ndeundar. Iyavei Tūpa omboaviyera güemimombehu nde rese —ehi Isabel chupe.

⁴⁶ Evocoyase aipo ihese,
 “Che niha amboetei che Yar vichico;
⁴⁷ cheroriveté Tūpa che Pĩsirosar rese.
⁴⁸ Esepia, ahe omahe che rese che reco yemomin-isa pipe seroyasar che recosave.
 Co pipe suive, ‘Sovasapri secoi’ ehira opacatu ava yuvireco cheu.

⁴⁹ Esepia niha, Tūpa mbahe mboavaisarēhi, oyapo mbahe tuvichá vahe cheu.
 ¡Tūpa imboeteipri catu tasecoi yepi!

⁵⁰ Ahe oiparisuereco opacatu omboeteisar yepi.

⁵¹ Nomboavai eté mbahe yapo.

Osecoreroyi ava oyemboivate ai tēi vahe.

52 Viroyi mborerecuar seco pĩrata vahe pĩratasa sui; ava seco mbegüemi vahe rumo osec-omboivate.

53 Ava yaracua pota vahe, omboaracua; ava ‘che aracua vai’ ehi vahe rumo, nomboaracuai eté.

54 Oipĩtĩvii niha opacatu viroyasareta judío yuvirecoi vahe.

Esepia, ndasesarai eté poroparaisuerecosa mondo ãgua 55 güemimombehugüer rupi yande ramoi aracadendar Abraham upe, ichuindar upe avei yepi no” ehi vorivetesá pipe omu

Isabel upe.

56 Ipare María opĩta Isabel pĩri mbosapĩ yasi rupi. Ichui oyevĩ oso güëtave.

Juan Oporoãpiramo vahe haragüer

57 Osupitise ari Isabel upe, imembira. Ahe imembri cuimbahemi. 58 Imu iyavei icotindar oyanduse Tũpa rembiapo mbahe aviye vahe, aipo ehi yuvireco chupe: “Aviye ai catu Yar Tũpa secoi co cuña rese” ehi vorivetesave yuvireco. 59 Ocho ari pipe aipo, ahe pĩtani ombocircuncida yuvireco judío porocuita mboyeroyasa pipe. Ipare aipo omondo pota iyesupa Zacarías rer yuvireco sese viña, 60 ichi rumo,

—Aní —ehiño—. Juan itera rumo serer —ehi.

61 —¿Maha vo? Ndipoi eté rumo nde mu rer aipo nungar —ehi yuvireco chupe.

62 Evocoyase aipo omahe pĩtani yesupa rese yuvireco ‘¿mbahe pĩha ahe omondo pota sererguã viña?’ oyapave yuvireco. 63 Evocoyase aipo iyesupa oporandu ivirapemi rese sese serer

oicuachía vaherã. Ahe serer oicuachía: ‘Juan sererguã’ ehi imoi. Ahese aipo opacatu ava: “¿Mara ehi rutei pĩha co?” ehi tẽi oyeupe yuvireco. ⁶⁴ Ahese ramo Zacarías ñehengatu, omboipĩ Tũpa upe osapucái oico. ⁶⁵ Opacatu aipo sêta cotindar oyembosiquiye tẽi yuvireco, iyavei aipo opacatu Judea recua rupi omombehu-mbehu mbahe osopia vahecuer yuvireco. ⁶⁶ Mbahe osendu vahecuer rese avei aipo oporandu-randu oyeupe yuvireco: “¿Mbahe pĩha aipo pĩtani oyapora curi?” ehi. Esepia niha, supi eté Tũpa osovasa.

Zacarías sapucái agüer

⁶⁷ Zacarías, Espiritu Santo pĩratasa pipe, oñehes Tũpa oyeupe ñehesa pipe aipo ehi:

⁶⁸ “¡Yande Yar Tũpa imboeteiprĩ tasecoi!

¡Esepia niha, ahe ou yande judío yaico vahe pĩsiro ãgua!

⁶⁹ Ombou niha Poropĩsirosar güembiguai David suindar yandeu.

⁷⁰ Ñgüe ehi imombehu opacatu oñehengagüer mombehusar seco maranehi vahe upe aracahe.

⁷¹ Ahe yande pĩsirora yande amotarẽhimbar sui.

⁷² Ñgüe ehi Tũpa imbou oporoparisuerecosa yande ramoi aracahendar upe, iyavei iyemomahenduha ãgua güemimbotar maranehi mombehu agüer rese.

⁷³ Evocoiyase, ‘Che supi eté ayapora evocoi mbahe’ ehi yande ramoi Abraham upe aracahe

- 74 yande renose ãgua yande amotarẽhimbar povri sui 'tache mboetei osiquiyeẽhisa pipe yuvireco' oya;
- 75 'toyuvirecoi che rembiepiave güeco ñvisa pipe iyavei güeco maranehisa pipe ari yacatu rupi' oyapave.
- 76 Nde, che rahir, 'Co Tũpa ivate vahe ñehe mombehusar secoi' ehira ava yuvireco ndeu. Esepia, nde eremoingatura ava recocuer Yar pisi ãgua senondeve eico.
- 77 Supi eté nde niha eremboyecuara opacatu ava Tũpa upendar yuvirecoi vahe upe angaipa sui ñeroisa pisi ãgua iñepisiro ãgua.
- 78 Esepia, yande Ru Tũpa, oporoparisuerecosa pipe ombou oporoesapesa iba pendar yandeu yande reco mbopiasu ãgua
- 79 iyavei ava Tũpa cuaparẽhi resape ãgua 'toyuvirecoi mbahe tupri pipe' oyapave. Esepia, ahe inungar ava pĩtumimbisave yuvirecoi vahe, ocañi tẽi vaherã yuvireco" ehi Zacarías.
- 80 Ichui pĩtani ocuacua iyavei vireco pĩratasa Espĩritu suindar oyese. Ipare rumo oso oyemboerecua ivi iporupirẽhi rupi. Coiye oyemboyecua omu Israel pendar upe oico.

2

Jesús yesu agüer

- ¹ Yipindar mborerecuar guasu Augusto oporocuai oico, "Tayecuachiasa opacatu tecua rupi" ehi. ² Ahe yipindar yecuachiasa mborerecuar Cirenio, Siria pendar rẽise.

³ Opacatu ava yuviraso güecua yacatu rupi oyecuachía ãgua yuvireco.

⁴ Sese José avei osẽ Nazaret, Galilea ivi rupi sui oso ivi Judea rupindar tecua Belén ve. Esepia niha, aracahendar mborerecuar guasu David aheve oha vahecuer, iyavei José ichuindar avei seci.

⁵ Ëgüe ehi oyoya yuviraso güembirecovi María rese oyecuachía ãgua. María rumo imembira pota ité oico. ⁶ Aheve oyepota ramosa, osupiti ari imembira ãgua. ⁷ Aheve oha imembri yipindar vahe cuimbahemi. Ahese María oyao omembri turucuar pipe, ãgüe ehi imoñeno imondo mbahe mimba rembihu riru pipe. Esepia niha, ndoyosui eté oque ãgua aheve yuvireco.

Tũpa rembiguai eta omombehu Jesús haragüer ovesa rãrosar upe yuvireco

⁸ Namombriimi Belén sui ovesa rãrosar yuvirecoi. Aheve osãro ovesa pĩtu pipe yuvireco.

⁹ Aviyeteramo tẽi oyemboyecua Tũpa rembiguai iva pendar chupe. Tũpa porañetesa avei sendi yivii chupe yuvireco. Ahe sepiase, oyembosiquiyé iteanga tẽi yuvireco ichui. ¹⁰ Ahe rumo aipo ehi chupe: “Pesiquire eme. Esepia, che ayu mbahe icatupri vahe mombehu ãgua pẽu pe mboviharete ãgua iyavei opacatu ava mboviharete ãgua avei no.

¹¹ Co pipe oha David recua Belén ve Poropĩsirosar pẽu nara. Ahe niha Tũpa Rembiporavo, pe Yarguã seci. ¹² Icuã ãgua peyosura pĩtani yaopri tuprimi vahe tui mbahe mimba rembihu riru pipe” ehi.

¹³ Aviyeteramo tẽi oyemboyecua ambuae setá Tũpa rembiguai iva pendar yivii yuvireco. Tũpa upe osapucái yuvireco aipo ehi:

14 “¡Imboeteipri tasecoi Tũpa ivave!
 ¡ivive ava Tũpa rembiaisu toyuvirecoi tupri
 oyeaisusa pipe!” ehi osapucái yuvireco.

15 Opase oyevi Tũpa rembiguai ivave yuviraso,
 ahese ovesa rãrosar aipo ehi oyeupe yuvireco:

—Yaso ru Belén ve; yasepiara aipo mbahe, acoi
 oicua uca vahe Yar oico yandeu —ehi yuvireco.

16 Evocoyase ipoyava yuviraso. Ipare
 osepia María, José, Jesús pĩtani avei yuvireco
 cute. Ahe pĩtani omoñenomi mbahe mimba
 rembihi riru pipe ino. 17 Ipare yuvinose

omombehu-mbehu ambuae ava upe Tũpa
 rembiguai remimombehugüer pĩtani resendar
 ñehesa yuvireco. 18 Evocoyase opacatu ava
 oyepihamondi co ñehesa renduse yuvireco.

19 María rumo opacatu co mbahe rese
 oyapisacaño; ahe ehiño ité ipihañemoñetasa.

20 Oyevise ovesa rãrosar yuviraso, omboetei iyavei
 osapucái Tũpa upe yuvireco. Esepia niha, opacatu
 mbahe osendu vahe, osepia vahecuer yuvireco
 imombehupri rupi tupri ité.

Jesús pĩtani seropovẽhesa Tũpa upe tũparo pipe

21 Ocho ari pipe ahe pĩtani ombocircuncida
 yuvireco; omondo sererguã Jesús yuvireco, ahe
 terer tupri avei acoi Tũpa rembiguai omombehu
 María upe imembiehi viteseve.

22 Ipare omboaviyese ohari güetave oñemoatiro
 ãgua, ahe aipo egüe ehi Moisés porocuita rupi
 yuvireco yepi, ahese vinose pĩtani seraso tecua
 guasu Jerusalén tũparo pipe seropovẽhe ãgua Yar
 upe yuvireco. 23 Egüe ehi yuvireco. Esepia,

Yar porocuaita aipo ehi icuachiapri pipe arac-
 ahe: “Opacatu yipindar pītani cuimbahe mini
 yuviroha vahe ipehasara Tūpa upe nara yepi” ehi.
²⁴ Yuviraso oporerecosa reropovēhe āgua yuvireco
 yande Yar porocuaita rupi: “Ñepei oyovaichor
 reseve picuhi, anise ñuvirío apicasu peropovēhera”
 ehi vahe.

²⁵ Ahe pipe mbia Jerusalén ve secoi Simeón serer
 vahe. Ahe mbia aviye etepri vahe. Oyerure
 vahe Tūpa upe, osāro vahe avei Israel recua pen-
 dar Pīsirosar imombehupri. Ahe secoi vahe ité
 Espiritu Santo rese. ²⁶ Ahe chupe Espiritu Santo
 opa uca oicua “eresepia rane itera Poropīsirosar
 Tūpa remimbou nde mano renondeve” ehi vahe.

²⁷ Ahe ari pipe Espiritu Santo viroguata tūparove.
 Oyepotase José, María reseve yuvireco tūparove
 Jesús pītani reropovēhe āgua Tūpa porocuaita rupi
 tupri, ²⁸ ahese Simeón oyemboya oso sese, osupi
 ichi sui, viroyeroqui Tūpa upe señoa aipo ehi:

²⁹ “Che Yar, cūrítei che, nde rembiguai, amano
 tupriño itera.

Esepia niha, nde remimombehugüer
 eremboaviye ité cheu.

³⁰ Asepia ité niha Poropīsirosar vichico cute.

³¹ Nde niha erembou opacatu ava rembiepiave.

³² Ahe niha poroesapesa ité secoi.

Esepia, omboyecuaru mbahe supi eté vahe ava
 ndahei vahe judío yuvirecoi vahe upe,
 iyavei omondara poromboeteisa nde recua Israel
 pendar judío yuvirecoi vahe upe”
 ehi oyeruqui.

³³ José iyavei María ndoyembovihai tēi yuvireco pītani rese Simeón yeroqui renduse. ³⁴ Evocoiyase Simeón osovasa ahe pītani iyepupa reseve. Ipare aipo ehi ichi María upe:

—Esendu, co pītani reroyaēhisa pipe setá yande mu judío ovīapira mbahe tēi pipe yuvireco; ambuae rumo seroya pipe sovasapri yuvirecoira. Ahe avei omboyecuarā mbahe ava upe. Amove rumo viroīroñora yuvireco. ³⁵ Ipīpe sui ava pīhañemoñetasa icuasara curi. Iyavei co opacatu mbahe tasira nde pīha pipe inungar quise pucu osasara nde pīha viña —ehi chupe.

³⁶ Aheve avei cuña cuacuami yaracua vahe secoi, ahe serer Ana, Fanuel rayri, Aser suindar. Ocuñatamiseve rumo omenda, iyavei secoi raimi tēi omer rese siete araviter rupive. ³⁷ Cūrītei secoi omer mano pare ochenta y cuatro araviter. Nosei eté tūparo pipe sui oico. Ēgüe ehi yande Yar mboetei pītu, arī rupi oyecuacusa pipe iyavei oyeruresa pipe avei oico no. ³⁸ Ahe evocoiyase ahesa reseve avei ou pītani upe, “Avīye ndeu” ehi Tūpa upe. Ipare oñehe secocuer rese opacatu ava Jerusalén pendar osāro vahe güecua pīsiro āgua upe oico.

Jesús pītani reroyevi agüer Nazaret ve

³⁹ Evocoiyase opacatu Moisés porocuita mboavīyere, opa oyevi Galilea pendar güecua Nazaret ve yuvireco. ⁴⁰ Ahese pītani ocuacua catumi imbahecua-ecua irimi eté oico iyavei ipīrata catu irimi. Esepia, Tūpa osovasa ité sereco no.

Jesús chīhivahe tūparo pipe secoi

⁴¹ Iyesupa yuviraso araviter yacatu Jerusalén ve Pascua pieta repia yepi. ⁴² Jesús doce araviter virecose, ahese viraso iyesupa Jerusalén ve oyeupi pieta repia yuvireco. Esepia, êgüe ehi eté judío recocuer pietase yuvireco yepi. ⁴³ Ahe pieta pare voi, oyevise yuvireco güecosave, ahese Jesús opitaño Jerusalén ve; ichi rumo iyavei tu José ndoicuai eté ipitase yuvireco. ⁴⁴ “Oũaño revo ava pãhu rupi” ehi yuvireco chupe viña; aipo ehiño ité ñepei ari pipe yuvireco chupe. Oseca tẽise rumo omu pãhu rupi, iyavei omboripar pãhu rupi avei no, ⁴⁵ ndoyosui eté yuvireco. Ahese oyevi iri tẽi Jerusalén ve seca yuvireco.

⁴⁶ Imombosapisa ari pipe oyosu ramo tũparo pipe yuvireco. Aheve uguapi ava Tũpa porocuaíta rese oporombohe vahe pãhuve oĩ; oyapisaca iñehe rese iyavei oporandu-randu ahe ava upe Tũpa Ñehengagüer rese oĩ. ⁴⁷ Evocoyase opacatu ava ndoyembovihai tẽi imbahecua vaisa rese yuvireco. Esepia, oporanduse mbahe rese yuvireco chupe, omboyevi tupri voi-voiño ité ñehesa. ⁴⁸ Oyosuse iyesupa, oyepihamondii yuvireco. Ahese ichi aipo ehi chupe:

—Che membri, ¿mahera vo êgüe ere eico oreu? Nde recasa tẽi opacatu rupi, ore mopihañemoñeta ati uca eve —ehi.

⁴⁹ Evocoyase,

—¿Mahera vo che reca co coti rupi tẽi peye peico? ¿Ndapeicuai vo che Ru rẽta pipe aico vaherã? —ehi osi upe.

⁵⁰ Iyesupa rumo ndosenducuai eté aipo oyeupe hesa yuvireco.

⁵¹ Evocoyase oyevî Nazaret ve oso supî. Aheve omboyeroña ité oyesupa. Ichi niha opacatu co mbahe rese oyapisacaño ité. ⁵² Ahese Jesús ocuacua-cuacua iri, iyetei catu avei imbahecua catu iri avei oico no. Secoi tupri ai eté Tũpa upe iyavei ava eta upe avei no.

3

Juan Oporoãpiramo vahe secoi ivi iporupirẽhisa rupi

¹ Quince araviter pipe mborerecuar guasu Tiberio recose, Poncio Pilato evocoyase mborerecuar secoi Judea rupi, Herodes avei mborerecuar secoi Galilea ve, tivri Felipe evocoyase mborerecuar secoi Iturea ve iyavei Traconite ve, Lisancias avei mborerecuar secoi Abilinia ve. ² Anás iyavei Caifás ahe pahi rerecuar ivate catu vahe yuvirecoi. Ahese Tũpa, “Emombehu che ñehe ava upe cute” ehi Zacarías rahir Juan upe oico ivi iporupirẽhisave. ³ Juan evocoyase oso opacatu ïai Jordán ivi oico, supî aipo ehi ava upe: “Pemboasi pe angaipa, peyevî Tũpa upe, ahese opoãpiramora Tũpa pẽu ñero ãgua pe angaipa rese” ehi. ⁴ Co yaviye ité Tũpa ñehe mombehusar Isaías rembicuachiaguer pipendar aipo ehi vahe:

“Sendusa ivi iporupirẽhisave ava sapucaisa aipo ehi vahe:

‘Pemoingatu yande Yar raperã, pemohivi tupri avei’ ehi.

⁵ ‘Evocoyase opacatu ivisocuer opara imboapiposa chupe, opacatu ivitri ivate

vahe iyavei ivitri mini opara imboyoyasa tupri no.

Acoi peri ipãri vahe, ahe imohivisapara; peri ipicucu ati vahe opara imboapiposa tupri chupe.

⁶ Iyavei opacatu ava osendura ñehesa pĩsirosa re-sendar Tũpa remimbou yuvireco cute' ehi vahe" ehi.

⁷ Ava rehii yuvinosepa chupe 'tayande ãpiramo' oyapave yuvireco viña. Ahe rumo aipo ehi: "¡Pe mboi mboetasa tẽi peico! ¿Ava vo, 'Pesẽra Tũpa ñemoirosa ou vaherã sui' ehi tupri tẽi pẽu?

⁸ Yipindar toyecua tupri rane yande Yar upe peyevisa pe angaipa mboasisa pipe. Iyavei ndapeyeroyai chira 'ore Abraham suindar oroico' pe hesa rese tẽi peñepisiro ãgua. Esepia, Tũpa oicatuño ité co ita sui Abraham suindar nungar tupri apo ãgua oyeupe nara yepi. ⁹ Hacha niha imoingatusa voi eté opacatu ivira iha naporai vahe sapo rupi yasia ãgua yepi. Yasiapri evo-coiyase imondosapara tatave" ehi.

¹⁰ —¿Mbahe pĩha evocoyase oroyapora ore recocuer recuñaro ãgua oroico? —ehi ava rehii oporandu yuvireco chupe.

¹¹ —Pe pereco vahe ñuvirio pe camisa, ñepeí pemondo ava ndovirecoi vahe upe; iyavei pe pereco vahe tembihu, pemboyahomi tẽi ambuae ava ndovirecoi vahe upe —ehi imboyevi ava upe.

¹² Yugüeru avei moviro ava sui guarepochi rerocuasar 'tayande ãpiramo' oyapave yuvireco. Ipare oporandu Juan upe mbahe rese yuvireco:

—Porombohesar, ¿mbahe vo ore oroyapora Tũpa rupi ore guata ãgua oroico? —ehi yuvireco chupe.

¹³ Evocoiyase aipo ehi ahe ava yuvirecoi vahe upe:

—Aní perocua catu iri guarepochi p̄eu imombehusa sui —ehi.

¹⁴ Iyavei amove sundao oporandu mbahe rese yuvireco chupe:

—Ore no, ¿mbahe vo ore oroyapora? —ehi.

—Ndaperocuai chietera que mbahe ambuae ava sui, ndapeñehe-ñehe t̄ei chira ava upe sembiapoēhi rese, iyavei peyembovihanora pe poraviqui reperi rese —ehi sundao upe.

¹⁵ Ava rumo, “¿Ndahei p̄iha co Porop̄isirosar s̄arombri secoi?” ehi t̄ei Juan upe yuvireco. ¹⁶ Juan rumo aipo ehi opacatu ava upe: “Che opoãpiramo i pipe t̄ei; oura rumo ambuae che raquicuei, ahe pe ãpiramora Esp̄iritu Santo tata nungar pipe. Ahe seco p̄irata catu vahe secoi che sui. Sese cheu ndiyai eté ahe ip̄itaquisã yora ãgua ichui” ehi.

¹⁷ “Ahe güeru trigo mbovevesa ihigüer sui ipeha ãgua. Sãhi evocoiyase yapocatusa, ihigüer rumo imondosa tata ap̄irēhi vahesave” ehi ava upe.

¹⁸ Omombehu-mbehu vite ñehesa aviye vahe ava upe ‘toyemonguerēhi güecocuer recuñaro ãgua yuvireco’ oya. ¹⁹ Ipare rumo Juan oñehe p̄irata mborerecuar Herodes upe secocuerei rese. Esp̄ia, vivri Felipe rembireco Herodías rese secoi, iyavei setá ambuae mbahe naporai vahe sembiapo. ²⁰ Sese Herodes oyapoño ambuae mbahe t̄ei: seroyaēhisa pipe osoquenda ucaño Juan sereco.

Jesús ãpiramosa

²¹ Yip̄indar rumo voquenda viteēhiseve Juan oñapiramo setá ava oico, aheseve avei oñapiramo

Jesús. Jesús yerure vïteseve, aviyeteramo tēi oyemboi tupri ïva. ²² Ipare Espïritu Santo ogüeyi ou iharive apïcasu nungar, iyavei oyeendu ñehesa ïva sui aipo ehi vahe:

—Nde che Rahir ereico, che rembiaïsu; sese aviha ité nde rese —ehi.

Ava eta oyesu vahe Jesucristo yesu renondeva

²³ Jesús vïrecose treinta araviter, ahese ramo omboipi oporombohe. Ahe icuapri vahe ité José rahir secose viña. José Elí rahir secoi, ²⁴ Elí evocoyase Matat rahir, ahe Matat evocoyase Leví rahir, Leví evocoyase Melqui rahir, ahe Melqui evocoyase Jana rahir, Jana evocoyase José rahir, ²⁵ ahe José Matatías rahir, Matatías evocoyase Amós rahir, ahe Amós evocoyase Nahúm rahir, Nahúm evocoyase Esli rahir, ahe Esli Nagai rahir, ²⁶ Nagai evocoyase Maat rahir, ahe Maat Matatías rahir, Matatías evocoyase Semei rahir, ahe Semei evocoyase Josec rahir, Josec evocoyase Judá rahir, ²⁷ ahe Judá Joanán rahir, Joanán evocoyase Resa rahir, ahe Resa evocoyase Zorobabel rahir, Zorobabel evocoyase Salatiel rahir, ahe Salatiel Neri rahir, ²⁸ Neri evocoyase Melqui rahir, ahe Melqui Adi rahir, Adi evocoyase Cosam rahir, Cosam evocoyase Elmadam rahir, Elmadam evocoyase Er rahir, ²⁹ ahe Er Jesús rahir, Jesús evocoyase Eliezer rahir, ahe Eliezer Jorim rahir, Jorim evocoyase Matat rahir, ³⁰ ahe Matat Leví rahir, Leví evocoyase Simeón rahir, ahe Simeón evocoyase Judá rahir, Judá evocoyase José rahir, ahe José Jonam rahir, Jonam evocoyase Eliaquim rahir, ³¹ Eliaquim Melea rahir, ahe Melea Mena

rahir, Mena evocoyase Matata rahir, ahe Matata evocoyase Natán rahir, ³² Natán David rahir, ahe David evocoyase Isaí rahir, Isaí Obed rahir, ahe Obed evocoyase Booz rahir, Booz Sala rahir, ahe Sala evocoyase Naasón rahir, ³³ Naasón Aminadab rahir, ahe Aminadab evocoyase Admin rahir, Admin evocoyase Arni rahir, Arni evocoyase Esrom rahir, ahe Esrom evocoyase Fares rahir, Fares evocoyase Judá rahir, ³⁴ ahe Judá Jacob rahir, Jacob evocoyase Isaac rahir, ahe Isaac Abraham rahir, Abraham evocoyase Taré rahir, Taré evocoyase Nacor rahir, ³⁵ ahe Nacor Serug rahir, Serug evocoyase Ragau rahir, ahe Ragau evocoyase Peleg rahir, Peleg Heber rahir, ahe Heber evocoyase Sala rahir, ³⁶ Sala Cainán rahir, ahe Cainán evocoyase Arfaxad rahir, Arfaxad evocoyase Sem rahir, ahe Sem evocoyase Noé rahir, Noé evocoyase Lamec rahir, ³⁷ ahe Lamec Matusalén rahir, Matusalén evocoyase Enoc rahir, Enoc evocoyase Jared rahir, ahe Jared Mahalaleel rahir, Mahalaleel evocoyase Cainán rahir, ³⁸ ahe Cainán evocoyase Enós rahir, Enós evocoyase Set rahir, ahe Set Adán rahir, Adán evocoyase Tūpa rahir.

4

Jesús recoãhasa

¹ Jesús Espíritu Santo rese ité secoi. Ahe osē ïai Jordán sui oso. Ipare Espíritu viroguata ïvi iporupirēhisa rupi. ² Aheve cuarenta ari secoise Carugar osecoãha. Ndocarui avei oico. Sese

ndasiëpoi eté. ³ Caruguar evocoiyase aipo ehi chupe:

—Tûpa Rahîr ité nde recose, co ita sui eyapo pan cûritei —ehi.

⁴ Evocoiyase Jesús omboyevî chupe:

—Che Ru ñehe rumo icuachiapri pîpe aipo ehi: ‘Ndahei chira pan suiño ava yuvîrecovera’ ehi — ehi Caruguar upe.

⁵ Ipare Caruguar vîraso ivate vahesave. Aheve ñepei reseve opacatu ava-ava têi mborerecuasa ivî pîpendar omboyecua chupe. ⁶ Ipare aipo ehi chupe:

—Che amondora opacatu ivî rupindar mborerecuar pîratasa iyavei mbahe porañete vahe nde povrîve. Esepia niha, co opacatu cheu imboupri; iya ité amondo vahe rã ava upe che remimbotar rupi. ⁷ Acoi ereñenopîhase cheu che mboetei ãgua, ahese opacatu co mbahe ereipîsira nde mahera — ehi têi Caruguar chupe.

⁸ —Icuachiapri pîpe rumo: ‘Emboetei nde Yar Tûpa, ahe güeraño tupri avei eremboyeroyara’ ehi — ehi Caruguar upe.

⁹ Ipare Caruguar vîraso oyeupi tecua guasu Jerusalén ve. Aheve oviroyeupi tûparo apîterve. Aheve Caruguar aipo ehi chupe:

—Tûpa Rahîr ité nde recose, evîapi cohava sui.

¹⁰ Esepia niha, icuachiapri pîpe:

‘Tûpa oyocuaира güembiguai eta nde rãro ãgua.

¹¹ Ahe nde mopuhara yuvîreco que ñepei ita nde momara rãgüer sui’ ehi — ehi Caruguar chupe.

¹² Evocoiyase omboyevî Caruguar upe:

—¡Aní! Icuachiapri pïpe niha aipo ehi avei: ‘Ndereseoãhai chira nde Yar Tûpa’ ehi —ehi chupe.

¹³ Ahese Caruguar ndoicatu iri eté Jesús recoãha ãgua oico. Ipare oyepepiño raimi tēi oso ichui.

Jesús omboïpi oporombohe Galilea rupi

¹⁴ Jesús, Espíritu Santo reco pĩratasa pïpe, oyevi oso Galilea ve. Ipare serãcua oguata opacatu tecua-tecuami rupi. ¹⁵ Esepia, ahe oporombohe judío tûparo pïpe oico. Ahese opacatu ava omboetei yuvireco.

Jesús oyevi Nazaret ve

¹⁶ Ichui Jesús oyevi Nazaret ve ocuacua agüerve. Aheve judío mbïtuhusa ari pïpe oiique tûparove inungar oyapo yepi. Ahese opũha ‘tayeroqui icuachiapri maranehi pïpe’ oya. ¹⁷ Evocoiyase tûparo rese ñangarecuar pĩtivïisar omondo Tûpa ñehe mombehusar Isaías rembicuachía chupe. Oy-orase ahe cuachiar, oyerorqui icuachiapri aipo ehi vahe pïpe ohã:

¹⁸ —“Yar Espíritu secoi che rese.

Esepia niha, ahe ombou che cuaitarã cheu co ñehesa aviye vahe mombehu ãgua ava iparaisu vahe upe.

Che cuaita avei ava mbahe-mbahe tēivriye yuvirecoi vahe senose ãgua ichui, iyavei ava ndasesapïsoi vahe ambosarecora; iyavei che cuaita ava mbahe-mbahe tēi rasicuer oiporara vahe sui senose ãgua,

¹⁹ iyavei ‘cũritei Yar oyemoingatu oporovasasa mondo ãgua pēu’ he ãgua” ehi icuachiapri pïpe

—ehi oyeroku.

²⁰ Sese oyeroku pare, oyapoapipa cuachiar imondo tũparo rese ñangarecuar pĩtĩviisar upe. Ipare oguapĩ oĩ ava rembiepiave. Ahese opacatu tũparo pĩpendar omahe ati yuvireco sese.

²¹ Evocoyase ahe oñehe aipo ehi:

—Cũritei yavĩye co icuachiapri pĩpendar opacatu pe rovaque —ehi.

²² Opacatu ava oñehe tupriño ité yuvireco sese. Ndoyembovihai tẽi iñehe tupri renduse yuvireco. Oporandu-randu rumo yuvireco oyeupe:

—¿Ndahei vo acoi co José rahir tẽi? —ehi yuvireco chupe.

²³ Ahe rumo aipo ehi ava upe:

—Pe aipo peyera cheu: ‘Oporombogüera vahe, eñeposano nde ae eico’ peyera. Ipare aipo peyera cheu: ‘Acoi orosendu vahe nde rembiapogüer Capernaum pĩpe, ãgüe ere avei eyapo cohava nde recua pĩpe ité’ peyera cheu —ehi.

²⁴ —Supi eté, ndipoi eté niha que ñepei yepe Tũpa ñehe mombehusar oipisi tupri vahe güecua pĩpe yuvireco yepi. ²⁵ Supi tupri ité Tũpa ñehe mombehusar Elías recose, iñehe rupi tupri ndoquii eté mbosapĩ araviter yemombitesa rupi oico. Sese oime tiavor opacatu Israel ivĩ rupi aracahe. Ahese setá etepri cuña imer mano vahecuer oime Israel recua rupi viña, ²⁶ Tũpa rumo nomondoi Elías cuña imer mano vahecuer Israel pendar upe ipĩtĩvii ãgua. ãgüe ehi rumo omondo cuña ndahei vahe Israel pendar ipĩtĩvii ãgua. Ahe cuña tecua Sarepta pendar, ahe Sarepta Sidón ipiimindar. ²⁷ Iyavei setá ava oime Israel recua pĩpendar imbaheasi

vahe lepra rerecosar yuvireco evocoi Tūpa ñehe mombehusar Eliseo recose. Evocoi ava yuvirecoi vahe rumo ndipoi eté que ñepei ocuera vahe yuvireco; Naamán año rumo Eliseo opa uca ombogüera, ahe mbia Siria pendar ndahei vahe Israel pendar secoi —ehi ava upe.

²⁸ Ahe se opacatu ava judío tūparo pipendar oñemoiró iteanga yuvireco sese aipo mbahe renduse. ²⁹ Sese opa voi eté opūha Jesús reraso ãgua tecua pipe sui ivitri ivi socuerve yuvireco, ahe iharive tecua yaposa. Ahe ichui oiti pota yuvireco viña. ³⁰ Jesús rumo ipāhu sui osē tupriño oso.

Jesús ombogüera mbia carugar vireco vahe oyese

³¹ Ichui Jesús oso Capernaum ve, ahe tecua Galilea rupindar. Aheve ombohe ava oico mbituhusa ari pipe. ³² Ipare opacatu ava, “¡Mara ehi rutei!” ehi tēi iporombohesa renduse yuvireco. Esepia niha, ahe oñehe güeco pīratasa pipe.

³³ Aheve judío tūparo pipe oime mbia vireco vahe carugar oyese, ahe oñehe pīrata Jesús upe:

³⁴—¡Ore mañeco tēi eme eve! ¡Mahera ereyuño tēi cohave oreu, nde, Jesús Nazaret pendar! ¿Ereyu vo ore mocañi ãgua tēi? Che orocua ité. Nde niha seco maranehi vahe ereico Tūpa suindar —ehi chupe.

³⁵ Evocoyase,

—¡Quiriri, esē co mbia sui! —ehi oñehe pīrata carugar upe.

Ahe se carugar omboviapi ahe mbia ava rovai, osē ocua ichui; nomomarai eté rumo. ³⁶ Opacatu

ava oyembosiquiye, iyavei oporandu-randu tēi mbahe rese oyeupe yuvireco:

—¿Mara ehi vo aipo oñehe oico? ¡Esepia, co mbia opĩratasa pĩpe oyocuai caruguar ava sui imose ãgua! —ehi yuvireco.

³⁷ Sese Jesús rerãcua oyandu opacatu tecua-tecuami ivirindar yuvireco.

Jesús ombogüera Simón Pedro rembireco si

³⁸ Evocoyase Jesús osẽ judío tũparo pĩpe sui oso, oi que Simón Pedro rētave. Simón rembireco si sohĩ iteanga ou. Evocoyase oñehe ahe pendar sese Jesús upe ‘tombogüerami tēi’ oyapave yuvireco.

³⁹ Evocoyase Jesús oyeaivi oso chupe sohi sui imbogüera ãgua. Ocuera pare voi ahe cuña oñarapuha; ohañeco ahe ava yuvirecoi vahe rese.

Jesús ombogüera setá ava imbaheasi vahe

⁴⁰ Ari so ramomise opacatu ava imbaherasisa ambuae tēi vahe güeru Jesús upe yuvireco. Ahe evocoyase opo omondo iyacatu iharive ñepeipei imbogüera. ⁴¹ Iyavei setá ava sui opa omose caruguar. Evocoyase caruguar osapucái tēi aipo ehi yuvireco:

—¡Nde acoi Tũpa Rahĩr ité ereico! —ehi.

Ahe rumo oñehe pĩrata caruguar upe, nomoñehe iri. Esepia niha, caruguar oicua ité ahe Tũpa Rembiporavo seco rese yuvireco.

Jesús oporombohe judío tũparo rupi oico

⁴² Ahere ayihive cõhe ramomise, Jesús osẽ tecua pĩpe sui, oso ivi iporupirẽhisave. Ava rumo oseca-secaño ité yuvireco; osupitiño ité secosave

yuvireco. Oipota ahe oyesui ichoëhi ãgua ité yuvireco vinã. ⁴³ Ahe rumo aipo ehi ava eta upe:

—Tamombehu rane catu ambuae tecuave avei ñehesa aviye vahe Tũpa mborerecuasa resendar ava upe. Esepia, aherã niha che mbousa —ehi.

⁴⁴ Ëgüe ehi Jesús oguata oporombohe Judea tũparo rupi oico.

5

Pira mboha ati agüer

¹ Ñepeí ari Jesús secoi ipa Genesaret popi rupi. Aheve ava rehí oyepota yuvireco chupe, oyere ati yuvireco sese. Esepia niha, ahe osendu pota ité Tũpa Ñehengagüer yuvireco. ² Aheve oime ñuvirío carite imbehi popive. Ahe ava pira mbohasar opa yuvínose evocoi carite pipe sui yuvireco. Ipare opira mbohasa oyosei yuvínoi. ³ Evocoiyase Jesús osepiase, oha Simón carite pipe iyavei aipo ehi chupe: “Tosiri catumi tēi chīhi coi coti iai popi sui” ehi. Ipare oguapi oĩ carite pipe. Aheve ombohe ava cute. ⁴ Oñehe pare aipo ehi Simón upe:

—Yaso ipa tipí catu vahesave. Aheve erembohara pira —ehi.

⁵ Simón rumo omboyeví chupe:

—Porombohesar, orosãha tēi niha pĩtu momba pira mboha oroico. Nde porocuita pipe rumo amondo irira pira mbohasa ive —ehi.

⁶ Ëgüe ehise, pira rehí omondoromi ombohasa yuvireco. ⁷ Ahese oyaiti yuvireco omboetasa evocoi ambuae carite pipe yuvirecoi vahe upe ‘toyugüerumi yande pĩtívii’ oyapave yuvireco chupe. Ahe yugüeru chupe. Ipare opa ñuvirío

carite omboapipo tupri yuvireco; seni iri rumo omondo ipive. ⁸ Co mbahe repiase, Simón Pedro oñenopiha oso sovai aipo ehi chupe:

—¡Eyepipimi tēi che sui, che Yar! ¡Esepia, che yangaipa vahe tēi aico! —ehi.

⁹ Esepia, Simón iyavei opacatu ava yuvirecoi vahe supi osiquiyé iteanga co pira rehii repiase yuvireco. ¹⁰ Iyavei Simón mboetasa ambuae carite pipendar ahe Santiago, Juan Zebedeo rahir yuvirecoi. Jesús rumo aipo ehiño Simón upe:

—Eresiquiye eme; co pipe suive inungar pira eremboha, egüe ere aveira ava reca cheu nara —ehi.

¹¹ Evocoiyase opa vinose carite ivi ãtasave yuvireco, oseyapaño opacatu mbahe. Ipare yuviraso supi.

Jesús ombogüera ava lepra rerecosar

¹² Ñepi ari Jesús secoise tecua pipe, aheve oime mbia lepra vireco vahe opacatu güetecuer rese. Jesús repiase, oñenopiha oyeaivi oso chupe. Ipare oporandu aipo ehi:

—Che Yar, ereipotase, iya nde che mbogüerami eve —ehi chupe.

¹³ Evocoiyase, opocose sese,

—Aipota. ¡Erecuerara cūrítei! —ehi chupe.

Aipo ihe ramoseve voi eté ocuera. ¹⁴ Ipare oyocuai aipo ehi chupe:

—Eremombehu eme nde cuerasa ambuae ava upe; esoño, eyemboyecua judío pahi upe. Ipare eicuavēhe nde porerecosa nde cuerasa resendar Moisés porocuita rupi. Ipipe sui toicua opacatu ava nde cuerasa yuvireco —ehi chupe.

¹⁵ Jesús rerãcua rumo oyembouvicha catu-catu iri eté. Evocoyase setá ava oyemboya yuvireco sese ñehe rendu ãgua ‘tayande mbogüerami tẽi yande mbaherasisa sui’ oyapave yuvireco. ¹⁶ Ava rehii sui rumo amove Jesús oyepepiño ahe aemi oyerure ãgua yepi.

Jesús ombogüera ava ndoguatai vahe

¹⁷ Ñepeí ari Jesús oporombohe oico. Yar Tũpa pĩratasa vireco oyese ava mbogüera ãgua. Aheve avei uguapĩ yuvinoi fariseo, Moisés porocuita rese oporombohe vahe avei ipĩri yuvireco. Ahe yugüeru opacatu Galilea tecua-tecuami rupi sui yuvireco. Ivi Judea rupi sui, tecua Jerusalén sui avei yugüeru no. ¹⁸ Ahese ava ndoguatai vahe güeru supa pipe yuvireco. Viroique pota oi pipe sovai eté seroyi ãgua yuvireco viña; ¹⁹ ndoicatui eté rumo seroique yuvireco ava rehii pãhu rupi. Evocoyase viroyeupi yeupisa rupi ahe oi ipe vahe harive yuvireco. Aheve virocua teca ichui. Supi viroyi imbaheasi vahe supa pipe imondo yuvireco opacatu ava rembiepiave sovai. ²⁰ Ahe oicuase co mbia yuvirecoi vahe oyese yeroyasa, ahese aipo ehi imbaheasi vahe upe:

—Che mboripar, che ñero nde angaipa rese ndeu —ehi.

²¹ Ichui oporombohe vahe Moisés porocuita rese iyavei fariseo ipihañemoñeta atĩ voi tẽi yuvireco: “Co mbia oyemboivate ai tẽi vahe Tũpa ñehe nungar pipe tẽi; Tũpaño ité niha oicatu ava angaipa upe oñero ãgua” ehi tẽi oyeupe yuvireco.

²² Ahe rumo oicuaño ité ahe ava pihañemoñetasa. Evocoyase aipo ehi chupe:

—¡Mahera vo pepihañemoñeta rai tēi che rese!
 23 ¿Uma rupi vo ñehesa ndayavaimi catu: ‘Nde angaipa rese che ñero ndeu’ hesa pīha, anise: ‘Epūha, eguata’ hesa tie? 24 Tapeicua ru che, Ava Riquehir, areco ité mborerecuasa co ivi pipe ava angaipa upe che ñero ãgua —ehi.

Evocoyase,

—Eñarapuha, esupi nde rupa, eso nde rētave —ehi imbaheasi vahe upe.

25 Ahese opūha voi ava rovaque, osupi vupagüer. Ipare osapucaí oso güētave Tūpa upe. 26 Ahese opacatu tupri ité ava, “¡Too! ¿Mara ehi rutei pīha co?” ehi tēi imboetisave yuvireco. Iyavei osiquiyepave aipo ehi yuvireco:

—Co pipe yasepia mbahe ndayasepiai vahe ité —ehi.

Jesús oñehe Leví upe

27 Ichui osēse Jesús, osepia mbia Roma ve nara guarepochi rero cuasar Leví serer vahe, ahe guarepochi rero cuasave chini. Sepiase,

—Erio che rupi —ehi chupe.

28 Evocoyase Leví opūha. Oseyapa oporaviquisa, oso supí.

29 Ipare Leví oyapo pieta guasu chupe nara güētave. Aheve iyemborisave setá imboetasa ava guarepochi rero cuasar iyavei ambuae ava ocaru yuvinoi ipiri. 30 Pieta repiasar fariseo yuvirecoi vahe rumo iyavei ipāhu pendar Moisés porocuita rese oporombohe vahe avei, ahe omboipi semimbohe upe oñehe mara aipo ehi yuvireco chupe:

—¡Mahera ru pecaru iyavei pecahu guarepochi rero cuasar rese iyavei ambuae ava yangaipa guasu vahe rese tēi avei no! —ehi.

³¹ Jesús rumo aipo ehi chupe:

—Ava nimarai vahe ndosecai eté oporoposano vahe; imbaheasi vaheño rumo oseca yuvireco.

³² Esepia, che ndayui ava seco catupri vahe reca; che rumo ayu ava yangaipa vahe reca Tūpa uve iyevi āgua yuvireco —ehi.

Yecuacusa rese ñehesa

³³ Ipare ava oporandu yuvireco chupe:

—¿Mahera vo oyecuacu serai iyavei oyerure Juan Oporoāpiramo vahe rupindar yuvireco, fariseo rupindar avei no; nde remimbohe rumo yuvirocaruño ité, yuviroihuño avei no? —ehi.

³⁴ Ahe rumo omboyevi chupe aipo ehi:

—Ndiyai eté ichohopri mboyecuacu mendasave imer oicove viteseve ipāhuve. ³⁵ Oimera rumo ari imer reraso āgua ichui, ahese ramo oyecuacura yuvireco cute —ehi.

³⁶ Iyavei ambuae mbahe rese oporombohe imboyevi āgua:

—Ndiyai eté ava upe virocuva vaheñā turucuar ipiasu vahe sui ambuae turucuar cuacuami vahe apete āgua. Esepia niha, ēgüe ehise evocoyase turucuar ipiasu vahe omomara; iyavei turucuar ipiasu vahe apirer naporai chira turucuar cuacua vahe rese —ehi—. ³⁷ Iyavei no, ndiyai eté ñoñasa uva ricuer piasu mbahe pিরer cuacua pipe no. Esepia niha, ēgüe ehise, uva ricuer piasu evocoyase opara ombopu mbahe pিরer cuacua viña, ēgüe ehira oyepiyerepa, mbahe pিরer avei evocoyase

ocañi tēira viña. ³⁸ Uva ricuer piasu rumo yamondora mbahe pিরer piasu pipe. ³⁹ Iyavei ndipoi eté que ava oihu vahe uva ricuer ipiasu vahe yuvireco uva ricuer cuacua vahe yusei ai pare. Esepia niha, ava aipo, ‘Co uva ricuer cuacua vahe aviye catu vahe yepi’ ehi yuvireco —ehi ava upe.

6

Jesús remimbohe oipoho trigo mb̄ituhusa ari pipe yuvireco

¹ Ñepi mb̄ituhusa ari pipe Jesús viroguata güemimbohe mbahe miti p̄āhu rupi. Semimbohe evocoyase oipoho-poho yuviraso trigo r̄āhi. Ipore oyeqūi opo pipe s̄āhi yuvireco igua.

² Evocoyase fariseo osepiase, aipo ehi yuvireco semimbohe eta upe:

—¡Mahera peporav̄iquiño tēi co mb̄ituhusa ari pipe peico! —ehi.

³ Jesús rumo omboyev̄i chupe:

—Peicua tēi niha icuachiapri aracahendar mborerecuar guasu David rembiapoḡuer resendar ñehesa onduḡuer reseve ndasiēpoise yuvireco. ⁴ Ahe niha oi que ité Tūpa r̄ēta pipe, opoco pan imboeteipri Tūpa upendar rese evocoi pahi upe güeraño ipotasa vahe ihu āgua yepi. Ahe rumo ohu, onduḡuer tohu avei omondo —ehi.

⁵ Iyavei aipo ehi chupe:

—Ava Ri queh̄ir mb̄ituhusa ari rerecuar ité secoi —ehi fariseo upe.

Jesús omboḡüera mb̄ia ipo nom̄i vahe

⁶ Ambuae mb̄ituhusa ari pipe, Jesús oi que judío tūparo pipe oporombohe oico. Aheve mb̄ia yasu

coti ipo nomii vahe seci. ⁷ Moisés porocuita rese oporombohe vahe, fariseo avei omahengatu Jesús rese yuvireco ‘¿ombogüerara pïha co mbïa mbituhusa ari pipe?’ oya; ‘yaiñhengapo angahu’ oyapave tēi yuvireco. ⁸ Ahe rumo oicuaño ité ipihañemoñetasa oico. Ipare aipo ehi evocoi mbïa ipo nomii vahe upe:

—Epūha cohave terehã ava pãhuve —ehi.

Ahe mbïa evocoiyase opūha, opita aheve ohã ⁹ Ahese Jesús oporandu ahe ava upe:

—Aporandura mbahe rese pēu —ehi—. ¿Mbahe vo yaposara mbituhusa ari pipe yepi, mbahe tupri pïha, anise mbahe naporai vahe tie? ¿Yaipïsiro pïha ava recocuer; yamocañi uca tēi tie? —ehi.

¹⁰ Evocoiyase omahengatu oyese ava oyere tupri vahe rese. Ipare aipo ehi ava ipo nomii vahe upe:

—Eichoho nde yiva —ehi.

Ahe mbïa evocoiyase oichoho oyiva; evocoiyase ipo ocuera tupri ité. ¹¹ Evocoiyase oñemoiro catuño ité yuvireco sese, iyavei oporandu-randu oyeupe yuvireco ‘¿mara yahera pïha imomara ãgua?’ oya.

Jesús oiporavo doce tupri güemimboherã

¹² Ahe ari rupi Jesús oso ivitribe, oyerure pïtu momba tupri Vu upe oico. ¹³ Cõhese, “Perió” ehi güemimbohe eta upe. Ipãhu sui oiporavo doce tupri, ahe chupe, “Apóstol” ehi. ¹⁴ Co ahe yuvirecoi: Simón, ahe acoi Pedro avei serer; Andrés Simón rivri; Santiago, Juan, Felipe, iyavei Bartolomé; ¹⁵ Mateo, Tomás, Santiago Alfeo rahir;

Simón, ava güecua rese secatēhí vahe pãhu pen-darer; ¹⁶ Judas Santiago rıvri; iyavei Judas Iscari-ote, ahe omondo vahe Jesús yamotarēhimbar uve.

Jesús ombohe ava rehı

¹⁷ Ipare Jesús ogüeyı ivıtri sui yugüeru co doce güemimbohe reseve. Ipare opıta ivı yoya tuprisave. Aheve ambuae semimbohe eta oyemboya ati yuvıreco sese iyavei setá ava yuvırecoi opacatu tecua Judea rupindar, Jerusalén rupindar iyavei yemboyasa Tiro, Sidón cotindar, ahe oyemboya avei yuvıreco sese. Ahe ava ēgüe ehi iñehe rendu potasave yuvıreco ‘tayande mbogüerami tēi yande mbaherasısa sui’ oyapave yuvıreco.

¹⁸ Acoi espíritu naporai vahe remimombaraisu avei ocuera tuprı yuvıreco. ¹⁹ Evocoiyase opacatu ava opoco pota ité sese yuvıreco. Esepia niha, ahe oporombogüera opacatu güeco pıratasa pıpe oico.

Ava sorıvete vahe iyavei ava ndoyembovıhai vahe

²⁰ Ipare omahe Jesús güemimbohe rese aipo ehi chupe:

“Perorıvete catu pe iparaisu vahe. Esepia niha, Tıpa mborerecuasa pēu nara ité secoi.

²¹ “Perorıvete catu cūriteindar ndasiepoi vahe. Esepia niha, pehıtarora peico curi.

“Perorıvete catu pe acoi ava cūritei oyaseho vahe. Esepia niha, pevharetera coiye peico.

²² “Perorıvete catu pe acoi ava pe amotarēhıse, pe mboyepepıñose avei oyesui yuvıreco, iñehe-ñehe tēise yuvıreco pēu pe amotarēhisave, iyavei acoi vıroırose pe rer mbahe tēi pıpe che, Ava Rıquehı, recocuer sui tēi yuvıreco.

23 Peyembovihãño iyavei perorivete catuñora ahe arĩ pipe peico. Esepia niha, ipare peipisira porerecosã tuvichã vahe ivave. Êgüe ehi tupri avei evocoi ava ramoi aracahendar mara-mara tẽi Tũpa ñehe mombehusar sereco yuvireco” ehi.

24 “¡Peparaisu catu rumo cũritei mbahe yar peico vahe! ¡Esepia niha, pemboaviye pe rorivetesã peico!

25 “¡Peparaisu catu acoi pe ihĩtaro vahe cũritei! ¡Esepia niha, ndaperiepoi chira peico coiye!

“¡Peparaisu catu acoi peviha vahe pe pietasẽ cũritei! ¡Esepia, peyasehora pe viharẽhisa pipe peico coiye!

26 “¡Peparaisu catu acoi peipisi vahe pe mboeteisa opacatu co ivi pipendar ava tẽi sui! ¡Esepia niha, êgüe ehi tupri tamoi Tũpa ñehe mombehusar angahu tẽi vahe upe yuvireco aracahe!” ehi.

Iyacatu yasaisu yande amotarẽhimbar

27 “Pe che ñehe rese peyapisaca vahe upe rumo aipo ahe: Pesaisu ava pe amotarẽhimbar; peyapo tupri mbahe aviye vahe ava nape ambotai vahe upe. 28 Peoporandu Tũpa porovasasa rese ava pẽu iñehe-ñehe tẽi vahe upe nara; peyerure Tũpa upe pẽu mbahe tẽi oyapo vahe recocuer rese. 29 Acoi que pe amotarẽhimbar pe rovapetese, co cotindar avei pemoporẽhĩñora chupe. Iyavei acoi que ava virocuaño tẽise pe yeosa pe sui, toviraso avei pe yemondesa güemimbotar rupi” ehi. 30 “Acoi oporanduse que pe mbahe rese yuvireco pẽu, pemondoño avei chupe. Iyavei acoi que ava virocuaño tẽise pe mbahe pe sui, ndapeporandui chira pẽu imboyevi ãgua rese. 31 Acoi mbahe peipota vahe

ambuae ava oyapo vaherã pẽu, ahe tupri avei peyapora chupe.

³² “Acoi ava pe raisupar güeraño pesaisu catu tẽise, ndipoi eté mbahe aviye vahe ipipe. Esepia niha, ava naporai vahe ãgüe ehi yuvireco yepi. ³³ Anise, acoi ava mbahe tupri ai oyapo vahe pẽu, chupe güeraño mbahe tupri peyapose, ¿mbahe vo evocoyase oime aviye vahe ipipe? Esepia niha, ava angaipa viyar avei ãgüe ehi yuvireco yepi. ³⁴ Acoi pemondoño tẽise mbahe ava upe ‘tomboyevi mbahe cheu’ pe hesave, ¿mbahe vo evocoyase oime aviye vahe ipipe? Esepia niha, ava angaipa viyar ãgüe ehi avei yuvireco. ³⁵ Pe rumo pesaisu catura ava pe amotarẽhisar, peyapoñora mbahe aviye vahe chupe. Iyavei pemondoño itera mbahe chupe, ‘Tasãroño rane mbahe cheu imboyevi ãgua vichico’ ndapeyei chitera. Ahese oimera porerecosa aviye catu vahe pẽu. Pe evocoyase Tũpa seco ivate catu vahe rahir peicora. Esepia niha, ahe aviye etepri vahe ava ‘aviye ndeu’ ndehi vahe upe iyavei ava yangaipa guasu vahe upe avei. ³⁶ Pe peporoparisuereco inungar pe Ru Tũpa oporoparisuereco yepi” ehi.

Ndiyai ambuae ava seroĩrosa

³⁷ “Ndiyai, ‘Oyavi ité mbahe’ peye voiño tẽi ambuae ava upe. Evocoyase Tũpa, ‘Oyavi mbahe’ ndehi chira pẽu. Pemocañi uca tẽi eme ambuae ava. Evocoyase Tũpa ndape mocañi tẽi chira. Peñeroño catu ambuae ava upe, ahese Tũpa iñero itera pẽu. ³⁸ Pemondose mbahe ava upe, evocoyase Tũpa omondoño itera mbahe aviye vahe pẽu inungar-ra omondo pe mbahe riru pipe pẽu

sāhambri tupri aviye vahe viña. Ēgüe ehira mbahe imondo pëu. Tūpa oicua tupri itera pëu inungar pe mbahe pemondo ambuae ava upe” ehi.

³⁹ Ipare Jesús omombehu co ambuae porombohesa: “¿Oicatu pīha ñepei ndasesapīsoi vahe ambuae ndasesapīsoi vahe reroguata? ¡Aní eté! Esepia, oyoya voi ovīapira que ivīcuar pipe yuvīreco viña. ⁴⁰ Ñepei yepe niha ava oyembohe vahe ndahei eté ivate catu ombohesar sui. Acoi omomba vahe rumo oyembohesa ahe osupītira ombohesar” ehi.

⁴¹ “¿Mahera ambuae ava rembiavīmi rese tēi pemahe? Iya rumo peyese rane mbahe tuvicha catu vahe pesepiara. ⁴² Ndiyai pëu, ‘Che toropītivīi mbahe nde rembiavī rese’ peye vahe rā chupe. Esepia, pe peyavī guasu catu mbahe. ¡Pe Tūpa reroyasar angahu tēi peico vahe! Penose uca rane pe rembiavī tuvicha catu vahe peyēsui, aheseramo ambuae ava rembiavī tahīmi vahe moingatu peicatura” ehi oporombohe.

Ava recocuer icuasa sembiapo rese

⁴³⁻⁴⁴ “Ivīra aviye vahe icuasa iha rese. Esepia, ivīra aviye vahe, iha aviye avei; ivīra naporai vahe, iha naporai avei no. Supi eté ndipohosai ivīra sāchi atī vahe sui higuera ha, iyavei ndahipohosai uva, yu pāhu sui. ⁴⁵ Ēgüe ehi avei ava upe. Ava aviye vahe oyapo mbahe tupri. Esepia, ahe vīreco mbahe tupri opīha pipe yepi. Iyavei acoi ava ndaseco pōrai vahe oyapo mbahe tēi. Esepia niha, ahe vīreco mbahe tēi eté opīha pipe yepi. Esepia niha, pe pīha pipe sui tēi osē pe ñehe ãgua” ehi.

Ava oyemoviracua vahe iyavei ndoyemoviracuai vahe Jesús reroyasave

⁴⁶ “¿Mahera vo, ‘Che Yar, che Yar’ peye tēi peico cheu; ipare ndapeyapoi eté mbahe che remimombehu? ⁴⁷ Amombehura rumo mbahe pēu uma nungar tupri ité acoi ava ou vahe cheu che ñehe rese oyapisaca vahe, iyavei oyapo ité vahe mbahe che remimombehu: ⁴⁸ ahe inungar tupri ité acoi ava oyapo vahe güētara ita harive yepi. Yipindar rumo oyoho picucu rane ité ita harive imopuha ãgua. Yepe ahe oi upe oyepota tēi ivitu ai, amarusu reseve oinupa pĩrata tēi, nomboyerocuai eté rumo. Esepia niha, vireco ité ovĩracuasa. ⁴⁹ Acoi ava che ñehengagüer rese ndoyapisacai vahe rumo, ahe ndoyaviĩ acoi ava oyapo vahe güētara ivi cuhi harive tēi, ndovirecoi eté ovĩracuasa. Ipare amar, ivitu ai reseve oinupa pĩratá, opaño omonduru; ocañi tēi eté evocoyase” ehi Jesús ava mbohe.

7

Jesús ombogüera chĩhivahe sundao rereciar Roma iguar remimboacua

¹ Jesús oñehepase ava upe oico, oso Capernaum ve. ² Ahe tecua pipe sundao rereciar ndahei vahe judío secoi vireco vahe güemimboacua güembiaisu. Ahe imbaheasi guasu ité ou; omano pota ité. ³ Jesús rerācua anduse rumo, oyocuai moviro tēi omboripar judío imboeteipri chupe iñehe ãgua ‘toumi tēi che remimboacua mbogüera’ oyapave. ⁴ Ahe judío evocoyase oyemboya Jesús

rese yuvireco iyavei oporandu yuvireco chupe aipo ehi:

—Ore mboripar sundao rerecuar oipota nde ereyapomi tēira mbahe icatupri vahe chupe viña. ⁵Esepia niha, ore raisu iyavei ahe teieté oyapo uca tũparo oreu nara —ehi yuvireco chupe.

⁶ Evocoyase oso ahe yuvirecoi vahe rupi. Virovise rumo sēta yuvireco, ahese sundao rerecuar omondo ambuae omboripar chupe. Imboripar evocoyase omombehu ñhehe aipo ehi vahe: “ ‘Che Yar, ereyemañecoi rene. Esepia niha, ndiyai eté che rēta pipe nde reique āgua. ⁷ Sese niha che teieté ndasoi nde reca. Nde ñhehe pipe tēi rumo che remimboacua erembogüerara. ⁸ Esepia, che avei niha areco che cuaita. Iyavei areco sundao che voya. Eso peve, ahese ñepeu upe, ahe evocoyase oso voi eté; ambuae upe: Erio, ahese, ou voiño ité cheu. Ipare, Ereyapora co mbahe, ahese che rembiguai upe, ahe evocoyase che reroyaño voi’ ehi ore mboripar” ehi Jesús upe yuvireco.

⁹ Aipo oyeupe hese Jesús, “¡Too!” ehi. Ipare aipo ehi vupindareta upe:

—Supi eté ndasepiyai vahe ité co mbia che reroya tupri vahe nungar judío eta pãhuve —ehi.

¹⁰ Yuviroyevipase sundao rerecuar mboripar sētave yuvireco, aheve osepia evocoi semimboacua yuvireco ocuera tuprise.

Jesús ombogüerayevi cuña imer mano vahecuer membrı cuimbahe

¹¹ Ipare voi Jesús oso tecua Naín ve, iyavei semimbohe yuvirasoño ité supı ava rehı reseve

avei no. ¹² Virovise tecua oso, osepia tehõgüer ava virocuase yuvireco ñoti ãgua. Ahe cuña imer mano vahecuer membri ñepei vahe ité viña. Tecua pipendar setá iteanga ava yuviraso supi. ¹³ Cuña repiase rumo, oiparisuereco. Ipare aipo ehi chupe:

—Ereyaseho eme —ehi.

¹⁴ Evocoyase oyemboya oso, opoco tehõgüer riru rese. Sese ovosii vahe evocoyase viropitaño yuvireco chupe. Ipare aipo ehi tehõgüer upe:

—Mbia chñivahe, che aipo ahe ndeu: ¡Eñarapuha! —ehi.

¹⁵ Evocoyase omano vahecuer oñarapuha oñ iyavei oñehe no. Ichui Jesús omondo ichi upe.

¹⁶ Opacatu tupri ité ava oyembosiquiye sepiase yuvireco:

—Cũritei oyemboyecua Tũpa ñehe mombehusar seco ivate vahe yande pãhuve cute —ehi yuvireco.

Iyavei,

—Tũpa niha ou güecua pñivii ãgua oico —ehi avei yuvireco.

¹⁷ Ipare co Jesús rerãcua yandusa opacatu Judea rupi, yivirindar rupi avei no.

Juan Oporoãpiramo vahe omondo vupindar Jesús recocuer cua uca ãgua

¹⁸ Juan avei oyandu opacatu co mbahe oico. Esepia niha, supindareta omombehupa co mbahe yuvireco chupe. ¹⁹ Evocoyase omondo ñuvirío vupindar Jesús upe mbahe rese porandu ãgua

‘¿nde ité vo Tũpa Rembiporavo aipo sãrombri erico, anise oime tie ambuae orosãro vaherã?’ oyapave. ²⁰ Evocoyase oyepota yuviraso Jesús upe aipo ehi yuvireco chupe:

—Juan Oporoãpiramo vahe ore mbou ndeu co mbahe rese porandu ãgua: ¿Nde ité vo Tũpa Rembi-poravo ereico imombehupri ereyu vaherã, anise ambuae pĩha orosãrora oroico? —ehi yuvireco chupe.

²¹ Ahe ari pipeve voi Jesús ombogüera setá ava imbaherasisa sui oico, ava carugar rerecosar sui avei no. Iyavei ava ndasesapiso vahe setá ombogüera. ²² Ahese ramo aipo ehi chupe cute:

—Peso, pemombehupa Juan upe mbahe pe rembiepia iyavei pesendu vahe: “Ndasesapiso vahe osareco tupri cūrítei yuvireco, ipãri-pãri vahe oguata tupri, iyavei lepra rerecosar ocuerapa tupri, ndayapisa vahe avei yapisapa, omano vahe opa ocuerayevi yuvireco iyavei ava iparaisu vahe upe imombehusa pĩsirosa resendar ñehesa” peyera chupe. ²³ ¡Oviharetera acoi ava oyeroyaño vahe che rese! —ehi Juan rupindar upe.

²⁴ Juan rupindar yuviraso pare, Jesús omboipi imombehu ava upe Juan recocuer: “¿Pesepias Juan recocuer ava porẽhisave, capihiata ivitu ombova-mbova vahe nungar pĩha? ²⁵ Anise, ¿pesepia tie iturucuar porañete ai vahe iyemboeteise? Ëgüe ehi vahe rumo secoi mborerecuar guasu guapisave yepi. ²⁶ ¿‘Mara ehi secocuer’ peye vo chupe? ¿Tũpa ñehe mombehusar ité pĩha? Ahe ité, iyavei evocoi niha ivate catu vahe Tũpa ñehe mombehusar sui. ²⁷ Ahe chupe ité Tũpa icuachiapri aracahendar pipe aipo ehi:

‘Amondora che ñehe mombehusar nde renondevende raperã moingatu ãgua’ ehi.

28 Aracahe suive ndipoi eté ivate catu vahe Juan sui. Yepe ahe ivate catu vahe viña, Tūpa mborere-cuasave rumo ava seco mbegüemi catu vahe ivate catu ichui.

29 “Co iñehe renduse opacatu ava, opacatu guarepochi rerocuasar yuvirecoi vahe avei oñeapiramo uca vahecuer Juan upe yuvireco: ‘Supi eté Tūpa aviye vahe ité’ ehi eté yuvireco cute.

30 Fariseo eta rumo iyavei Moisés porocuita rese oporombohe vahe ahe noñeapiramo uca potai vahe Juan upe yuvireco, ahe viroïroño Tūpa remimbotar oyeupendar yuvireco.

31 “¿Mbahe rese pīha amboyoyara ava recocuer cūrteindar? ¿Mara ehi pīha secocuer? 32 Ahe in-ungar chīhivahe iguayī tēi vahe ocar rupi. Ipore oñehe pucu-pucu omborīpar upe yuvireco aipo ehi: ‘Oromoñehe tēi mimbī pēu, ndapepivoi eté rumo; iyavei orosapucāi tēi sapucaisa viharēhisa resendar pēu, ndapeyasehoi avei’ ehi. 33 Esepia, ou Juan Oporoāpiramo vahe oico. Ahe ndohui vahe pan iyavei ndoihui vahe uva ricuer. Pe evocoyase, ‘Co mbīa caruguar vireco vahe’ peye tupri tēi chupe no. 34 Coiye che ayu, Ava Riquehīr, acarū iyavei aihu tupri avei. Ipore, ‘Co mbīa icaru guasu ai vahe secoi, iihu guasu ai vahe avei no’ peye cheu; ‘Ava angaipa viyar mborīpar tēi iyavei ava guarepochi rerocuasar mborīpar tēi’ peye avei cheu. 35 Ava Tūpa mbahecuaśa vireco vahe rumo icuasara sembiapo rese” ehi.

Fariseo Simón serer vahe rētave Jesús secoi

36 Fariseo Simón serer vahe oñehe Jesús upe: “Terecarumi che piri” ehi. Jesús evocoyase oso

sētave oguapĩ oĩ mesave. ³⁷ Ahese cuña angaipa viyar evocoi tecua pendar secoi vahe oyandu ichose Simón rētave icaru ãgua. Sese viroyepota aheve mbahe s̄iacua vahe s̄iru p̄ipe seraso sep̄irusu vahe chupe. ³⁸ Aheve oyasehó ite oñenop̄iha Jesús p̄ive iyavei güesai p̄ipe opa tupr̄i omoaqūi ip̄i. Ip̄are opaño omombiru oha apr̄i p̄ipe ichui, iyavei oip̄irupite, oip̄iyere avei mbahe s̄iacua vahe ip̄i rese. ³⁹ Sepiase fariseo, ip̄ihañemoñeta t̄ei: “Co mb̄ia Tũpa ñehe mombehusar itese, oicuaño itera co cuña opoco vahe oyese ndip̄ihai vahe viña” ehi t̄ei fariseo chupe. ⁴⁰ Evocoyase aipo ehi fariseo upe:

—Simón, amombehu potami mbahe ndeu —ehi.

—Aviye Porombohesar, emombehu ru cheu —ehi.

⁴¹ Evocoyase Jesús aipo ehi chupe:

—Ñuvirío mb̄ia oime virocua guarepochi mb̄ia guarepochi mondosar sui yuvireco. Ñep̄i virocua guarepochi quiniento tupr̄i mboraviqūi rep̄irã ichui. Ambuae evocoyase cincuenta rupive virocua. ⁴² Ip̄are ndoicatu irise ité imboyev̄i ãgua yuvireco chupe, evocoi mb̄ia guarepochi mondosar iñeroño chupe yuvireco —ehi—. Esãha, emombehu cheu, ¿uma evocoyase osaisu catura mb̄ia guarepochi mondosar? —ehi fariseo upe.

⁴³ —Cheu ndoyav̄i guarepochi virocua catu vahe ichui —ehi Simón.

—Taa, sup̄i eté aipo ere —ehi Simón upe.

⁴⁴ Evocoyase omahe cuña rese aipo ehi Simón upe:

—¡Emahe co cuña rese! Aique se acoi nde r̄eta p̄ipe, nde nderembouimi eté i che p̄isei ãgua cheu;

co cuña rumo güesai pipe oyosei che pi. Ipare omombiru oha aprí pipe ae no. ⁴⁵ Iyavei nde ndache rovarupítei eve; co cuña rumo, acoi nde rêta pipe che reique ramomiseve che pirupíte voi eté.

⁴⁶ “Nde nderemondoi mbahe s̃iacua vahe che ãca rese; co cuña rumo opa tuprí voi oipichi mbahe s̃iacua vahe che pi rese. ⁴⁷ Sese co cuña opa oipisi ñerosa oangaipa guasu rese. Esepia, che raisú iteanga. Acoi ava upe nañerosa tupríi vahe rumo, ahe ndoporoaisu tupríi avei” ehi.

⁴⁸ Ahese aipo ehi cuña upe:

—Oime nde angaipa upe ñerosa ndeu —ehi.

⁴⁹ Evocoyase ambuae ava ichohopri uguapi vahe yuvinoi aheve, ahe aipo ehi oyeupe yuvireco:

—¡Uma p̃iha co mb̃ia iñero vahe ité angaipa upe!
—ehi.

⁵⁰ Jesús rumo aipo ehiño cuña upe:

—Nde yeroyasa pipe ereipisi p̃isirosa. Sese eso tupriño eico —ehi.

8

Cuña oip̃itiṽi vahe Jesús yuvireco

¹ Ipare Jesús uguata opacatu tecua rupi, omombehu ñehesa aviye vahe Tūpa mborerecuasa resendar oico. Doce vahe apóstol supive yuvirecoi.

² Cuña avei yuviraso supí, ahe ombogüera vahecuer carugar rerecosa sui imbaherasisa sui avei no. Ahe ip̃ahuve avei María secoi, Magdalena serer yoapisa vahe, ahe ichui os̃e vahecuer siete tuprí carugar; ³ iyavei Juana Cuza rembireco, ahe mb̃ia Herodes mbahe rese ñangarecuar;

Susana iyavei ambuae setá cuña oipĩtĩvĩ mbahe güembiereco pipe yuvireco.

Yembohesa mbahe miti rese tecocuer mboyoyasa

⁴ Setá ava yuvinose tecua yacatu rupi pipe sui Jesús repia ãgua yuvireco. Ipare oñemonuha guasuse yuvireco, ahese Jesús setá mbahe rese omboyoya-yoya oporombohe aipo ehi: ⁵ “Ñepeĩ mbĩa osẽ omaheti oico. Ahe otiapi-apiise mbahe rãhiĩ oso, moviro oiti perĩ rupi. Ahe opa tẽi oicambe yuvireco, iyavei vĩrai opa tẽi yuvirohu. ⁶ Iyavei moviro tẽi oiti ivĩ nayanai vahesave ita pãhuve. Sese cũritei sorĩ; opaño rumo ipiru. Esepia niha, ivĩ nañaquĩ chupe. ⁷ Iyavei ambuae oiti yu pãhuve. Ipare oyoya tuprĩ sorĩ yuvireco; yu rumo opaño oyopi. ⁸ Ambuae rumo oiti ivĩ aviye vahesave. Ipare sorise, iha vai eté yuvireco; ahe iha retacuer amove cien tuprĩ ité ñepeĩ-peĩ mbahe miti sui osẽ” ehi.

Aipo ohe pare, Jesús oñehe pĩratá iteanga aipo ehi: “¡Acoi ava osenducua pota pota vahe che ñehe, toyapisacaño sese!” ehi ava rehĩ upe.

¿Mahera pĩha co yembohesa imboyoyasa ambuae mbahe rese?

⁹ Ipare semimbohe eta oporandu yuvireco chupe: “¿Mara oyapave vo aipo co yembohesa?” ehi. ¹⁰ Evocoyase omboyevĩ chupe: “Pẽu Tũpa oicua uca ité mbahe ndicuasai vahe omborerecuasa resendar; ambuae ava rumo ambohe tẽi ambuae mbahe mboyoyasa pipe; yepe osepia mbahe viña ‘tomahecua eme iyavei yepe

osenduño mbahe tosenducua eme yuvireco' viya" ehi.

Jesús omombehu tupri yembohesa mbahe tisa resendar

¹¹ "Co yembohesa resendar aipo oyapave aipo ehi: Mbahe rãhi ahe inungar Tũpa Ñehengagüer; ¹² iyavei mbahe rãhi peri rupi seitipri, ahe inungar acoi ava osendu tẽi vahe Tũpa Ñehengagüer yuvireco oyapave. Ipare rumo ou vırai chupe, ahe inungar carugar ou vahe chupe opaño oyaracua mocañi Tũpa Ñehengagüer sui 'tovıroya eme iyavei toñepisiro eme yuvireco' oyapave tẽi. ¹³ Acoi mbahe rãhi seitipri ita mahugüer rupi, ahe inungar acoi ava osendu tẽi vahe Tũpa Ñehengagüer yuvireco iyavei oipisi tupri ovıharetesa pipe yuvireco viña no. Ahe rumo inungar co mbahe miti ndovirecoi vahe guapo ovıracua água; vıroya raimi tẽi yuvireco. Oyepotase rumo mbahe tẽi chupe, oyepipi voıño yuvireco ichui. ¹⁴ Acoi mbahe rãhi seitipri yu pãhu rupi, ahe inungar acoi osendu tẽi vahe. Ipare rumo oyemboyepipi uca mbegüeño ambuae mbahe rese opıhañemoñetá iteangasa pipe tẽi, ombahe eta rese iyavei güemimbotarai mbahe tẽi potasa pipe avei. Ëgüe ehi ahe ava inungar mbahe miti ndıhai vahe ité. ¹⁵ Acoi mbahe rãhi seitipri rumo ivı avıye vahesave, ahe inungar ava vıreco vahe opıhañemoñetasa avıye vahe iyavei oyemoingatu voi Tũpa Ñehengagüer rese oyapısaca água yepi; vıroya tupri ité no; yuvirecoiño ité sese. Ëgüe ehise, oyapo mbahe avıye vahe yuvireco" ehi.

Yembohesa tataendi resendar

¹⁶ “Ndiyai eté ava upe guataendi omoendise omoha vahe que mbahe pipe, ‘Tamondo che rupavrive’ ndehi eté chupe; osupiño ivate imoi opacatu oi pipe yuviroique vahe resape água.

¹⁷ Esepia, ndipoi eté mbahe ñomipri, ndayasepiai vaherã curi. Iyavei yaposa vahe imombehupirêhi, icuasaño itera curi.

¹⁸ “Sese peyapisaca tupri co ñehesa rese. Esepia, acoi oyapisaca tupri vahe, chupe imondosa catura; acoi nomombitai vahe rumo mbahe güembieroya oyese, ichui serocuasaño itera” ehi oporombohe.

Jesús si, tivireta avei

¹⁹ Ichui Jesús si iyavei tivireta oyepota secosave yuviraso. Ndiyai eté rumo chupe yuviraso vaherã yuvireco ava rehi sui. ²⁰ Oime rumo ambuae ava imombehusar chupe,

—Nde si, nde rivireta reseve nde repia pota tēi ocarve yuvireco —ehi chupe.

²¹ Ahe rumo aipo ehi chupe:

—Acoi ava osendu vahe che Ru Ñehengagüer yuvireco, viroya tupri vahe avei, ahe che si, che rivri yuvirecoi —ehiño Jesús chupe.

Jesús omombituhu i ohitu vahe, ivitu ai reseve

²² Ñepi ari Jesús oha carite pipe güemimbohe eta reseve. Ipare aipo ehi:

—Yaso peve ipa rovai —ehi.

Evocoyase ahe yuviraso. ²³ Yuviroguata viteseve, oqueño Jesús ou. Ahese ipa pipe aviyeteramo tēi ivitu ai omboha guasu-guasú carite pipe i, omondo pota ité ipive viña.

24 Evocoiyase semimbohe yuviraso imomba aipo ehi chupe:

—¡Porombohesar! ¡Porombohesar! ¡Yande rerasora moco carite ipive! —ehi yuvireco.

Ahese omahe. Ipare oñehe pĩrata ivitu ai upe iyavei i ohitu vahe upe: “¡Pepituhu!” ehi. Aheseve voi opituhu tupri. 25 Evocoiyase aipo ehi güemimbohe eta upe:

—¿Mahera vo ndapeyeroyai che rese? —ehi.

Ahe rumo osiquiyeño, ndoyembovihaiño iyavei oporandu-randu tẽi oyeupe yuvireco:

—¡Mara ehi vahe pĩha co mbia! Esepia niha, ivitu ai, para guasu avei omboyeroya —ehi tẽi oyeupe yuvireco.

Mbia Gerasa iguar vireco vahe carugar oyese

26 Coiye oyepota yuviraso Gerasa ivi rese cute, ahe ambuae ipa coti ivi Galilea rovai. 27-29 Aheve mbia tecua iguar carugar vireco vahe seci. Aracahe suive nani tupri ite seci iyavei ndopitai vahe ite oi pipe yepi; ãgüe ehi rumo ahe tehõgüer ruvipa rupindar tẽi seci. Setá rupi carugar ombohe ite sereco yepi. Yepe ava oipocuhacua-acua carena pipe sereco, ipi rupi avei no ‘toviraso iri eme carugar’ oyapave yuvireco chupe viña, ahe rumo ombosando-sandoño ite iyavei carugar omoñemi ucaño ava porẽhisa rupi sereco. Evocoiyase Jesús osẽse carite pipe sui, osovaichi ahe mbia. Sepiase rumo, ahe mbia oñenopiha voi oso sovai oñehe pĩrata chupe:

—¡Eyepipi che sui, Jesús, Tũpa seco ivate catu vahe Rahir! ¡Che mombaraisui rene eve! —ehi.

Esepia, Jesús opa oyocuai caruguar sereco ‘tosẽ ichui’ oyapave.

³⁰ —¿Mara vo nde rer? —ehi chupe.

—Che rer Legión —ehi.

Aipo ehi, esepia niha, setá etepri caruguar yuviroique yaviterve. ³¹⁻³² Oimese rumo cuchi setá ocaru vahe ivitri ruambesave, caruguar evocoyase oporandu chupe aipo ehi: “Toroiqueñomi tẽi co cuchi aviterve” ehi yuvireco chupe ‘tayande mondo eme cañi tẽisa apirẽhi vahe pipe’ oyapave viña. “Peiqueño sese” ehi caruguar upe. ³³ Ahese opa yuvinose mbia sui yuviroique cuchi aviterve cute. Aheseve voi cuchi opa yuvinoña yuviraso ivivate sui ipa pipe. Aheve ipive opa tẽi eté ocañi yuvireco.

³⁴ Cuchi rãrosar osepiase ahe mbahe yuvireco, opa yuvinoña yuviraso co mbahe mombehu tecua pipe ava upe, cove rupi avei no. ³⁵ Ipare setá ava yugüeru aipo mbahe oime vahecuer repia. Oyepotase rumo secosave yuviraso, aheve osepia ahe mbia caruguar rerecosarer oguapi oĩ ñipiimi, oyemonde tupri, yaracua tupri avei oico. Ahese oyembosiquiye tẽi yuvireco. ³⁶ Acoi ava osepia vahecuer, ahe opa mbahe omombehu yuvireco co mbia caruguar rerecosar cuera agüer. ³⁷ Ahese opacatu ava Gerasa pendar, yivirindar avei Jesús upe, “Esiri cohave sui” ehi yuvireco. Esepia niha, osiquiyé iteanga yuvireco ichui. Evocoyase oha carite pipe. Ipare osoño. ³⁸ Yipindar rumo evocoi mbia caruguar vireco vahecuer, “Tasomi tẽi nde rupi” ehi viña. Ahe rumo, “Epitaño” ehi.

³⁹ —Eyevi nde rõtave, emombehupa opacatu mbahe Tũpa oyapo vahecuer nde rese —ehi.

Ahe mbia evocoyase oso opacatu tecua rupi, Jesús oyeupe mbahe apo agüer mombehu.

Jesús ombogüera Jairo rayri iyavei cuña iturucuar rese opoco vahe

⁴⁰ Oyevise Jesús ipa rovai oso, aheve ava rehi oviharetesa pipe oipisi tupri yuvireco. Esepia niha, ava opacatu ité osãro yuvireco. ⁴¹ Ahese Jairo serer vahe oyepota oso Jesús upe, evocoi judío tũparo rese yangarecuar secoi vahe. Ahe mbia oñenopiha sovai oso, oporandu chupe ‘tosomi tẽi che rõtave che rayri mbogüera’ oyapave. ⁴² Esepia niha, vireco guayri ñepeimi vahe ité, doce araviter vireco vahe. Ahe omano potami eté ou.

Osose Jairo rõtave, aheve peri rupi ava rehi yuvirasoño supi; oyemboti tupri ité yuvireco. ⁴³ Ahe ipãhu rupi oime cuña doce araviter rupi suvi yepiyere-yere vahe. Opa-opa tẽi omondo ombahe ocuera ãgua repirã yepi; ndocuerai eté rumo. ⁴⁴ Ahe cuña evocoyase oyemboya oso saquicuei coti opoco iturucuar popi rese. Ipare ahe pipeve voi opituhu suvi ichui. ⁴⁵ Evocoyase Jesús oporandu:

—¿Ava vo opoco che turucuar rese? —ehi.

Opacatu ava aipo ehi yuvireco: “Aní eté” ehi. Pedro evocoyase aipo ehi chupe:

—Porombohesar, ava rehi mo oyemboya nde rese iyavei nde moañi-añi yuvireco opacatu rupi —ehi.

⁴⁶ —Che rumo aicua oime ava opoco vahe che turucuar rese. Esepia, ayandu che pĩratasa osẽse che sui —ehi Pedro upe.

⁴⁷ Ahe cuña ndoicatui oñemi. Sese oriríi oñenopiha sovai. Oyemombehu chupe opacatu ava rovaque: “Che apoco nde turucuar rese. Esepia, ‘Acuera tuprira apocose iturucuar rese’ ahe ndeu” ehi. ⁴⁸ Ahese aipo ehi cuña upe:

—Che rayri, erecuera tupri ité. Esepia niha, che rese ereyeroya ité. Sese eso tupriño —ehi cuña upe.

⁴⁹ Jesús ñehe viteseve, ahese oyepota aheve mbia Jairo rēta sui aipo ehi Jairo upe oso:

—Omano nde rayri cute. Eremañeco tēi iri rene Porombohesar —ehiño Jairo upe.

⁵⁰ Evocoyase ñehe renduse aipo ehi Jairo upe:

—Aní eresiquiye; nde che rese yeroyasa pipe ité nde rayri ocuerayevira —ehi.

⁵¹ Oyepotase Jairo rētave oso, aheve ndomoingue uca potai eté ava oyeupi. Pedro, Santiago, Juan iyavei cuñatai yesupa upeño oipota seique āgua. ⁵² Aheseve opacatu ava oyaseho ati, ndoyembovīhai tēi sese yuvireco. Jesús rumo aipo ehi chupe:

—Peyaseho eme. Co cuñatai nomanoi, oque tēi ou —ehi.

⁵³ Ava rumo opuca ete-eteño seroyaēhisave yuvireco. Esepia niha, ahe oicua ité imanose yuvireco viña. ⁵⁴ Evocoyase oipopisi cuñatai. Ipare aipo ehi chupe:

—¡Cuñatai, eñarapuha! —ehi.

⁵⁵ Ahe evocoyase oñarapuha voi eté ocuerayevi. Ipare Jesús, “Pembocaru” ehi iyepota upe. ⁵⁶ Iyepota evocoyase, “¿Mara ehi rutei pīha co?” ehi tēi yuvireco chupe. Jesús rumo omombehu

chupe: “Ndapemombehui chietera que ñepei ava upe” ehi.

9

Jesús doce güemimbohe omondo Vu Tüpa mborerecuasa resendar mombehu água

¹ Jesús opa omonuha güemimbohe doce vahe oyeupe. Ipare omondo opĩratasa opacatu upe caruguar ambuae-ae tēi vahe imboyepepi água ava sui iyavei ava mbogüera água imbaherasisa sui. ² Opa omondo Vu Tüpa mborerecuasa resendar mombehu água, ava imbaheasi vahe mbogüera água avei. ³ Yipindar rumo aipo ehi chupe:

—Ndaperasoi chira mbahe pe guatasa rupi: que mbococa, mbahe riru, tembihu, que guarepochi avei no. Perasora rumo ñepei güeraño pe turucuar; ndahei chira ñuvirío peraso. ⁴ Pepitami ranera ñepei oi pipe güeraño tecua yacatu peico. ⁵ Acoi ava ndape moingue uca potaise güeta pipe yuvireco, peyepepiñora ichui iyavei peipipetera pe pi sui ivi cuhi ‘toicua Tüpa ñemoirosa oyeupendar yuvireco’ pe hesave —ehi güemimbohe eta mondo.

⁶ Evocoyase opa yuvinose yuviraso, iyavei oñemosai opacatu tecua rupi omombehu Tüpa Ñehengagüer pĩsirosa resendar yuvireco iyavei ombogüera-güera ité ava imbaherasisa sui opacatu oguatasa rupi yuvireco.

Herodes, “¿Mara ehi pĩha?” ehi Jesús upe

⁷ Co mborerecuar guasu Herodes oyandu opacatu mbahe Jesús rembiapo. Evocoyase, “¿Mara ahera pĩha?” ehi tēi. Esepia niha, aipo,

“Juan ocuerayevî” ehi yuvîreco chupe. ⁸ Ambuae aipo ehi: “Tũpa ñehe mombehusar Elías, ahe tēi oñemoporēhi iri” ehi yuvîreco. Ambuae aipo ehi: “Que ñepeî Tũpa ñehe mombehusar aracahendar revo, ahe tēi ocuerayevî” ehi yuvîreco viña. ⁹ Herodes rumo aipo ehi:

—Che niha ayasia uca Juan ãca —ehi—. ¿Uma rerãcua pĩha evocoyase ayandu? —ehi tēi.

Sese Herodes osepia pota ité Jesús.

Jesús oyopoi cinco mil cuimbahe

¹⁰ Apóstol oyevîpase Jesús upe, ahese opa tupri mbahe güembiapogüer omombehu yuvîreco. Ahese opa viroyepêpi ava rehîi sui, viraso ivi iporupîrêhisave tecua Betsaida cotive. ¹¹ Ahe ava rehîi rumo oyanduse yuvîreco, yuvîrasoño saquicuei. Evocoyase, “Perioño” ehi chupe. Ipare oñehe Vu Tũpa mborerecuasa rese ava upe iyavei ombogüerapa ava imbaherasisa sui.

¹² Caharuse co doce semimbohe oyemboya yuvîreco sese aipo ehi chupe:

—¿Ndiyai vo eremondopa ava, topituhu yuvîreco iyavei toseca mbahe güemihura tecua-tecuami cōi vahesa rupi? Esepia niha, cohave ndipoi eté mbahe —ehi yuvîreco chupe.

¹³ Ahe rumo aipo ehi güemimbohe eta upe:

—Pe pemondora mbahe semihura yuvîreco —ehi.

Semimbohe aipo ehi yuvîreco chupe:

—Poyandepomi tēi rumo pan orovîreco, ñuvîriomi tēi avei pira, toroso ayase co ava opacatu remihura rerocua —ehi yuvîreco chupe.

¹⁴ Esepia niha, cuimbahe retacuer cinco mil tupri. Jesús rumo aipo ehi güemimbohe eta upe:

—Pemboyaho cincuenta rupi-rupi imboguapí —ehiño.

¹⁵ Ëgüe ehi semimbohe yuvireco chupe. Ipape oguapí opacatu ava yuvireco. ¹⁶ Evocoyase oipisi poyandepo pan iyavei ñuvirío pira. Ipape omahe iva rese, “Aviye ndeu, che Ru” ehi. Imbohi-mbohi pare, opa omondo güemimbohe upe ava rehi upe imondo ãgua yuvireco. ¹⁷ Evocoyase opacatu ava ocaru vahe ihitaropa tēi yuvireco. Ipape semimbohe omboapipopa doce tupri iruova sembihu rumbirer yuvireco.

Pedro, “Jesús, Tūpa Rembiporavo Poropĩsirosar secoi” ehi

¹⁸ Ñepeí ari pĩpe Jesús oyerokuí ahe ae güemimbohe pãhuve. Ahese oporandu güemimbohe upe:

—¿Mara ehi vo ava oñehe yuvireco che rese? — ehi.

¹⁹ —Amove ava, “Juan Oporoãpiramo vahe” ehi yuvireco ndeu; ambuae, “Elías” ehi yuvireco ndeu, iyavei ambuae, “Aviyeteramo que ambuae Tūpa ñehe mombehusar aracahendar ocuerayeví” ehi yuvireco ndeu —ehi.

²⁰ Evocoyase oporandu güemimbohe upe:

—Pe no, ¿“Ava co secoi” peye ru pe cheu no? — ehi.

—Nde niha Tūpa Rembiporavo Poropĩsirosar ereico —ehi Pedro imboyeví chupe.

Jesús omombehu omano ãgua

²¹ Ahe rumo aipo ehi güemimbohe eta upe: “Pemombehui rene Tūpa Rembiporavo che recosa ava upe” ehi. ²² Iyavei aipo ehi chupe:

—Che, Ava Riquehir, che paraısu itera, iyavei opacatu judıo rerecuareta, pahi rerecuar ivate catu vahe iyavei Moisés porocuaıta rese oporombohe vahe remiamotarēhi aicora. Ahe avei che yuca ucara yuvireco; mbosapı ari rupı rumo acuerayevıra —ehi.

²³ Ipare aipo ehi opacatu upe:

—Acoi oguata pota vahe che rupi, topoi mbahe güemimbotar tēi aposa sui iyavei inungar-ra curusu rese ovosıira viña, toyemoingatu voi che recocuer rese oparaısu āgua ari yacatu rupi iyavei toguata tuprı che rupi. ²⁴ Esepia, acoi ava güetecuer tēi raisupar ocañi tēi itera; acoi ava omocañi tēi vahe rumo güetecuer che recocuer rese, ahe oñepısırora. ²⁵ Esepia, ¿aviye ai angahu pıha ava upe opacatu mbahe co ivı pıpendar pısi āgua tēi, ahe ae tēi omocañise güecocuer yuvireco viña? ²⁶ Esepia, acoi ava yuvinochi ai vahe che sui iyavei che ñehengagüer sui avei no, che avei, Ava Riquehir, ēgüe ahera ichui acoi ayevıse che reco pıratasa pıpe, che Ru reco pırata porañetesa pıpe avei sembiguai rehıı ıva pendar maranehi reseve curi. ²⁷ Supı eté, oimera amove cohava ava nomano vitei chivaherã, osepia rane itera ouse Tūpa mborerecuasa yuvireco curi —ehi.

Jesús ñecuñaro agüer

²⁸ Ocho ari pare Jesús oyeupi ivıtrı rese oso oyerure āgua. Pedro, Santiago iyavei Juan ahe vıraso oyeupi. ²⁹ Oyerure vıteseve, oñecuñaro

sepiaca. Iturucuar evocoyase sendi, morochí eteanga. ³⁰ Ahese ñuvirío ava oyemboyecua yivii imoñeta yuvinoha. Evocoi ava yuvirecoi vahe ahe Moisés, Elías avei. ³¹ Oyere tupri sendigüer iporañetesa yuvireco sese, iyavei co ñuvirío mbia oñehe imano ãgua rese yuvireco chupe: “Nde niha ereyemomborarara nde mano ãgua Jerusalén pipe eico” ehi yuvireco chupe. ³² Yepe Pedro, ondugüer reseve sopesí eteanga yuvireco viña. Aviyeteramo tēi opa sopesi yuvireco ichui. Ahese osepia Jesús porañetesa yuvireco iyavei co ñuvirío mbia yuvinoha vahe yivii no. ³³ Evocoi mbia oyepepise ichui yuvireco, ahese Pedro aipo ehi chupe:

—Ore mbohesar, javiye ai eté cohava yaico! Toroyapo mbosapí teyupami: ñepei ndeu nara, ambuae Moisés upe, ambuae evocoyase Elías upe nara —ehi.

Pedro rumo ndoicuai eté aipo ohesa. ³⁴ Iyavei iñehe viteseve, aviyeteramo tēi iporēhi iva quiha, oyopipa tupri ité. Evocoyase osiquiye tēi yuvireco. ³⁵ Ipãhuve oyeendu ñehesa aipo ehi vahe: “Co che Rahir, che Rembiporavo ité; peyapisaca catu iñehe rese” ehi.

³⁶ Opase osendu co ñehesa yuvireco, ahese osepia Jesús, ahe ae ihãise yuvireco. Semimbohe rumo oyeupe tēi ovireco yuvireco; ndomombehu vītei eté ava upe mbahe osepia vahecuer yuvireco.

Jesús ombogüera chñivahe caruguar rerecosar

³⁷ Ahere ayihive, ogüeyise ivitri sui yuvireco, setá ava oyugüeru Jesús rovañchi yuvireco. ³⁸ Ahese mbia ava pãhuve aipo ehi pĩrata voi eté:

—Porombohesar, ereyapomira mbahe icatupri vahe cheu viña. Esepia, che rahir ñepeimí vahe ité; ³⁹ carugar rumo opoco sese, omoase pucu-pucu uca yepi iyavei omoeõha-õha sereco iyavei iyuru rupi tiyui yusu-yusu. Mara-mara tēi vireco iyavei ndopoi potai eté ichui. ⁴⁰ Amombehu tēi niha nde remimbohe upe ‘tomboyepepimi tēi carugar ichui’ che yapave viña; nomboyepepi eté rumo ichui yuvireco —ehi.

⁴¹ Ahe omboyevi:

—¡Too, ndapeyeroya tupri vitei eté che rese, co coti tēi vite pe pihañemoñetasa! ¿Mbovi rupi rutei vo aico vitera pe pãhuve che ñemosasa pipe? Eru nde rahir cohava cheu —ehi ahe mbia upe.

⁴² Chihivahe oyemboyase rumo sese, carugar omboviapi voi imondo ivive, imoeõha iri. Jesús rumo õhehe pĩrata carugar upe imose ãgua chihivahe sui. Ahese chihivahe ocuera tupri ité. Ipare omboyevi tu upe. ⁴³ Ahese opacatu ava, “¡Mara ehi rutei!” ehi tēi yuvireco Tũpa pĩratasa rembiapo aviye vahe repiase.

Jesús omombehu iri omano ãgua

Opacatu ava ndoyembovihal viteseve yuvireco, ahese aipo ehi güemimbohe upe:

⁴⁴ —Pesendu tupri che ñehe; peresarai eme ichui: che, Ava Riquehir, imondopri aicora che amotarẽhimbar povrive —ehi.

⁴⁵ Semimbohe rumo ndoseducuai eté oyeupe ñehesa yuvireco. Esepia niha, Tũpa ndoipotai eté senducua ãgua chupe; osiquiye chupe oporandu ãgua yuvireco yepi.

¿Ava vo seco ivate catu vahe?

⁴⁶ Coiye semimbohe eta omboip̄i oyecopi-copi yuvireco ‘¿ava ité p̄iha ivate catu vaheṛã curi?’ oyapave. ⁴⁷ Jesús rumo oicuaño ipihañemoñetasa yuvireco. Evocoyase oip̄isi ch̄ihivahemi seru oip̄ive imoha. ⁴⁸ Ipare aipo ehi güemimbohe eta upe:

—Acoi ava oip̄isi vahe co ch̄ihivahemi nungar che rer pipe sereco, che ité che p̄isi yuvireco; iyavei acoi ava che p̄isi vahe, oip̄isi aveira che mbousar. Esepia, acoi ava seco mbegüemi catu vahe pe p̄ahu pendar, ahe aviye catu vahe —ehi.

Acoi yande mboyoyasar, ahe ndahei yande amotarẽhisar

⁴⁹ Evocoyase Juan aipo ehi chupe:

—Ore mbohesar, orosepia niha mb̄ia ombogüera vahe carugar p̄iratasa sui ava nde rer pipe oico; ore rumo ndoroipotai chupe evocoyasa seco ãgua. Esepia niha, ndahei yande rupindar secoi —ehi.

⁵⁰ Jesús rumo,

—¡Aní ndapeipotai chupe! —ehi—. Esepia niha, evocoi nungar ava ndahei yande amotarẽhisar; ahe rumo yande mboyoyasar —ehi güemimbohe eta upe.

Jesús oñehengata Santiago upe, Juan upe avei

⁵¹ Virovise rumo ari ivave Jesús so ãgua, ahe ese ahe aipo ehi: “Yaso ru Jerusalén ve cūritei” ehi. ⁵² Evocoyase omondo ava güenonera. Ahe yuviraso tecua Samaria iv̄i rupi ipituhu ãgua moingatu viña; ⁵³ Samaria iguar rumo nomoingue potai eté güëtave yuvireco. Esepia, oicua Jerusalén ve

ichose yuvireco. ⁵⁴ Co mbahe naporai vahe repiase rumo, semimbohe Santiago iyavei Juan oporandu yuvireco chupe:

—Ore Yar, toromboumi tata iva sui co ava moçañi ãgua —ehi yuvireco chupe viña.

⁵⁵ “¡Aní!” ehi oyemboyere chupe. ⁵⁶ Ipare yuvirasas ambuae tecuave.

Oguata pota vahe Jesús rupi

⁵⁷ Yuvirasose peri rupi aipo ehi mbia Jesús upe:

—Che Yar, che nde rupi aso pota opacatu nde guatasa rupi —ehi.

⁵⁸ Ahe rumo aipo ehi:

—Aguara vireco güētara, vĩrai avei vireco guaiti; che rumo, Ava Riquehir, ndarecoi que che rêta che pituhu ãgua —ehi chupe.

⁵⁹ Ipare ambuae upe aipo ehi:

—Erio che rupi —ehi.

—Che Yar, che ru manose voi, ñoti pare aguatara nde rupi —ehi.

⁶⁰ —Aní —ehi—. Acoi omano vahe nungar ahe ae toñeñetiño yuvireco; nde rumo eso, emombehuño ñehesa Tũpa mborerecuasa resendar ava upe —ehi.

⁶¹ Evocoyase ambuae aipo ehi chupe no:

—Che Yar, che aguata pota nde rupi; yipindar rumo aso ranera che rêtave mbahe moingatu che so ãgua —ehi.

⁶² —¡Aní! —ehi ahe mbia upe—. Esepia, inungar acoi oipisi vahe ivi mboyeresa imohivi tupri ãgua, omahese rumo guaquicuei coti, evocoi nungar naporai Tũpa mborerecuasave yuviroique vaherã —ehi.

10

Jesús oyocuai setenta y dos tupri güemimbohe

¹ Ipare yande Yar oiporavo setenta y dos ava ñepeí-peí tecua rupi ñuvirío-río güenonera.

² Yipindar rumo aipo ehi: “Supi eté mbahe imonuhapirã setá iteanga; sese oporaviqui vahe rumo moviromi tēi. Sese peporandu mbahe miti Yar upe, tombou ava imonuha āgua” ehi.

³ “Peso, opomondo ovesami nungar ava mbahe mimba oñaro vahe nungar pāhuve. ⁴ Perasoí rene mbahe riru iyavei guarepochi siru reseve.

Ndapemondugüei chiaveira pe pitaqui; iyavei aní pepita ‘avirave’ apo ava upe peri rupi. ⁵ Acoi peiquesé que oi pipe, yipindar rumo peyapo ranera: ‘Avirave. Tūpa tape rovasa’ peyera.

⁶ Acoi aheve oimese ava aviye vahe, ahe oipisira Tūpa porovasasa; anise evocoyase ndipoi chira porovasasa chupe nara. ⁷ Acoi pe pisise, aheve ité pepitañora; pecarura iyavei peihura ahe sembiereco. Esepia, ava poraviquise imboepisa chupe. Sese ndapeguatai chira ambuae ava rēta rupi-rupi tēi. Ñepeí oi pipe güeraño pepitañora.

⁸ Acoi que tecuave peyepotase, ahe pendar pe repia potañose yuvireco, acoi ahe ombouse mbahe yuvireco tapehu, pehuñora ichui. ⁹ Ahe pendar imbaheasi vahe evocoyase pembogüerara, iyavei aipo peyera chupe: ‘Tūpa mborerecuasa namombrimi pe sui’ peyera. ¹⁰ Acoi peyepotase rumo que tecuave, ahe tecua pendar ndape repia potaise yuvireco, peseñora ocar rupi aipo peyera:

¹¹ ‘¡Co pe recua pipendar ivi chimborer oya vahe ore pi rese oroipipete oreyesui, peicua catu, ore

hesa pipe. Peicua tupri rumo Tūpa mborerecuasa namombriimi pe sui' peyera chupe. ¹² Supi eté acoi arí cañi oyepotase, oimera Tūpa ñemoirosa ahe tecua pendar upe ivate catu vahe ava tecua Sodoma pendar sui" ehi güemimbohe eta upe.

Opacatu tecua ndiporeroyai vahe

¹³ "¡Peparaisu ava tecua Corazín pendar, pe avei peparaisu tecua Betsaida pendar! Esepia, acoi poromondiisa pe pãhuve yapopri yaposara yipive tecua Tiro, Sidón ve viña, ahe tecua pendar aracaveve anga omondera turucuar viharēhisa re-sendar, tanimbu avei omondora oãca rese oan-gaipa mboasisa pipe yuvireco viña no. ¹⁴ Pe rumo peipisira ivate catu vahe Tūpa ñemoirosa ava Tiro, Sidón pendar sui arí cañi pipe coiyé. ¹⁵ Pe avei no tecua Capernaum pendar, ¡pemoha co ivave pe reco ãgua viña! ¡Pe mombosapara rumo ivicuar ipicucu catu vahesave!

¹⁶ "Acoi ava oyapisaca vahe pe ñehe rese yuvireco, ahe evocoyase oyapisaca avei che ñehe rese. Iyavei acoi ava pe mboyepipiño vahe oyesui, ahe evocoyase che avei che mboyepipi oyesui yuvireco. Acoi ava rumo che mboyepipiño vahe oyesui, ahe evocoyase che mbousar avei omboyepipiño oyesui" ehi güemimbohe upe.

Oyevipa iri ava setenta y dos vahe

¹⁷ Oyevipase ava setenta y dos vahe, oviharetasave aipo ehi yuvireco chupe:

—¡Ore Yar, carugar avei eté niha ore mboyeroya etepri yuvireco nde rer pipe! —ehi.

¹⁸ Evocoyase aipo ehi güemimbohe eta upe:

—Taa, asepia ité niha caruguar rerecuar oviapise iva sui overa vahe nungar. ¹⁹ Che niha amondo pĩratasa pẽu peguata vaherã mboi iyavei mbahe rumbiquĩape hari rupi opacatu pe amotarẽhisar pĩratasa reroyi ãgua, que mbahe pe momaraẽhi ãgua avei. ²⁰ Peyembovĩharetei rene carugualeta pe mboyeroyase. Iya rumo peyembovĩha pe rer iva pendar icuachiapri rese —ehi güemimbohe eta upe.

Jesús oviharete

²¹ Ahe pipeve voi Jesús, Espíritu Santo rese, vorivetesa pipe aipo ehi: “Che Ru, che oromboetei. Nde niha iva Yar, ivi Yar avei no. Esepia niha, ereñomi co mbahe ava oyesui tẽi mbahe oicua vahe sui iyavei co ivi pipendar ava imbahecua vai vahe sui avei no. Eremboyecua rumo co mbahe ava ndoyembohe tupri vahe upe nde rese oyeroyase. Ahe niha ereipota ité, che Ru” ehi.

²² “Opacatu mbahe che Ru ombou cheu. Iyavei ndipoi ava che cua vahe tahir che recose; che Ru güeraño ité rumo che cua. Ndipoi avei che Ru oicua tupri vahe yuvireco no; che güeraño ité aicua. Iyavei acoi que ava upe aicua uca potase, aicua uca tupri aveira” ehi ava eta upe.

²³ Evocoiyase omahe güemimbohe eta rese, chupe güeraño aipo ehi: “Perorivete catu co mbahe pesepia vahe rese. ²⁴ Esepia niha, setá etepri ava Tũpa ñehe mombehusar yuvirecoi vahe iyavei mborerecuar guasu eta aracahendar osepia pota tẽi mbahe pe rembiepia; ndosepiaí eté rumo yuvireco. Osendu pota tẽi co pe remiendu

yuvireco; ahe rumo ndosendui avei yuvireco” ehi güemimbohe upe.

Jesús porombohesa Samaria iguar recocuer sui

²⁵ Iyavei no Tũpa porocuita rese oporombohe vahe oso Jesús upe secoãha ãgua, mbahe rese oporandu:

—Porombohesar, ¿mara ahera vo vichico teco apirẽhi vahe rereco ãgua? —ehi chupe.

²⁶ Ahe omboyevi:

—¿Mara ehi vo Moisés porocuita icuachiapri pipe? ¿Mara ehi vo ereyeroquise ipipe? —ehi oporombohe vahe upe.

²⁷ Evocoyase oporombohe vahe omboyevi:

—“Eresaisura nde Yar Tũpa opacatu nde pihá pipe, opacatu nde recocuer pipe, opacatu nde pĩratasa pipe, opacatu nde yapisacasa pipe avei; iyavei eresaisura ava nde cotindar nde yeaisu nungar” ehi Moisés porocuita —ehi chupe.

²⁸ —Supi eté —ehi—. Eremboyevi tupri ndeyeupe porandusa cheu. Eremboaviyese evocoi, ahese ererectora tecovesa apirẽhi vahe —ehi co mbia upe.

²⁹ Co mbia rumo oyeepi pota. Sese aipo ehi chupe:

—¿Ava vo aipo che cotindar secoi? —ehi.

³⁰ Evocoyase omboyevi chupe:

—Oime mbia Jerusalén sui oso vahe Jericó ve. Ahe perĩ rupi yuvĩnose ava ndipĩhai vahe yuvireco chupe. Ahe vĩrocuapa imbahe yuvireco ichui, iturucuar opacatu reseve; iyavei yuvĩrocu-rocu yuvireco sese. Ipare oyuca seni seya perĩ rupi yuvĩraso. ³¹ Ahese judío pahi ou ahe perĩ rupi.

Evocoi mbia repiase rumo, co coti rupi oñacuasaño oso. ³² Ëgüe ehi tupri avei ambuae mbia pahi pĩtĩvĩsar levita, osepiase, oñacuasa tupriño avei oso no. ³³ Ipare rumo mbia sepia potapirẽhi Samaria iguar oso ahe peri rupi avei. Ahe osepiase, oiparaisuereco. ³⁴ Evocoiyase ahe mbia oyemboya oso sese oiposano yapichasa mbahe quira pipe, uva ricuer sai vahe pipe, oicuhacua avei turucuar pipe chupe. Ipare osupi güeimba harive oaprive, viraso ava quesave. Aheve ihañeco sese. ³⁵ Ahere ayihive Samaria iguar oseose, omondo guarepochi ahe pendar oi yar upe. Ipare aipo ehi chupe: “Esãro tuprimi tẽi co ava cheu. Acoi ndehañeco catuse sese, amboepi catu irira che yevise ndeu” ehi sãta vahe upe. ³⁶ Indó, ¿uma vo co evocoiyase mbosapi yuvirecoi vahe oyemboava acoi ava ndipihai vahe remimombaraisu upe? —ehi.

³⁷ Evocoiyase ahe mbia aipo ehi:

—Acoi mbia oiparaisuereco vahe iparaisu vahecuer —ehi.

—Supi eté —ehi chupe—. Eyapo tupri avei nde co nungar eico —ehi Jesús co Moisés porocuita rese oporombohe vahe upe.

Jesús oso Marta iyavei María rẽtave

³⁸ Ipare Jesús güemimbohe eta reseve oguata vite oyepota cuña recosave yuviraso, ahe cuña rer Marta. Ahe omoingue tupri güẽta pipe. ³⁹ Icupihir evocoiyase María serer. Ahe oguapi Jesús pive iñehe rendu oĩ. ⁴⁰ Marta rumo oyembopihavĩracua opacatu mbahe rese oico. Ipare oyemboya oso Jesús rese opihavĩracuasa pipe aipo ehi chupe:

—Che Yar, ¿aviye ai vo evocoi che cupihir chini tēi nde piri che poraviqui viteseve? Emombehu chupe, tou, tache p̄itivii rane —ehi chupe.

⁴¹ Omboyevi rumo Marta upe aipo ehi:

—Marta, Marta, ¿mahera vo ereyemañeco etepri tēi setá mbahe apo ãgua eico? ⁴² Iya rumo ñepe mbahe yaposa. Co nde cupihir oiporavo ahe mbahe aviye catu vahe oyeupe che ñehe renduse; ndipoi chietera que ava virocua vaherã ichui —ehi Jesús Marta upe.

11

Jesús ombohe güemimbohe eta yerure ãgua rese

¹ Ñepe arí Jesús oyerure. Iyerure pare semimbohe aipo ehi chupe:

—Ore Yar, ore mbohemi tēi ore yerure ãgua rese eve inungar Juan ombohe güemimbohe eta sereco yepi —ehi chupe.

² —Aviye —ehi—. Peyeroquise, aipo peyera: ‘Ore Ru Tūpa, ivave ereico vahe, imboeteipri nde rer tasecoi.

Tou nde mborerecuasa oreu.

Tayaposa nde remimbotar co ivi pipe, iba pendar nungar.

³ Embou ore rembihi arí yacatundar oreu.

⁴ Iyavei ndeñero ore angaipa rese oreu.

Esepia niha, ore oreñero opacatu ore amotarēhimbar upe.

Ore mboangaipa ucai rene eve, ore renose catu mbahe tēi sui eve’ peyera —ehi

⁵ Iyavei aipo ehi no:

—Inungar co perecora pe mboripar viña. Ipare pesora ahe sētave p̄itu mbiter rupi aipo peyera

chupe: ‘Che mboripar, emboumi tēi mbosapī pan cheu tamboyevire ndeu. ⁶ Esepia, ambuae che mboripar oyepota ou che rētave; ndarecoi eté rumo mbahe amondomi vaheṛā chupe’ peyera chupe. ⁷ Ipare ahe, ‘Che mañeco tēi rene eve. Esepia, opa ayoquenda, iyavei co che rahir opa aropituhu seru. Sese ndiyai apūha mbahe mondo ndeu’ ehiñora pēu viña. ⁸ Supi eté, yepe nopuhai chietera mbahe mondo pēu pe mboripar secose viña, opūhaño itera rumo ‘tache mañeco iri eme’ oyapave. Ipare omondoño itera opacatu mbahe pe porandusa pēu. ⁹ Sese aipo ahe pēu: Peporandura mbahe rese Tūpa upe, ahese omboura pēu; peseca ahe mbahe, ahese peyosura; inungar pemota oquenda, ēgüe peyera peyeroquisa pipe Tūpa upe, ahese imboisara mbahe mbou āgua pēu. ¹⁰ Esepia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyerokuva pipe omota vahe oquenda Tūpa upe, chupe imboisara.

¹¹ “Oimese tahi vahe pe pāhuve, tahir oporanduse pira rese vu upe, ¿omondora pīha mboi tēi guahir upe viña? ¹² anise, ¿omondora pīha oporanduse mbahe rupiha rese, mbahe rumbiquiāpe tēi chupe viña? ¹³ ¡Aní! Esepia, pe yepe ava ndaseco pōrai vahe peico viña, pe rahir upe rumo pemondoño ité mbahe aviye vahe. ¡Tahetru pe Ruiva pendar omondo catura Espíritu Santo acoi ava oyeupe porandusar upe!” ehi güemimbohe eta upe.

“Jesús vireco caruguar pīratasa oyese” ehi tupri tēi ava yuvireco

14 Ambuae ari pipe, Jesús osepia mbia caruguar nomoñehengatui vahe. Evocoyase omose caruguar ichui. Aheseve voi iñehengatu. Ipare ava rehi sepiase, ndoyembovïhai tēi yuvireco. 15 Amove rumo ava aipo ehi tēi yuvireco: “Beelzebú, caruguar rerecuar pīratasa pipe revo omboyepipi caruguar oico” ehi tēi yuvireco chupe.

16 Ambuae ava secoãhasa pipe oporandu yuvireco chupe: “Eyapo ru mbahe nde rembiapo iva pendar nde recocuer cua ãgua” ehi tēi. 17 Ahe rumo oicuaño ipihañemoñetasa. Evocoyase aipo ehi chupe:

“Que mborerecuar guasu povri pendar ovava-vavase oyeupe oyeamotarēhisave yuvireco, ahese evocoi mborerecuar pīratasa ocañi tēira. Iyavei ava omu rese ae oyeamotarēhi vahe, oyemocañi aveira yuvireco no. 18 Ēgüe ehi avei niha caruguar. Esepia, serecuar omboyepipise opovri pendar, ovavara oyeupe yuvireco viña. Ahese oyemocañi tēira yuvireco. Co ñehesa aipo ahe pēu. Esepia pe, ‘Beelzebú pīratasa pipe tēi opa omose caruguar ava sui oico’ peye tēi cheu. 19 Ēgüe ahese rumo viña, ¿ava pīratasa pipe ru evocoyase pe voya omboyepipi caruguar ava sui? Pe voya ae omboyecuar pe ñehe pe rembiavi yuvireco pēu. 20 Che rumo Tūpa pīratasa pipe caruguar amboyepipi ava sui. Sese cūritei Tūpa mborerecuasa oyepota ité pēu.

21 “Inungar oime ava ipīrata etepri vahe, iyavei vireco oyeroyasa. Ipipe osãro güëta opacatu mbahe ipipendar avei icañiēhi ãgua. 22 Acoi ouse

rumo ambuae ipĩrata catu vahe chupe, ahe os-e-coreroyise, opa virocua iyeroyasa ichui. Evo-coiyase güembierocua ahe opa viraso oyeupe.

²³ “Acoi ava ndache mboyoyai vahe, ahe che amotarẽhimbar yuvirecoi; iyavei acoi ava ndose-cai vahe ava cheu, ahe omosai tẽi yuvireco che sui” ehi.

Carugar oyevi iri güeco agüerve

²⁴ “Acoi osẽse carugar ava sui, oguata tẽi ivi ipiru vahe rupi opituhu ãgua reca. Ipare rumo ndoyosuise, ipihañemoñeta oyeupe, ‘Ayevi irira che reco agüerve vicho’ ehi. ²⁵ Aheve oyeveise, osepia iri secocuer inungar oi sahuvapri tupri. ²⁶ Sepiase, oso siete carugar naporai catu vahe reca. Ichui güeruse, oyoya guasu yuviroique co mbia piha pipe. Sese mbahe tẽi catu ité secocuer yipindar güeco agüer sui” ehi Jesús ava rehii upe.

Tũpa Ñehengagüer viroya vahe sovasapri secoira

²⁷ Oñehe viteseve aipo mbahe rese, cuña ava rehii pãhu pendar oñehe pĩrata aipo ehi:

—¡Evocoi mbia sui ereha vahe iyavei nde mboacua vahe, ahe sovasapri tasecoi! —ehi chupe.

²⁸ Ahe rumo aipo ehi:

—¡Acoi osendu vahe ité che Ru Tũpa Ñehengagüer iyavei viroya vahe ité, ahe sovasapri secoira che Ru Tũpa rovaque! —ehi ahe cuña upe.

Ava eta ndaseco põrai vahe oporandu poromondiisa rese yuvireco

²⁹ Ava rehii oyere ati vitese Jesús rese yuvireco, ahe aipo ehi: “Pe cũriteindar ava ndaseco põrai

vahe, peporandu tēi poromondiisa che recocuer cua āgua rese. Che rumo namboyecuai chira ambuae poromondiisa pēu. Jonás recocuer rese güeraño opomomahenduhara. ³⁰ Inungar Jonás poromondiisa seci ava Nínive pendar upe, ēgüe ehi aveira niha Ava Riquehir reco pipe oimera poromondiisa ava cūrteindar upe. ³¹ Acoi ari cañi pipe cuña mborerecuar guasu irohi coti secua vahe porandusave omombehura co ava cūrteindar cañipa āgua. Esepia, ahe ou amombri ivi sui Salomón mbahecuasa rendu āgua; cūrtei rumo oime ivate catu vahe cohava Salomón sui. ³² Iyavei ari cañi pipe ava tecua Nínive pendar porandusave omombehura ava cūrteindar cañipa āgua. Esepia niha, omboasise oangaipa, oyevi Tūpa upe yuvireco Jonás omombehuse Tūpa Ñhengagüer chupe; cūrtei rumo oime ivate catu vahe Jonás sui pe pāhuve” ehi.

Tesapesa yande retecuer resendar

³³ “Ndayañomi chira tataendi que imoendi imoi; ndayamondo chiaveira que mbahevriive. Iy-acatu rumo yamondora ivate tataendi rendave ‘tosesape opacatu ava oi que vahe oi pipe’ yande yapave. ³⁴ Iyavei pe resa inungar tataendi pe retecuer upe. Esepia, aviyese pe resa, opacatu pe retecuer upe osesape. Acoi imarase rumo, pe retecuer pītumimbi vahe nungar tēi. ³⁵ Sese peicua catu co poroesapesa pereco vahe, tape rereco eme pītumimbi vahe nungar. ³⁶ Co supi eté vahe osesape tuprise opacatu pe pihave, ndipoise que pītumimbisa nungar mbahe ipipe, evocoyase ahe inungar tataendi osesape vahe opacatu pe

recocuer p̄ipe. Ahese ndipoi que p̄ĩtu vahe p̄ẽu” ehi.

Jesús omombehu fariseo iyavei Moisés porocuaíta rese oporombohe vahe recocuerai

³⁷ Opase oñehe Jesús, fariseo viraso güetave imbocarú. Oíquese s̄etave oso, oguap̄i mesave oĩ. ³⁸ Ocaru renondeve ndoyepoise rumo, ahese fariseo ndoyembov̄ihai t̄ei nomboav̄iyeise judío porocuaíta. ³⁹ Ahe rumo aipo ehi fariseo upe:

—Inungar igua r̄iru iyavei tembihu r̄iru icupe rupi t̄ei yoseip̄ri, ip̄ipe rumo iqūiha op̄itaño ité, êḡüe ehi tup̄ri avei pe recocuer pe monda raisave mbahe-mbahe t̄ei pe reco p̄ipe. ⁴⁰ ¡Pe ndayaracuai vahe peico! ¿Ndapeicuai vo pe rete aposar, pe p̄iha aposar avei? ⁴¹ Sese pemondo porerecosa ava iparaisu vahe upe pe recat̄eh̄ih̄isa p̄ipe. Evo-coiyase ip̄ipe sui opacatu imoat̄irombr̄i peicora.

⁴² “¡Peparaisu pe fariseo! Esepia, yepe pe remiti sui pemondo peyacatu ñepeí-peí diez vahe sui T̄ũpa upe viña, pe rumo ndaperoyai teco ñv̄isa iyavei peseyaño t̄ei T̄ũpa poroaisusa. Iyacatu rumo peyapora evocoi mbahe pe porerecosa sui pe poīeh̄isa p̄ipe viña.

⁴³ “¡Peparaisu pe fariseo! Esepia, peipota pe renda porañete catu vahe pe guap̄i âgua t̄ũparo p̄ipe, iyavei peipota p̄ẽu opacatu ‘av̄irave’ oyapora ava pe mboeteisave ocar rupi yuv̄ireco.

⁴⁴ “¡Peparaisu! Esepia, pe recocuerai inungar teh̄öḡüer ruv̄ipa icuaeh̄ise ava oguata ihari rupi yuv̄ireco” ehi chupe.

⁴⁵ Evocoyase Moisés porocuaíta rese oporombohe vahe,

—Porombohesar —ehi—, aipo eremombehu vahe pīpe niha ava ore amotarêhiño yuvireco —ehi.

⁴⁶ Ahe rumo aipo ehi:

—¡Peparaisu avei pe Moisés porocuita rese oporombohe vahe! Esepia, pemondo porocuita yavai vahe ava upe; pe rumo evocoyase ndapeipĩtivimi eté ahe ava imboaviye ãgua rese yuvireco.

⁴⁷ “¡Peparaisu! Esepia, pemoingatu Tūpa ñehe mombehusar ruvipagüer peico Tūpa mboeteisa angahu pīpe tēi. Pe ramoi teieté rumo oyuca yuvireco. ⁴⁸ Evocoyase pemboyecua co pe ramoi eta pihañemoñeta agüer secocuer moña pīpe peico. Esepia, ahe oyuca Tūpa ñehe mombehusar yuvireco. Pe evocoyase cūrítei pemoingatu vite suvipagüer peico.

⁴⁹ “Sese Tūpa ombahecuasa pīpe aipo ehi: ‘Amondora che ñehe mombehusar, apóstol avei ndiporeroyai vahe upe. Ahe ipāhu pendar oyucara yuvireco. Iyavei ambuae mara-mara tēi virecora yuvireco’ ehi. ⁵⁰ Esepia, ava ndiporeroyai vahe cūríteindar upe ité omondora oñemoirosa opacatu oñehe mombehusar yucagüer rese aracahe suive, cūríteindar avei oyucase yuvireco. ⁵¹ Abel yuca agüer suive oyepotara Zacarías yuca agüerve oso. Ahe oyuca tūparo maranehi rocar mbahe reropovêhesa rovai. Supi eté aipo ahe pēu: Tūpa opara omondo oñemoirosa ahe yuca agüer rese ava ndiporeroyai vahe cūríteindar upe curi.

⁵² “¡Peparaisu pe Moisés porocuita rese oporombohe tēi vahe! Esepia, pe mbahecuasa aviye soquendapri pereco ava sui. Pe niha ndaperoyai,

iyavei ambuae ava upe ndapeipotai seroya ãgua” ehi chupe.

⁵³ Ipare Jesús osẽ oso ichui. Ahese Moisés porocuita rese oporombohe vahe iyavei fariseo eta oñemoiró iteanga yuvireco sese. Ahe omañeco tẽi, oporandu-randu mbahe rese yuvireco chupe, ⁵⁴ osecõãha-ãha tẽi mbahe pipe ‘toyavi angahu oñehe yandeu’ ohesa pipe yuvireco.

12

Fariseo recocuer rese Jesús oñehe

¹ Ahe pipeve avei ava oñemonuha atí iteanga oyemboti tupri oyemombo guasu-guasú yuvireco. Yipindar Jesús güemimbohe upe rane omboipi oñehe: “Peñearo tupri fariseo pan mboapeposa nungar sui. Esepia, ahe ndoyavii supi tupri vahe viña; ndahei eté rumo. ² Esepia, yaposá vahe imombehupirẽhi cūrítei icuasaño itera curi. Iyavei mbahe ñomipri icuasaño aveira no. ³ Supi eté opacatu mbahe pemombehu vahe pĩtumimbisave, ahe sendusa tupriara ari pipe coiye; iyavei acoi mbahe pemombehu vahe peyeupeñomi ‘tosendu eme ambuae ava’ pe hesa pipe, serosapucaisara oi harive opacatú ava rovaque” ehi.

¿Uma sui pĩha siquiyesara?

⁴ “Iyavei aipo ahe pẽu, che mboripareta: ndapesiquiyei chira acoi ava pe yuca potasar sui. Esepia, ipare ndoicatu iri ambuae mbahe apo ãgua pẽu. ⁵ Che rumo amombehura pẽu uma sui pesiquiyera: acoi oicatu vahe omborerecuasa

pípe pe yuca pare pemondo tata guasuve. Ahe ichui eté pesiquiyera.

⁶ “Pe pemondo poyandepo v̄irai ñuvirío guarepochi rupivemi t̄ei yepi. T̄upa rumo ndasesarai eté que ñepeí sui. ⁷ T̄upa niha oícua ñepeí-peí yande ha retacuer. Sese, pesiquiye eme; pe niha ivate catu vahe ité peico opacatu v̄irai sui” ehi.

“Che aroya ité Jesucristo” ehi vahe opacatu ava rovaque

⁸ “Acoi ava ‘che aroya Jesús’ ehi vahe opacatu ava rovaque, che avei, Ava Riqueh̄ir, ‘Co che reroyasar secoi’ aipo ahera che Ru upe sembiguai rovaque. ⁹ Acoi ava ‘che ndaroyai Jesús’ ehi vahe rumo cheu opacatu ava rovaque, che avei evocoyase, ‘Co ndahei che reroyasar secoi’ ahe aveira che Ru T̄upa upe sembiguai rovaque” ehi.

¹⁰ “Iyavei opacatu oñehe-ñehe t̄ei vahe che, Ava Riqueh̄ir, rese, ahe chupe oimeño ñeroisa. Acoi que ava iñehe-ñehe t̄ei vahe rumo Esp̄iritu Santo amotar̄eh̄isave, ahe chupe ndipoi chietera ñeroisa” ehi.

¹¹ “Acoi pe amotar̄eh̄isar che recocuer sui t̄ei pe rerasose porandusave pe recoãha ãgua yuvireco, anise mborerecuar mbahe moingatuser rovai, que ambuae mborerecuareta upe avei no, ‘¿Mbahe p̄iãha amombehura?’ ndapeyei chira. ¹² Esepia niha, ahe pípeve voi Esp̄iritu Santo pe mbohera aviyeteramo t̄ei mbahe mombehu ãgua rese” ehi güemimbohe eta upe.

Ñearosa mbahe pota raisa sui

¹³ Ñepeí mb̄ia ava reh̄i p̄ãhu pendar aipo ehi Jesús upe:

—Porombohesar, emombehumi che riquehir upe, tomboyahomi tēi mbahe che mombahesa cheu —ehi.

¹⁴ Ahe rumo omboyevī chupe:

—Che mborīpar, che ndachecuitai mbahe moingatu āgua, mbahe mboyaho-yaho āgua avei —ehi ahe mbīa upe.

¹⁵ Ipare aipo ehi:

—Peñearo tuprī opacatu mbahe pota raisa sui. Esepia niha, ndahei mbahe rereco atī āgua pe recocuer —ehi.

¹⁶ Ipare omboyoya ambuae mbahe rese imbohe: “Oime mbīa mbahe yar, iha tuprī ai eté semiti.

¹⁷ Ahese ipihañemoñeta oico oyeupe: ‘¿Mara ahera pīha che rembipoho rereco?’ ehi tēi. ‘Ndareco iri eté yapocatu āgua’ ehi. ¹⁸ Ipare ipihañemoñeta

cute: ‘Aicua mbahe che rembiaporā. Opara aroyī tembihu rēta. Ichui ayapo irira ambuae tuvichá catu vahe. Aheve ayapocatura che remiti rāhii opacatu mbahe areco vahe avei no. ¹⁹ Evocoyase

aipo ahera cheyeupe: Che mborīpar, oime setá mbahe cheu araviter momba-momba āgua; sese cūrītei apīuhura vichico, acarura, acahura iyavei ayemboviharetera no, ahera’ ehi. ²⁰ Tūpa rumo

aipo ehira chupe: ‘Mbīa, nandearacuai eté eico, co pītu pipeve voi eté eremanora. Co mbahe nde rembiapocatu, ¿ava mahera pīha evocoyase?’ ehira chupe. ²¹ Ēgüe ehi eté niha que ava oye-

upeñomi tēi mbahe omonuha atī vahe, iparaisu rumo Tūpa rovaque” ehi ahe mbīa upe.

Tūpa osãro opacatu guahir

²² Ipare aipo ehi Jesús güemimbohe upe: “Co amombehura pẽu: Ndapeyemomahenduha guasu ai chira pe remihura rese pe recove ãgua, pe turucuarã rese tẽi avei no. ²³ Yande recovesa rumo aviye catu vahe tembihu sui; yande retecuer avei aviye catu turucuar sui no. ²⁴ Pesepia vırai: nomaheti vahe, nomonuhai vahe avei, ndovirecoi vahe avei mbahe rãhii rẽta yuvireco. Tũpa rumo omoime mbahe itohu. ¡Pe rumo ivate catu vahe ité peico vırai sui! ²⁵ Ndipoi eté que ñepepe pe pãhu pendar oicatu vahe opıhañemoñetá iteangasa pıpe tẽi güecocuer mbosasaviño ãgua. ²⁶ Supi eté ndapeicatuisse yapo, ndiyai peyemomahenduha guasu ai mbahe rese.

²⁷ “Pemahecua ru mbahe potrı caha pıpendar rese: ndoporavıquii eté iyavei ndoıpıai oturucuarã. Iyavei no yepe mborerecuar guasu Salomón vıreco setá mbahe iporañete vahe aracache viña, iturucuar catuprıgüer rumo ndahoyoyai mbahe potrı catuprıgüer rese. ²⁸ Tũpa niha omboporañete raimi tẽi mbahe potrı caha pıpendar. Ichui sapısapaño horno pıpe. ¡Ahe rumo omondo catura turucuar pẽu, pe ava nimbahe reroya tuprıi vahe! ²⁹ Sese, ‘¿Mbahe pıha yahura, mbahe pıha yamondera?’ ndapeyei chira pe yemomahenduha guasu aisa pıpe. ³⁰ Esepia, ava Tũpa reroyasarẽhi co ivı pıpendar aipo nungar mbahe reseño tẽi ipıhañemoñeta yuvireco yepi. Pe Ru Tũpa rumo oicua ité pẽu mbahe ipane vahe. ³¹ Aviye catu rumo pesecara pe Yar Tũpa povrıve pe reco ãgua, ahese omboura que mbahe ipane vahe pẽu” ehi.

Ivave mbahe eta oime vahe yandeu

³² “Aní pesiquiye, che ovesa nungar, yepe pe moviromi tēi peico viña, pe Ru rumo oporoaisusa pipe oipota opovrive pe rereco ãgua. ³³ Pemonropa mbahe pereco vahe ava oipota vahe upe. Ipape pemondo sepri avei iparaisu vahe upe. Ahe yapocatusa ivave mbahe riru ndituyui vahe nungar pipe. Aheve ava imonda rai vahe ndoiqei chira ñomi ãgua pe sui iyavei mbahe rasoí nomomaraí chiaveira. ³⁴ Esepia, pe mbahe pe rembiereco setá catu vahesa rupi-rupi pe pihañemoñeta yepi” ehi.

Peyemoingatu Tũpa Rahir yevi ãgua

³⁵ “Peyemoingatu tupri che yevi ãgua. Inungar tataendi ndogüei vahe, pemboyecua tupriño ité che recocuer pe recocuer pipe ava upe. ³⁶ Peico imboacuapri güerecuar osãro vahe nungar mendasa sui iyevise, oquenda imotase, omboi voi vahe yuviereco chupe. ³⁷ Aviye itera serecuar upe osepiase iyemoingatu voi; evocoyase serecuar ae niha ihañecora sese, omboguapira mesave imbocarú. ³⁸ Yepe serecuar oyepotara pĩtu mbiter ou viña, anise añihiveive, ahe rumo osãroño itera chupe imboi ãgua yuviereco. Evocoyase serecuar aviye ai etera chupe. ³⁹ Peyapisaca tupri co rese: acoi oi yar oicuase mbahe hora imonda vahe yepota ãgua, ahese opitara imonda vahe rãro güeta pipe sui mbahe renoseẽhi ãgua. ⁴⁰ Ëgüe peye aveira peyemoingatu che yevi ãgua. Esepia niha, che, Ava Riquehir, aporoesapiha tẽira vitu curi” ehi Jesús viroyasarefa upe.

Mbiguai omboaviye vahe ocuaita iyavei nomboaviyei vahe

⁴¹ Evocoiyase Pedro oporandu Jesús upe aipo ehi:

—Che Yar, ¿oreuñomi pñha eremombehu co porombohesa eremboyoya vahe ambuae mbahe rese, opacatu upe tie? —ehi.

⁴² Evocoiyase omboyevî Pedro upe aipo ehi: “Acoi ava mbahe rese ñangarecuar omboavîye tupri vahe ocuaita, yaracua vahe avei, ahe chupe serecuar oseya icuaitarã güêta pipendar rese hañeco ãgua ‘tembihu tomondo che rêta pipendar upe che porocuita rupi’ ohesave. ⁴³ Acoi omboavîyese ocuaita, ahese oviharetera güerecuar yevise. ⁴⁴ Supi eté niha, serecuar oyocuairea opacatu ombahe rese hañeco ãgua. ⁴⁵ Ahe mbiguai rumo ‘ndoyepota vîtei chira revo che rerecuar’ oya omboetasa cuimbahe iyavei cuña omboipi mara-mara tõi sereco iyavei ocaru, oiuhu tõi osavaipo-ipoño avei oico. ⁴⁶ Ipare rumo serecuar oyepotara imahemohaêhiseve; ahese omombaraisu catura inupa sereco, inungar acoi ndiporeroyai vahe rerecosa yepi” ehi.

⁴⁷ “Acoi mbiguai oicua tõeise mbahe güerecuar remimbotar, noyemoingatuisse rumo iyavei ndoviroyaise oico, ahe evocoiyase serecuar oinupara. ⁴⁸ Acoi mbiguai nomboavîyei vahe ocuaita icua tupriêhisa pipe, nañemoirosa rutei chira chupe. Esepia niha, acoi imondosa catu vahe icuaitarã, porandusa catura chupe. Acoi oyeroya catu vahe, oporandu catu aveira sese” ehi.

Jesús reroyasa pipe sui oimera yeamotarêhisa

49 “Che ayu tata nungar yavai vahe reru ãgua co ivi pipendar upe ‘joyandu tarahu yuvireco cute viña!’ viya. 50 Aique ranera rumo mbahe tẽi che recoãhasa pipe, jẽgũe ahera che paraisú itera imboaviye ãgua! 51 ‘Mbahe tupri ai revo güeru co ivi pipe’ ndapeyei chira cheu. Ëgũe ehi rumo che ayu che sui ava yeamotarẽhi ãgua. 52 Esepia niha, co pipe suive ité que poyandepo tupri revo oñemu yuvirecoi vahe amove oyeamotarẽhira yuvireco che recocuer sui: mbosapi oyamotarẽhira ñuvirio vahe, ñuvirio vahe evocoiyase oyamotarẽhira mbosapi vahe yuvireco. 53 Que ava oyamotarẽhira guahir, anise tahir evocoiyase oyamotarẽhira vu; cuña oyamotarẽhira omembri, imembri evocoiyase oyamotarẽhira osi; sovayar oyamotarẽhira vovayar” ehi güemimbohe upe.

Iva pendar poromondiisa mboyecuasa

54 Ipare Jesús aipo ehi ava rehii upe: “Pe pesepiase mbahe pĩtu ari sosa coti sui opũhase, ahese, ‘Oquira’ peye. Ëgũe ehi eté oqui. 55 Iyavei acoi ivitu oipeyuse irohi coti sui, ahese, ‘Sacú iteangara’ peye. Ipare ãgũe ehi eté. 56 ¡Pe Tũpa reroyasar angahu tẽi peico vahe! Pe niha peicua mbahe iva rese oyecua vahe tẽi iyavei ivi rese mbahe oyecua vahe tẽi mombehu, ¡mahera ru ndapeicuai peyeupe mbahe cũritei oime vaherã mombehu peico!” ehi.

Peñero pe amotarẽhimbar upe

57 “¿Mahera napesãha ranei pe ae ité co mbahe supi eté vahe? 58 Acoi que ava nde amotarẽhisar nde soho ucase nde mondo ãgua mborerecuar

rovai, emoingatu tupri voi mbahe eico chupe tenondeve nde rerasoēhi ãgua sovai; anise, mborerecuar nde mondora ava naporai vahe rarõsar upe. Ahe evocoyase nde roquendara. ⁵⁹ Supi eté nderesēi chietera acoi eremboepipase voi eté eresēra ichui” ehi ava rehi upe.

13

Aviye catu ité yañecuñaro

¹ Ahe pipave avei yuviraso ava Jesús repia. Ahese omombehu Pilato mbia Galilea pendar yuca uca agüer: Ahe mbia viropovēhese mbahe mimba yucapri yuvireco chupe. Ahe suvi oyeseha mbahe mimba ruvi rese.

² Ipare Jesús aipo ehi chupe: “Pemoha cope: Mbahe tēi oime vahe evocoi mbia Galilea pendar upe, yangaipa guasu catu rese ambuae güecua pendar sui ēgüe ehi mbahe chupe viña.

³ ¡Aní rumo! Acoi ndapemboasiise pe angaipa Tũpa upe pe yevi ãgua, pe avei opara pecañi tēi.

⁴ Peroya avei acoi ava dieciocho tupri yuvirecoi vahe omanopase Siloé torre oviapise iharive, ‘Ahe yangaipa catu yuvireco ambuae ava Jerusalén pipendar sui’ peye viña no. ⁵ Aní rumo; acoi ndapemboasiise pe angaipa Tũpa upe peyevi ãgua, pe avei opara pecañi tēi” ehi.

Yembohesa ivira higuera ndihai vahe resendar

⁶ Evocoyase Jesús omombehu mbahe omboyoya oporombohe ambuae mbahe rese aipo ehi: “Oime mbia viresco vahe ivira higuera oco pipe. Setá ari ahe oso sepia ‘¿iha pĩha?’ oyapave. Ndosecai eté rumo iha sese. ⁷ Ahese aipo ehi mbia oco

rãrosar upe: ‘Esendu, che ayu p̄ihi t̄ei higuera ha reca mbosap̄i arav̄iter rupi. Ndasep̄iai eté rumo que ñepēi iha sese yep̄i’ ehi. ‘Eyasiapa; ndiyai ihã̄i tupr̄i t̄ei cohave’ ehi. ⁸ Ico rarõsar rumo omboyevēi chupe aipo ehi: ‘Che rerecuar, êḡüe tehiño vite t̄ei rane co arav̄iter; amonguhira iv̄i chupe. Ipare amondora iv̄i sũ vahe mbahe repochi resendar sese. ⁹ Ahese revo ambuae arav̄iter ihara cute; anise ité rumo, ereyas̄ia ucaño itera’ ehi ico rãrosar güerecuar upe” ehi Jesús ava mbohe.

Jesús ombogüera cuña oyecuhapami vahe mbituhusa ari pipe

¹⁰ Ñepēi mbituhusa ari pipe Jesús oporombohe judío tũparo pipe. ¹¹ Aheve oime cuña imbaheasi vahe, dieciocho arav̄iter rupi ahe mbaheras̄isa v̄ireco, caruguar t̄ei omboyeapami uca sereco. Sese ndoicatui opũha tupr̄i oguata. ¹² Osepiase rumo Jesús, “Erio” ehi chupe.

—Cuña, cũritei nanembaheasi iri eico cute—ehi.

¹³ Evocoiyase omondose opo sese, aheseve voi cuña oyemoh̄ivi. Ipare omboetei Tũpa oico. ¹⁴ Judío tũparo rerecuar rumo oñemoiro ahe cuña mbogüerasa rese mbituhusa ari pipe. Sese aipo ehi ava eta upe:

—Oime niha seis ari mborav̄iqui ãgua; ahe ari pipe peyura peposano ãgua, ndahei chira mbituhusa ari pipe—ehi.

¹⁵ Evocoiyase ahe mb̄ia upe omboyevēi aipo ehi:

—Pe Tũpa reroyasar angahu t̄ei peico vahe, ¿nomboh̄ui vo pe p̄ãhu pendar acoi ḡüimba tiv̄i iyavei guaricu mbituhusa ari pipe yuv̄ireco yep̄i no? ¹⁶ Co rumo cuña, Abraham suindar Caruguar

omombaheasi vahe dieciocho araviter suive sereco, ¿ndiyai eté p̄ha evocoyase imbogüerasa mbituhusa ari pipe? —ehi tũparo pendar rerecuar upe.

¹⁷ Aipo ehise, opacatu yamotarêhisar yuvinochi t̄i yuvireco ichui. Ambuae ava rumo oyembov̄ihaño opacatu Jesús rembiapo osepiase yuvireco.

Yembohesa mostaza r̄ahi suindar

¹⁸ Evocoyase Jesús aipo ehi avei: “¿Mbahe nungar p̄ha Tũpa povri pendar, iyavei mbahe rese vo amboyoyara? ¹⁹ Oyoya tupri ité mostaza r̄ahi rese, inungar acoi mb̄ia oñoti vahe oco pipe. Ichui ocuacua, tuvichá iteanga. Ahe s̄aca rese v̄irai reh̄i oyapo guaitir̄a” ehi oporombohe.

Yembohesa pan mboapeposa sui

²⁰ Evocoyase Jesús aipo ehi iri: “¿Mbahe rese p̄ha amboyoyara Tũpa povri pendar? ²¹ Oyoya tupri co pan mboapeposa rese, acoi cuña omboyeseha tupri vahe mbosapi s̄ahambri trigo cuhi rese opacatu imboapepo ãgua yepi” ehi oporombohe.

Jesús per̄i ic̄ahimi vahe nungar

²² Ipare Jesús osoño Jerusalén ve, opita-pita tecua yacatu rupi oporombohe oico. ²³ Ahe supi ichose, ñepe mb̄ia oporandu chupe aipo ehi:

—Che Yar, ¿supi eté p̄ha moviromi t̄i ava oñep̄isirora yuvireco? —ehi.

Ahe evocoyase omboyevi chupe:

²⁴ —Peyemov̄iracua tupri catu peique ãgua oquend̄ipi c̄ahimi rupi. Esepia niha, supi eté setá ava os̄aha t̄ira yuv̄iroique vaher̄a ahe oquenda rupi yuvireco viña, ndoyuv̄iroique catui chira

rumo yuvireco. ²⁵ Supi eté ahe inungar oi yar ouse oquenda mboya viña. Amove ava evocoyase ocarve yuvirecoi vite vahe omota tẽira oquenda, ‘Ore yar, emboimi tẽi oreu’ ehi tẽira yuvireco. Ahe rumo aipo ehiñora chupe: ‘Aní, ndopocuai vahe rumo pe’ ehiñora chupe. ²⁶ Evocoyase ahe aipo ehi tẽira yuvireco: ‘Ore niha orocarua vahe, oroihu vahe nde piri, iyavei ore mbohe ore rocar rupi eve yepi’ ehi tẽira yuvireco chupe. ²⁷ Ahe rumo aipo ehira: ‘Ñepeí reseve niha acoi, Ndopocuai vahe, ahe pẽu. ¡Pesiri che sui, pe opacatu mbahe-mbahe tẽi aposar!’ ehiñora chupe. ²⁸ Pe rumo imomboprira pe recocuer Tũpa povri sui, sese peyaseho tẽira, peyemoaitere tẽira peico pesepiasé Abraham, Isaac, Jacob iyavei opacatu Tũpa ñehe mombehusareta yuvirecoise Tũpa povrive ivave. ²⁹ Iyavei ava yugüerura añihivei coti sui, caharu coti sui, norte coti sui iyavei irohí coti sui, ahe evocoyase yuviroguapira ocaru Tũpa mborerecuasave ipiri yuvireco. ³⁰ Supi eté amove ava ndoyavii ipa tẽi vahe seique ãgua ivave Tũpa piri viña, ahe ranengatu rumo yuviroiqueño itera ipipe iyavei amove ava tenonde catu vahe ndoyavii ahe rane oique vaherã ivave viña. Ahe rumo ipa tẽi yuviroiquera —ehi Jesús ava rehii upe.

Jesús oyaseho Jerusalén pendar rese

³¹ Ahe ari pĩpe oyepota moviro fariseo aipo ehi tẽi Jesús upe yuvireco:

—Eyepipiño ave sui. Esepia, Herodes niha nde yuca pota oico —ehi tẽi yuvireco chupe.

³² Ahe rumo,

—Peso, tapemombehu aipo mbia aguara nungar tēi upe: ‘Esepia, co pipe iyavei ayihive amboyepepiñora ava sui carugareta vichico, ambogüerañora ava imbaherasisa sui, curi ayihive evocoyase amombara che cuaita’ peyera. ³³ Che rumo aporaviquiño itera co pipe, ayihive iyavei curi ayihive vichico. Ipare asora Jerusalén ve. Esepia niha, ndiyai Tūpa ñehe mombehusar omano co coti tēi Jerusalén sui yuvireco —ehi.

³⁴ “¡Too rutei pe Jerusalén pendar, peyuca vahe Tūpa ñehe mombehusar, iyavei ita pipe peyapiyapi ava Tūpa remimbou yepi! ¡Setá rupi che opomonuha pota tēi pe rereco, inungar tacura omonuha vahe omembri opepovrive, ēgüe ahe pota tēi pe rereco viña, pe rumo ndapeipotai eté! ³⁵ Sese seyapirã tēi peicora. Iyavei ndache repiai chiaveira peye acoi, ‘Imboeteipri Yar remimbou tasecoi’ peyese voi che repia irira peye” ehi Jerusalén pendar upe.

14

Jesús ombogüera mbia iruru sui

¹ Ñepeí mbituhusa ari pipe Jesús oso ocaru mborerecuar fariseo rêtave. Aheve ambuae fariseo eta oiviro yuvireco. ² Aheve avei mbia iruru vahe secói. ³ Evocoyase Jesús oporandu Moisés porocuita rese oporombohe vahe upe iyavei fariseo eta upe avei aipo ehi:

—¿Ipotasa vo mbituhusa ari pipe imbaheasi vahe mbogüera āgua; aní tie? —ehi.

⁴ Ahe rumo noñeheiño yuvireco chupe. Aheve ahe opoco imbaheasi vahe rese, ombogüera.

Ipare, “Eso tupriño” ehi chupe. ⁵ Fariseo eta upe evocoyase aipo ehi:

—¿Ava pñha pe pñhu pendar novinose voi chira güeimba guaricu, anise tñvi oviapise ivicuar pipe mbituhusa arí pipe viña? —ehi.

⁶ Ahese nomboyeví catui eté iñhehe yuvireco chupe.

Jesús ombohe mendasave ichohopri yuvireco

⁷ Ava ichohopri oiporavo-ravo güenara imboyeroyapri catu vahe mesave oyeupe nara yuvireco. Ahe sepiase aipo ehi Jesús imboaracua:

⁸ —Acoi que yande soho ucase mendasa pietasave yuvireco, ndayaguapi chira ava imboeteipri catu vahe renda harive. Esepia, aviyeteramo que ambuae ava ichohopri oyepotara yande sui imboeteipri catu vahe yuvireco. ⁹ Ipare yande soho ucasar aipo ehira yandeu: ‘Epñha evocoi sui, co mbia toguapi eipeve’ ehira yandeu. Evocoyase yande yachí tñira yaso ipami tñi yaguapi. ¹⁰ Yande soho ucase rumo yuvireco, yaguapira evocoyase ipa; yande soho ucasar ouse, aipo ehira yandeu: ‘Mbori, erio cohava tenda imboeteipri catu vahesave ore piri’ ehira. Ëgüe yahera imboeteipri yaico acoi ava yuviroguapi vahe rovaque yande piri. ¹¹ Esepia niha, acoi ava oyemboivate ai vahe opara seco reroyisa; acoi ava seco mbegüe vahe rumo, ahe seco mboivate catusara curi —ehi.

¹² Ipare aipo ehi avei ichohosar upe:

—Ereyapo potase pieta, ndereichoho ucai chira nde mboripar, que nde rivri, que nde mu iyavei

que nde rēta cotindar imbahe eta vahe. Esepia niha, ahe omboyevira ndeu, nde soho ucara oyepiri yuvireco; ēgüe ehira evocoyase mbahe imboyevipa yuvireco ndeu. ¹³ Ereyapose rumo pieta, ereichoho ucara ava iparaisu vahe, ava ipo ichutu vahe, anise ipi chutu vahe, ipāripāri vahe, ndasesapiso vahe avei. ¹⁴ Esepia niha, ahe ndoicatu mbahe mboyevi yuvireco ndeu. Opase rumo ocuerayevi ava seco catupri vahe yuvireco, ahese ereviharera eico. Esepia, ereipisira mbahe aviye vahe Tūpa suindar —ehi.

Jesús oporombohe carusa rese

¹⁵ Ñehe renduse rumo, ñepei mbia yuviroguapi vahe mesave, ahe aipo ehi Jesús upe:

—¡Sovasapri catu ava Tūpa piri ocaru vahe imborerecuasave! —ehi.

¹⁶ Evocoyase aipo ehi ahe mbia upe:

—Oime mbia oyapo vahe carusa guasu, oichoho uca ava setá oyepiri. ¹⁷ Ipare oyepotase ari caru āgua, ahese aipo ehi güembiguai mondo: ‘Toyugüerupa che piri ichohopri. Esepia niha, mbahe opa oingatu cute’ ehi. ¹⁸ Opacatu rumo ava, ‘Eñemosañomi tēi cheu’ ehi pāve yuvireco. Yipindar mbia aipo ehi: ‘Che rumo arocuā ivi; iya ité aso sepia. Sese eñemosañō cheu’ ehi chupe. ¹⁹ Ambuae mbia aipo ehi: ‘Che arocuā ramo diez tupri tivī, ahe asāha ranera. Sese eñemosañō cheu’ ehi chupe. ²⁰ Ambuae aipo ehi no: ‘Che amenda ramomi vichico. Sese tēi ndasoī chira’ ehi. ²¹ Oyevisē mbiguai, opa tupri omombehu mbahe güerecuar upe. Ahese serecuar aipo ehi

oñemoirosa pipe güembiguai upe: ‘Eso voi evocoyase opacatu ocar rupi. Supi sui eru ava iparaĩsumi vahe, que ava ipo chutu vahe, anise ipi chutu vahe, que ndasesapĩsoi vahe, anise que ava ipãri-pãri vahe avei no’ ehi. ²² Coiye ava reru pare aipo ehi mbiguai güerecuar upe: ‘Che rerecuar, aroya ité nde che cuaita; ipane vite rumo ava’ ehi. ²³ Evocoyase aipo ehi güembiguai upe: ‘Eguata iri ambuae peri tecua ivirindar rupi avei toyugüerumi che rêtave yuvireco che piri, tomboapipopa ité che rêta yuvireco’ ehi. ²⁴ ‘Esepia niha, acoi yipindar ava aichoho uca vahe ndipoi chietera que ñepeĩ ocaru vaheĩ che piri’ ehi güembiguai upe —ehi Jesús ahe mbia mbohe.

Yavai Cristo rupi guata ãgua

²⁵ Ava rehĩ Jesús raquĩcui guata yuvireco. Sese ahe oyemboyere aipo ehi ava upe: ²⁶ “Acoi oimese que ava oipota vahe che rupi uguata ãgua, tache raisu catu que ambuae ava sui, que oyesupa, osi, güembireco, guahireta, vireta iyavei güeindireta sui, oyesui avei. Ëgüe ndehise, evocoyase ndiyai chupe che remimbohe seco ãgua. ²⁷ Iyavei que ava noñemosañoi vahe mbahe-mbahe tẽi upe oiporarase ari yacatu rupi inungar-ra ocurusu rese ovosi vahe viña che rupi uguata ãgua, ahe chupe ndiyai che remimbohe seco ãgua” ehi. ²⁸ “Que ava pe pãhu pendar omopuha potase oi, ¿ndoyapĩsaca ranei chira ‘¿amomba angara pĩha?’ oyapave? ²⁹ Esepia niha, omondose oi renara yipindar. Ipare rumo nomboaviye catuise, ahese opacatu ava sepiase viroĩrora ³⁰ aipo ehira yuvireco: ‘Aye evocoi mbia omopuha pota tẽi

oi viña, ndoicatuí eté rumo imboaviye' ehira yuvireco chupe. ³¹ Iyavei que mborerecuar guasu diez mil sundao vireco vahe oyeepe potase ambuae mborerecuar veinte mil ava vireco vahe sui, oyapisaca ranera yipindar icua tupri água '¿yaicatura pîha setá catu vahe rese yavava?' ohe-save. ³² Esepia, ndoicatuise, evocoyase ambuae mborerecuar guasu amombri vite secoise, omondora mbahe mombehusar mbahe tupri rese porandu água chupe. ³³ Ëgüe ehi avei pe recocuer ndapeseya potaise pe mbahe opacatu, ëgüe ehi vahe ndahei eté che remimbohe" ehi.

Yande recocuer inungar yucrí

³⁴ "Yucrí aviye vahe ité yandeu; nasehe irise rumo, ndayaicatuí chietera imoehe iri água. ³⁵ Naporai eté ivi upe nara; ndiyai avei ivi mbahe repochi resendar rese oyeseha vaheã. Evocoyase ahe imombopri tõi vaheã. Sese aipo ahe acoi ava oyapisaca pota vahe, toyapisacaño" ehi.

15

Porombohesa ovesa ocañi tõi vahe resendar

¹ Opacatu ava sui guarepochi rerocuasar yuvirecoi vahe iyavei ava eta yangaipa guasu vahe, oyemboya Jesús rese iñehe rendu água yuvireco. ² Sese fariseo yuvirecoi vahe iyavei Moisés porocuita rese oporombohe vahe yuvireco, ahe oviroïro tõi yuvireco aipo ehi:

—Co mbia ombori pota rai ava yangaipa guasu vahe tõi oico yepi, ocaru avei ipãhuve no —ehi.

³ Evocoiyase Jesús omombehu ovesa resendar yembohesa: ⁴ “Que ñepei pe pãhuve virecose cien ovesa güeimba, ipare co ocañira ñepei ichui viña, oseyá ranera evocoiyase evocoi noventa y nueve tēi aviye vahesave seco āgua. Ipare oyevira ocañi vahe reca oso, oyosu rane itera viña. ⁵ Oyosuse, osupira oachihive vorivetesá pipe. ⁶ Ipare oyepotase güētave, omonuhara omboripareta, ocotindareta avei no. Ipare aipo ehira chupe: ‘Yayembovihara che piri. Esepia niha, ayosu ité ovesa ocañi vahecuer cute’ ehira. ⁷ Supi eté ēgüe ehi aveira oime torivetesá guasu catu ivave acoi ñepei ava yangaipa guasu vahe oñecuñarose güecocuerai sui noventa y nueve yuvirecoi tupri vahe sui yuvireco” ehi.

Yembohesa guarepochi ocañi vahe resendar

⁸ “Acoi que cuña omocañise ñepei guarepochi diez tupri vireco vahe sui, omoendira tataendi. Ipare osahuvara oi, oseca mbegüera, oyosu rane itera. ⁹ Evocoiyase oyosuse, omonuhara omboripareta, ocotindareta avei no chupe aipo ehira: ‘Yayembovihara che piri. Esepia niha, ayosu guarepochi che sui ocañi vahecuer cute’ ehira. ¹⁰ Supi eté ēgüe ehi aveira oime torivetesá Tūpa rembiguai iva pendar rehi upe que ñepei ava yangaipa guasu vahe oñecuñarose güecocuerai sui” ehi.

Yembohesa mbia rahir ocañi vahe resendar

¹¹ Aipo ehi avei oporombohe: “Oime mbia vireco vahe ñuvirío guahir. ¹² Chihivahe catu vahe aipo ehi oyesupa upe: ‘Che ru, embou mbahe che mombaesa cheu’ ehi. Iyesupa evocoiyase

omboyaho ombahe imondo chupe. ¹³ Ipare coiye catumi, omonuhapa opacatu ombahe. Ichui oso amombri ambuae tecuave. Aheve oguarepochi oiporupa tēi ombahe pota raisa pipe. ¹⁴ Acoi oiporupa tēise rumo opacatu ombahe, ahese oime tiavor ahe ivi rupi. Ahe evocoiyase ndasiepoi tēi oico. ¹⁵ Evocoiyase oso mboraviqui reca mbia piri aheve. Ahe mbia evocoiyase omondo ocove güeimba cuchi rāro āgua. ¹⁶ Aheve oyemohitaro pota tēi cuchi rembihi pipe oico viña. Ndipoi eté rumo omondo vahe chupe. ¹⁷ Evocoiyase oye-momahenduha tēi güēta pendar oporaviqui vahe rese: ‘¡Che ru rētave oporaviqui vahe rumo co omoumbire guasu-guasú tēi güembihu yuvireco! ¡Che rumo che yuca pota tēi che rieporēhi che rereco cohavel’ ¹⁸ Sese ayevíra che ru rētave. Aipo ahera chupe: Ayemboangaipa Tūpa rese, nde rese avei no. ¹⁹ Ahese che ndahe iri chira nde rahir nungar aico; iyacatu revo ndeu, oporaviqui vahe nungar tēi che rerecoñora eve, ahera’ ehi. ²⁰ Evocoiyase oyeví iri oso vu rētave cute.

“Amombri vitemi tahir recose rumo iparaisu catu chupe, oña voi oso guahir rovaichi, oyaco osovaupite avei. ²¹ Ahese tahir aipo ehi chupe: ‘Che ru, ayemboangaipa Tūpa rese, nde rese avei; ndiya iri nde rahir che reco āgua’ ehi. ²² Tu rumo aipo ehi güembiguai upe: ‘Peso, taperumi aviye catu vahe turucuar pemboyemonde, pemonde avei cuã penda sese, pitaqui avei. ²³ Iyavei guaca iquirá catu vahe peyuca. ¡Yayapora pieta guasu!’ ehi. ²⁴ ‘Esepia, co che rahir aviye omano vahe secoi viña, cūrítei rumo oyeví iri cheu’ ehi. Ëgüe ehi

opacatu sorivete yuvireco pieta apo.

²⁵ “Tahir cuacua catu vahe rumo ocove vite secói. Oyevise ou güêta rerovicave, osendu voi ipieta guasu vahe yuvireco. ²⁶ Evocoiyase oporandu mbiguai upe mbahe oime vahe rese. ²⁷ ‘Nde rivri mo co oyevî tupri iri ou. Sese nde ru oyuca uca guaca iquira vahe iyevîsa resendar’ ehiño. ²⁸ Evocoiyase tiqehîr oñemoirosa pipe, ndoique potai oyesupa uve oi pipe; tu rumo osêño ité ocarve ‘eique’ oya chupe. ²⁹ Evocoiyase tahir omboyevî chupe aipo ehi: ‘Che niha setá araviter rupi oropîtivîi vichico nde mboyeroyasave viña, nderemboumi eté rumo que mbahe cheu, que mbahe mimba angara viña che mborîpar rese ore pieta âgua’ ehi vu upe. ³⁰ ‘Indó, cûritei oyepota ndeu nde rahîr, omocañî tēi vahe nde guarepochi cuña ndipîhai vahe rese tēi. Ahe eremboetei catú che sui; ereyuca uca rutei guaca iquira vahe chupe’ ehi.

³¹ “Evocoiyase tu: ‘Eyapisacaño, che rahîr, nde niha nderesîrii vahe che sui. Opacatu che areco vahe rumo nde mbahe ité yepî. ³² Cûritei rumo iyacatu ité yande rorîvetesave yayapora pieta. Es-epia, co nde rivri ocañî tēi vahecuer rese yamahe iri’ ehi guahîr upe” ehi Jesús ava eta mbohe.

16

Mbahe yar mbahe rese ñangarecuar ndoyemboaracuai vahe resendar yembohesa

¹ Jesús aipo ehi avei güemimbohe eta upe: “Oime mbîa imbahe eta vahe. Ahe vireco mbîa ombahe eta rese ñangarecuar. Ahe chupe ava yugüeru

mbahe mocañi tēi agüer mombehu. ² Evocoyase serecuar ñepei opitiviisar omondo seca, ahe güeruse, ‘¿Mbahe vo aipo ereyapo eico; ayandu cūrítei nde rerācua? Emoingatupa tupri voiño nde poraviquisa resendar cheu’ ehi, ‘Nandehañeco iri chira cohava mbahe rese cheu’ ehi, ‘Nandehañeco iri chira cohava mbahe rese cheu’ ehi chupe. ³ Evocoyase mbahe rese ñangarecuar: ‘¿Mara ahera pīha co evocoyase vichico imombopri che recose che poraviquisa sui? Ndareco iri rumo pīratasa cheyese ivi rese che poraviqui āgua. Achī eteanga aveira rumo mbahe rese che porandu āgua’ ehi tēi. ⁴ ‘Aicua rumo cute mara ahera vichico: che poraviquisa sui opa che momboise, oimera che pisi tupri vaherā oyepiri’ ehi. ⁵ Evocoyase oñehe ñepei-peí güerecuar sui mbahe vinose tēi vahe rese chupe. Yipindar vahe upe oporandu: ‘¿Mbovi mbahe erenose tēi yande rerecuar sui?’ ehi. ⁶ ‘Cien tupri chereve aceite siru tuvichagüe vahe rese’ ehi. Evocoyase, ‘Eguapiru, co oime cuachiar sesendar nde yecuachía agüer. Emondo, eyapo iri ambuae cincuenta rupindar año’ ehi chupe. ⁷ Ichui ambuae mbahe vinose tēi vahe upe oporandu no: ‘¿Mbovi mbahe vo erenose tēi yande rerecuar sui?’ ‘Cuatro ciento quintar rupindar’ ehi. Evocoyase, ‘Co oime cuachiar sesendar. Yaicuachiaro rumo tresciento veinte quintar rupindar’ ehi. ⁸ Evocoyase serecuar oyanduse, ‘Too, oicua ité mbahe apo’ ehi ombopasa rese ombahe rese ñangarecuarer ndipihai vahe upe. Esepia, ahe oyemoingatu voi oyeupe mbahe moingatu āgua. Supi eté ava ndoicuai vahe Tūpa oicua catu mbahe moingatu āgua oyeupe Tūpa

reroyasar sui.

⁹ “Sese che aipo ahe p̄eu: peiporu pe guarepochi pereco vahe co ivi p̄ipe pe mboripar reime āgua. Ichui opa t̄eise pe guarepochi, oimera pe p̄isi va-herā teco apir̄ehisave.

¹⁰ “Acoi ava mbahe tupri ch̄ihi oyapo vahe, ahe oyapo tupri catura mbahe tuvichá vahe. Iyavei acoi ēgüe ndehi vahe ch̄ihi vahe rese, ēgüe ndehi chiaveira mbahe tuvichá vahe rese.

¹¹ Evocoiyase ndapemboaviyeise co ivi p̄ipendar pe cuaita guarepochi rese, ahese ndaperecoi chira ivave mbahe rese hañeco āgua. ¹² Iyavei acoi ndapemboaviye tupriise pe cuaita ambuae ava mbahe rāro p̄ipe, ¿ava p̄iha evocoiyase omondora pe mbahe ité p̄eu viña?

¹³ “Iyavei ndipoi chietera ñepe mbiguai omboyeroya vahe ñuvirío güerecuar. Esepia, ñepei osaisu catura imboyeroya p̄ipe, ambuae evocoiyase ndoyambotai chira imboyeroya potaēhisa p̄ipe. Ēgüe peye avei ndapeicatui Tūpa mboyeroya guarepochi pota raisa p̄ipe” ehi güemimbohe eta upe.

¹⁴ Aipo ñehesa renduse, fariseo yuvirecoi vahe oguarepochi raisusa p̄ipe oviroiro yuvireco.

¹⁵ Evocoiyase aipo ehi fariseo eta upe: “Pe co ava rembiepiave pe recocuer aviye angahu pe reco viña. Tūpa rumo oicua opacatu pe p̄ihañemoñetasa. Esepia, yepe ava rovaque ndoyav̄i aviye ai vahe pe recocuer viña, Tūpa uve rumo mbahe t̄ei eté” ehi.

Mborocuaita iyavei Tūpa mborerecuasa rese ñehesa

16 “Yipisuive Moisés porocuita iyavei Tūpa ñehe mombehusar porombohesa Juan recosa rupive opa. Ichuive tupri ité rumo imombehusa ñehesa aviye vahe Tūpa mborerecuasa resendar, sese ava iquerēhi catu cūrítei aheve yuviroique vaherā.

17 “Yavai catura que ñepeí Tūpa porocuita mboaviyeēhi āgua co íva, ívi opa vaherā sui” ehi.

Jesús oporombohe mendasa sui poiēhi āgua

18 “Acoi opoi vahe güembireco sui, omendase ambuae cuña rese, ahe oyemboaguasa tēi vahe. Iyavei acoi omendase cuña omenda vahecuer rese tēi, oyemboaguasa tēi vahe avei” ehi Jesús.

Ava mbahe yar iyavei Lázaro

19 “Iyavei oime mbia mbahe yar, ahe oyemonde turucuar aviye vahe pipe oyemboetei eteanga, iyavei ari yacatu oyapo pieta opacatu mbahe rese oyemboetei aisa pipe. 20 Oime avei mbia iparaisu ité vahe Lázaro serer vahe. Ahe mbia icaracha ati vahe imboguapisa ivive imoi mbahe yar roquendipive. 21 Co mbia iparaisu catu vahe aipo ehi oyeupe, ‘Tomboumi tēi que güembihu rahicuer oviapi vahe mesa sui’ ehi mbahe yar upe viña. Aheve mbahe yar reimba cave oyemboya sese, icaracha osere yuvireco. 22 Omanose co mbia iparaisu vahe, ahese Tūpa rembiguai eta oviraso yuvireco Abraham piri ivave. Mbahe yar avei omano, opa oñoti yuvireco.

23 “Ahese oso Tūpa ñemoirosave. Aheve oparaisuse, omahe ivate coti, osepia amombri aracahendar Abraham Lázaro reseve. 24 Evocoiyase osapucái pĩrata: ‘¡Che ramoi Abraham, che paraisuerecomi tēi eve! Emboumi

têi Lázaro che ãpecu morohisa ãgua ive ocuã pipe. Esepia, che paraisu etepri co tata pĩratagüer pipe vitu' ehi. ²⁵ Evocoyase Abraham omboyevi aipo ehi chupe: 'Che rumino, ndemahenduha eipeve nde reco agüer rese nipaneise mbahe ndeu nde recove pipe. Lázaro rumo iparaisumi têi oico' ehi. 'Cũritei rumo Lázaro oviharete oico cohave, nde evocoyase nde paraisu eipeve eico. ²⁶ Iyavei oime co ivicuar ipicucu vahe rasaẽhi ãgua oreu iyavei pẽu no' ehi.

²⁷ "Ahe mbia aipo ehi: 'Che ramoi Abraham, emondomi têi Lázaro ²⁸ che rivri poyandepo vahe upe, chupe iñehe ãgua. Ahe tosecuñaro güecocuer yugüeruẽhi ãgua co tecocuer mbahe têisave' ehi. ²⁹ Abraham rumo, 'Vireco niha Moisés porocuaíta iyavei Tũpa ñehe mombehusar rembicuachiagüer yuvireco. ¡Ahe toviroya yuvireco!' ehiño chupe. ³⁰ Evocoyase, 'Taa, che ramoi Abraham, que omano vahecuer pãhu pendar rumo yuvirasose chupe, ahe evocoyase omoingatura güecocuer yuvireco viña' ehi. ³¹ Abraham rumo aipo ehi chupe: 'Acoi ndoyapisaca potaise Moisés porocuaíta rese iyavei ambuae Tũpa ñehe mombehusar remimombehu rese no, ndoviroyai chiveira que ava omano vahecuer ocuerayevise yuvireco' ehi Abraham ava mbahe yar upe" ehi.

17

Iparaisu itera ava oporomboangaipa uca vahe

¹ Jesús aipo ehi güemimbohe eta upe: "Oimeño itera poroãtoisa che reroyasar reiti ãgua. ¡Ahe imboangaipa ucasar rumo iparaisu itera!

² Iyacatu evocoi nungar ava ñapichisa ita mbahe mbocuhisa iyesho rese para guasu pipe imombo ãgua chihivahemi nungar mboangaipa uca rãgüer sui. ³ ¡Sese peñearo tupri!

“Acoi nde mboetasa Tũpa reroyasar oyemboangaipase, pemboaracuara. Omboasi pare oyevise güecocuer tupri pipe, ahese peñerora chupe. ⁴ Supi eté acoi que ambuae ava pe amotarẽhi viteso rumo siete yupagüer ñepei ari pipe, acoi ouse pẽu siete yupagüer avei, ‘Ëgüe ndahe iri chira’ ehise, peñero chupe” ehi Jesús güemimbohe upe.

Yayeroyase Tũpa rese oime pĩratasa

⁵ Co doce tupri apóstol aipo ehi chupe:

—Emboumi oreu Tũpa rese ore yeroya catu ãgua —ehi yuvireco chupe.

⁶ Evocoiyase yande Yar omboyevi chupe:

—Supi eté, Tũpa rese pe yeroyasa, yepe ndoyavii chira mostaza rãhii tahimi vahe viña, co ivira tuvicha vahe upe rumo, ‘Eyeapoho ave sui. Eso eñeñeti para guasu aviterve’ peyese Tũpa rese pe yeroyasa pipe, ahe evocoiyase pe mboyeroya itera —ehi.

Ambuae ava rese hañecosar cuaita

⁷ “Inungar que pe pãhu pendar virecora güembiguai oporaviqui vahe ivi mboyere cove, anise que guaca rãro yuvi rupi viña; ichui iyevise, ¿‘Eique, eguapi terocar’ ehira pĩha sereciar chupe? ⁸ Aní eté, ahe rumo aipo ehiñora chupe: ‘Emoingatú voi mbahe che tohu, che toihurã avei. Ipare nde erecarura, ereihura’ ehira chupe. ⁹ ‘Aviye ndeu’ ndehi chietera icuai pare chupe. ¹⁰ Ëgüe peye avei mbiguai nungar pe opacatu

Tũpa pe cuaitarã ombou vahe mboaviyere, ‘Yande niha mbiguai tẽi yaico. Esepia, yande cuaita mboaviyesar tẽi yaico’ peyeñora” ehi.

Jesús ombogüera diez tupri ava lepra pipe imbaheasi vahe

¹¹ Osose Jesús Jerusalén ve, oguata ivi Samaria iyavei ivi Galilea rupi. ¹² Oyepotase tecuamive oso, ahese yuvínose diez ava lepra pipe imbaheasi vahe yuvireco chupe. Amombrive rumo opitaño yuvireco ichui. ¹³ Osapucái yuvireco chupe aipo ehi:

—¡Jesús, Porombohesar, ore para¡suerecomi tẽi eve! —ehi.

¹⁴ Sepiase aipo ehi lepra vireco vahe upe:

—Peyevi, peso, tapeyemboyecua pahi eta yuvirecoi vahe upe —ehi.

Oyevise rumo yuviraso, opa ocuera tupri omba-herasisa sui yuvireco. ¹⁵⁻¹⁶ Evocoiyase ñepeí ipãhu pendar, Samaria pendar, osepiase ocuerasa, oyevi chupe osapucái pĩrata Tũpa upe imboeteisave. Oñenopiha oso sovai, oyaivi, “Aviye ndeu” ehi Jesús upe. ¹⁷ Evocoiyase ahe aipo ehi:

—¿Ndahei vo acoi diez tupri opa ocuera omba-herasisa sui yuvireco? ¿Aique que ru ambuae nueve yuvirecoi vahe? ¹⁸ ¡Co mbia ambuae ivi pendar güeraño rumo oyevi ‘aviye ndeu’ ohesave Tũpa uve! —ehi.

¹⁹ Evocoiyase aipo ehi ahe mbia upe:

—Eñarapuha, eso tupriño. Nde poreroyasa pipe niha erecuera eico —ehi Jesús chupe.

Tũpa mborerecuasa yande pãhuve secoi

²⁰ Ñepeí ari pípe fariseo eta, “¿Marase vo aipo oura Tũpa omborerecuasa pípe mbahe moingatu ãgua?” ehi Jesús upe yuvireco. Ahe omboyeví chupe:

—Tũpa mborerecuasa ndahei acói yasepia vahe. ²¹ ‘Co secoi, aheve secoi’ ndapeyei chira chupe. Esepia, ahe oicove ité pe pãhuve —ehi fariseo eta upe.

²² Ipare aipo ehi güemimbohe eta upe:

—Oimera ari pe peipota tẽira aico vaheřã pe píri que ñepeí ari rupi che, Ava Riquehĩr, che recosa pípe; ndache repiai chira rumo peye. ²³ Iyavei ava, ‘Co secoi, aheve aipo secoi’ ehi tẽira yuvireco cheu. Ndapesaquicue moñai chira rumo. ²⁴ Esepia, inungar acói overa vahe osesape guasu iva rese ocua yepi, ěgũe ahera che, Ava Riquehĩr, vitu ari osupitise che yevĩ ãgua curi. ²⁵ Yipĩndar rumo co ivĩ pípe che paraisu ranera ava cũriteindar mara-mara tẽi che rerecose yuvireco che repia potaẽhisave. ²⁶ Inungar ava Noé recose yuvirecoi aracahe, ěgũe ehi tupri aveira che, Ava Riquehĩr, yevĩ ãgua renonde. ²⁷ Esepia, ocaru, oĩhu, omendaño avei yuvireco. Oyepotase rumo ari ipapapri amarusu viapi ãgua, ahese Noé yuviroique arca pípe. Ambuae ava rumo opa ocañi tẽi yuvireco. ²⁸ ěgũe ehi avei aracahe Lot recose, ava ocaru tẽi, oĩhu tẽi, virocua tẽi mbahe omahera yuvireco iyavei mbahe mondosar tẽi, mbahe tĩsar tẽi, oi aposar tẽi avei yuvirecoi oyapĩsacaẽhisa pípe. ²⁹ Osẽse rumo Lot tecua Sodoma sui, aviyeteramo tẽi ovĩapi tata amar nungar iva sui. Opa tupri oyuca ava rehĩ aracahe. ³⁰ ěgũe ahe aveira aviyeteramo tẽi che,

Ava Riquehîr, ayemboyecuar curi.

³¹ “Ahe arî pipe acoi ava güêta harîve secoi vahe, ahe toi que irî eme güêta pipe ombahe renose. Iyavei ava que rupi têi secoi vahe, toyeveî irî eme güêtave. ³² Sese peyemomahenduha co aracahendar Lot rembireco rese. ³³ Opacatu güecocuer osaisu vahe, ahe ocañî tẽira. Iyavei setecuer têi ocañî vahe, ahe rumo oñepisîrora” ehi.

³⁴ “Ahe pîtu pipe oimera que ñuvirío ava vupave yuvîroque vahe yugüeru: ñepeî acoi che reroyasar serasosara, ambuae rumo opîtara. ³⁵ Ahese avei ñuvirío cuña ohichora yuvîreco: ñepeî serasosara, indugüer rumo opîtara. ³⁶ Ëgüe ehi aveira ñuvirío ava amombri güecua sui yuvîrecoi vahe: ñepeî serasosara, indugüer rumo opîtara” ehi.

³⁷ Aipo ñehesa renduse, oporandu yuvîreco chupe:

—Ore Yar, ¿que vo aipo ëgüe ehira mbahe curi?
—ehi.

Ahe evocoyase,

—Mbahe rehõgüer reimesave uruvu oñemonuha atira yuvîreco —ehi güemimbohe eta upe.

18

Jesús omboyoya yeruresa cuña imer mano vahecuer iyavei mborerecuar mbahe moingatusar recocuer rese

¹ Jesús omboyoya ambuae ava recocuer sui querêhîsa pipe yerureño ãgua arî yacatu rupi
² aipo ehi: “Ñepeî tecuave oime mbîa mborerecuar mbahe moingatusar ndosiquîyei vahe Tûpa sui, ambuae ava sui avei. ³ Ahe tecuave avei oime cuña imer mano vahecuer. Ahe

oso co mborerecuar rētave, ‘Oime ava oyapo mbahe tēi eté cheu, tomboepi cheu’ ehi chupe. ⁴ Yipindar rumo noipitivi potai. Coiye catu rumo cuña ombopihavĩracua tēise, ipihañemoñeta iri: ‘Yepe che ndasiquiyei vahe Tũpa sui, ava sui avei ndasiquiyei vahe ité, ⁵ amoingatuñora rumo mbahe co cuña che mañeco tēisar upe. Ayapoñora semimbotar cheu iyu pihĩhi ãgua’ ehi opihañemoñetasave” ehi.

⁶ Ipare yande Yar aipo ehi: “Peyapisaca aipo mborerecuar naporai vahe ñehe rese. ⁷ Tũpa avei niha omoingatura mbahe güembiporavo oyeupe yeruresar ari, pĩtu rupindar upe yepi. Nosaro tēi chiranera opĩtivi ãgua yuvireco. ⁸ Supi eté Tũpa omoingatu voira mbahe aviye vahe yande porandusa pipe yandeu. Co rumo che, Ava Riquehir, ayevisé co ivi pipe vitu, oimera ava moviromi tēi oyeroya vite vahe che rese yuvireco” ehi Jesús.

Yembohesa fariseo sui iyavei guarepochi rerocuasar sui

⁹ Ichui Jesús oporombohe iri ambuae ava recocuer rese. Esepia, oime amove ava aviye ai angahu secoi oyeupe viña, iharive rumo viroĩro ambuae ava. ¹⁰ “Ñuvirío ava yuviraso tũparove oyeroqui. Ñepeí ava fariseo, ambuae evocoyase ava sui guarepochi rerocuasar. ¹¹ Evocoyase fariseo oso tenonde ava rembiepiave oyeroqui aipo ehi: “Tũpa, aviye ndeu, che ndahei ambuae ava nungar che recocuer; ndachemondai vahe, ndachereco rai vahe, ndacheaguasa-guasa tēi vahe. Iyavei ndahei eté che recocuer co mbia ava sui guarepochi rerocuasar nungar tēi aico

no. ¹² Iyavei ñuvirío yupagüer ñepeí semana pıpe ayecuacu ité nde recocuer rese, iyavei ñepeí-peí cien guarepochi che poravıquí repıı aipııı vahe sui amboyaho diez che porerecosa ndeu' ehi. ¹³ Ava sui guarepochi rerocuasar rumo opıtaño amombrı ichui. Aheve nomaherı ıva rese oyeroquí ãgua oangaipa mboasısa pıpe. Oyepochihanupanupa aipo ehi: 'ıTũpa, che parısuerecomı eve, che angaipa viyar aıco!' ehi oyeroquí" ehi. ¹⁴ "Sese aipo ahe pẽu: co mbıa ava sui guarepochi rerocuasar opa oipııı ñerosa Tũpa suıdar güëtave oso. Fariseo rumo anı eté. Esepia niha, opacatu acoı oyemboıvate ai vahe, opara seco reroyısa. Acoı ava seco mbegüe vahe rumo seco mboıvate catusara curı" ehi.

Jesús osovasa chıhivahe eta

¹⁵ Iyavei chıhivahe güeru Jesús uve yuvıreco sovasapııã. Evocoyase semimbohe osepiase yuvıreco, "¿Mahera vo peruño tẽi chıhivahe?" ehi opıhavıracuasa pıpe serusar upe yuvıreco. ¹⁶ Jesús rumo aipo ehi:

—ıMahera ndapeipotai iyu ãgua! Toyugüeruño chıhivahe cheu. Esepia, co chıhivahe nungar ava yuvıroiquera che Ru Tũpa povrıve. ¹⁷ Supı eté acoı ndoipıııı vahe che Ru Tũpa mborerecuasa chıhivahe nungar yuvıreco, ahe evocoyase ndoyuvıroiqueeı chietera ipıpe —ehi.

Ñepeı mbıa mborerecuar imbahe eta vahe omoñeta Jesús

¹⁸ Ñepeı mbıa mborerecuar oporandu Jesús upe: —Porombohesar avıye vahe, ¿mbahe vo ayapora tecovesa apırehi vahe rereco ãgua? —ehi.

19 Jesús evocoyase aipo ehi ahe mbia upe:

—¿Mahera vo, “Aviye vahe” ere cheu? Oime rumo ñepeí aviye vahe ité, ahe Tūpa seci.

20 Ereicua niha co porocuita aipo ehi vahe: ‘Nandeaguasai chira, ndereporoyucaí chira, nandemondai chira, nanderemirai chira ambuae ava rese, eremboyeroyara nde ru, nde si avei’ ehi vahe —ehi chupe.

21 Ahe mbia rumo,

—Che aipo nungar opacatu amboaviye ité che chñihivahemi suive —ehiño chupe

22 Aipo ihese rumo,

—Ipane vite mbahe ndeu —ehi—. Emondopa rane nde mbahe, ahe seprí evocoyase eremondora ava iparaisu vahe upe. Ichui ererecora mbahe aviye vahe ivave cute. Ipare ereguatara che rupi —ehi chupe.

23 Aipo oyeupe hese rumo, ahe mbia ndoyembovihai tēi. Esepia niha, mbahe yar ité seci.

24 Sese omahe aipo ehi:

—¡Yavai eté rumo ava mbahe yar reique ãgua che Ru Tūpa mborerecuasave! —ehi—. 25 Yavai rai camello upe yucuar rupi seique ãgua; ava imbahe eta vahe upe rumo yavai catu che Ru mborerecuasave seique ãgua —ehi.

26 —¿Ava angahu pñha evocoyase oñepisirora yuvireco viña? —ehi sendusar chupe.

27 Evocoyase ahe chupe aipo ehi:

—Ava tēi upe mbahe yavai eté, Tūpa upe rumo ndayavaimi eté —ehi.

28 Evocoyase Pedro aipo ehi:

—Che Yar, ore rumo opa oroseya ore mbahe nde rupi ore guata ãgua —ehi chupe.

²⁹ Evocoiyase aipo ehi güemimbohe upe:

—Supi eté acoi oseya vahe que güêta, güembireco, viquehîr, vivri, oyesupa, que guahîr Tûpa mborerecuasa rese, ³⁰ ahe setá iteanga catu oipîsira mbahe aviye catu vahe co ivî pipe oseya vahe sui. Ipare rumo tecua ambuaeve oipîsi aveira tecovesa apîrêhi vahe curi —ehi.

Jesús omombehu iri omano ãgua

³¹ Evocoiyase yande Yar opa vîraso co cotîmi doce güemimbohe. Aheve aipo ehi: “Cûritei yasora tecua Jerusalén ve yaico, aheve omboaviyera co Tûpa ñehe mombehusar rembicuachiagüer co che, Ava Rîquehîr, resendar ñehesa. ³² Che imondopri aicora ndahei vahe yande mu upe mara-mara têi che rereco ãgua. Che reroïro-ïrora iyavei ondivîndivîra yuvîreco che rese” ehi. ³³ “Iyavei che nupa-nupara. Ipare che yucara yuvîreco. Imombosapîsa arî pipe rumo acuerayevîra omano vahe pâhu sui” ehi.

³⁴ Semimbohe rumo ndosenducuai eté iñehe yuvîreco. Esepia niha, yavai eté senducua ãgua yuvîreco chupe.

Jesús ombogüera ñepeî mbîa ndasesapîsoi vahe

³⁵ Evocoiyase Jesús ovîrovise tecua Jericó oso, aheve mbîa ndasesapîsoi vahe oguapî oî peri popîve porerecosa oyeupe mondo ãgua rese.

³⁶ Osenduse ahe ndasesapîsoi vahe ava rehî piambu, ahese, “¿Mbahe vo pëu?” ehi ava upe.

³⁷ Ahe evocoiyase, “Jesús, Nazaret pendar, ocuara co rupi” ehi yuvîreco chupe. ³⁸ Evocoiyase ahe güendapeve oñehe pîrata:

—¡Jesús, David suindar, che paraisuerecomi tēi eve! —ehi chupe.

³⁹ Evocoiyase ava tenonde oguata vahe oyacayacaño, “Quiriri” ehi yuvireco chupe. Ahe rumo,

—¡David suindar, che paraisuerecomi tēi eve! —ehi pĩrataño ité chupe.

⁴⁰ Evocoiyase Jesús opitase aheve, oyocuai ava seru ãgua. Ovirovise seru yuvireco, aipo ehi ndasesapisoivo vahe upe:

⁴¹ —¿Mbahe vo ereipota ayapo vaherã ndeu? —ehi.

—Che Yar, che mbosarecomi tēira eve viña —ehi chupe.

⁴² —¡Esareco, erecuera niha! Esepia, ereyeroya ité che rese —ehi chupe.

⁴³ Ahe ramoseve ndasesapisoivo vahe, osareco tupri ité; osoño ité Jesús rupi imboetisave. Opacatu ava osepia vahe avei omboetei Tũpa yuvireco.

19

Zaqueo osepia pota Jesús

¹ Ichui Jesús oi que tecua Jericó pĩpe oguata oico. ² Aheve mbia mbahe yar Zaqueo serer vahe secoi. Ahe ava sui guarepochi rerocuasar rerecuar. ³ Osepia pota tēi Jesús ‘taicua ité’ oya viña. Ndoicatui rumo opucuẽhise ava rehii pãhuve sepia ãgua. ⁴ Evocoiyase ahe oña tenonde oso ‘tasepia ité’ oyapave, oyeupi ivira rese ivate oĩ senonera. ⁵ Evocoiyase oyepotase, omahe Zaqueo rese ivate chinise, aipo ehi chupe:

—Zaqueo, egüeyi poyava. Esepia, asora nde rētave nde piri —ehi.

⁶ Aipo oyeupe he ramoseve, Zaqueo ogüeyi voi vorivetesu pipe oipisi. ⁷ Sepiase rumo opacatu ava, “Yangaipa guasu vahe rētave tēi oso” ehi yuvireco chupe. ⁸ Evocoyase Zaqueo opūha aipo ehi chupe:

—Che Yar, esendu rane, amboyaho tuprira che mbahe eta ava iparaisu vahe upe; mbahe añomi vahecuer avei, ayapirasa catu-catura irungatu rupi imboyeveĩ ãgua —ehi chupe.

⁹—Co pipe Tūpa oipisiro ité co mbia. Esepia, ahe niha Abraham suindar avei secoi. ¹⁰ Esepia, che, Ava Riquehir, ayu co ivi pipe ava ocañi tēi vahe pīsiro ãgua —ehi Jesús Zaqueo upe.

Guarepochi sui yembohesa

¹¹ Aipo ñehesa rendu vitesese, Jesús oporombohe ambuae tecocuer resendar rese. Esepia, virovi Jerusalén, “Oyepota voi etera revo Tūpa mborerecuasa” ehi ava yuvireco viña.

¹² Ahe rumo aipo ehi ava upe imbohe: “Oime mbia imboyeroyapri, ahe senoipri oso vaheřã amombri oivi pendareta rerecuarã oyevise. ¹³ Oso ãgua renonde oichohopa uca diez tupri güembiguai. Ahese opa omondo ñepepepe upe guarepochi sepirusu vahe, aipo ehi chupe: ‘Peporaviqui co guarepochi rese imboeta ãgua che yevise nara’ ehi. Ipare oso. ¹⁴ Setá ava rumo secua pendar saquicuei tēi viroĩro yuvireco. Sese omondo moviro ava ‘tomombehu: Ore rumo ndoroipotai ore rerecuarã secoi ãgua, tehi yuvireco’ oya viña.

¹⁵ “Ahe rumo mborerecuar guasu güecosa pipe oyeveĩ ou cute. Opa uca oichoho oguarepochi pisisarer ‘¿mbovi-mbovi pīha oipisi oyacatu yuvireco?’ oya. ¹⁶ Evocoyase yipindar mbia

guarepochi oipisi vahe ou voi chupe, ‘Che rerecuar, nde guarepochi oyemboeta diez rupi cheu’ ehi. ¹⁷ Evocoyase mborerecuar guasu omboyevi chupe: ‘Mbiguai aviye vahe ereico, nde cuaita co nde poraviquisa chihimi vahe eremboaviye ite. Sese ereicora diez tecua guasu pendar rese hañeco ãgua’ ehi chupe. ¹⁸ Ipare voi ambuae ou chupe, ‘Che rerecuar, nde guarepochi oyemboeta cinco rupi cheu’ ehi chupe. ¹⁹ Aipo ehi tupri avei ahe chupe: ‘Nde evocoyase ereicora cinco tecua pendar rese hañeco ãgua’ ehi.

²⁰ “Ipare voi ambuae ou chupe, ‘Che rerecuar, ndo co nde guarepochi aipoqueño turucuar mi pipe sereco. ²¹ Esepia, che asiquiye nde sui. Nderecatēhi mete ai vahe mbahe rese. Ambuae ava poraviqui sui tēi iyavei acoi ndahei vahe mbahe nde remiti, ichui tēi avei ereipisi mbahe ndeyeupe nara yepi’ ehi chupe. ²² Evocoyase mborerecuar guasu aipo ehi chupe: ‘Nde mbiguai ndaseco pōrai vahe ereico. Nde ñehe sui aicuara nde recocuer. Ereicuase ēgüe che hesa viña, ²³ evocoyase, ¿mahera ru ndereyapocatui che guarepochi guarepochi apocatusave che yevise voi senose ãgua cheu imboyevi catumi ãgua viña?’ ehi. ²⁴ Evocoyase, ‘Perocua guarepochi ichui. Pemondora acoi diez rupi guarepochi omboeta vahe upe’ ehi vupindar upe. ²⁵ Supindar rumo aipo ehi: ‘Ore rerecuar, ovireco rumo evocoi diez tupri avei iharive guarepochi’ ehi tēi yuvireco chupe. ²⁶ Evocoyase mborerecuar, ‘Co rumo supi ete vahe: acoi ovireco vahe, imondosara setá catu chupe; acoi ndovirecoi vahe setá mbahe, ichui serocuasara’ ehi. ²⁷ ‘Acoi ava che amotarēhimbar,

ndache potai vahe mborerecuarã yuvireco, ahe opara peru cohava che rovai yucapa ãgua' ehi" ehi Jesús ava eta upe.

Jesús oique Jerusalén pipe

²⁸ Jesús aipo ohe pare, oguata vite oso Jerusalén coti. ²⁹ Evocoyase coiye catu tecua Betfagé iyavei Betania rerovicave, ivitri Olivo ípimi, aheve omondo ñuvirío güemimbohe ³⁰ aipo ehi chupe:

—Peso co tecuamive, yande rovaindarve. Peyepotase aheve, pesepiara guaricu ñapichimbri imoha ava ndoyeupi vitei vahe yuvireco sese. Ahe peyorañora seru. ³¹ Acoi, '¿Mahera vo peyora?' ehise que ava pëu, 'Yar oiporu pota' peyeñora chupe —ehi güemimbohe upe.

³² Evocoyase semimbohe yuviraso, semimombehu rupi tupri ité osepia mbahe yuvireco. ³³ Evocoyase oyorase guaricu,

—¿Mahera vo peyora ore reimba? —ehi iyar yuvireco.

³⁴ —Yar oiporu pota —ehiño yuvireco chupe.

³⁵ Ipare viraso Jesús upe yuvireco, oicupeao oyeaosa pipe guaricu yuvireco chupe. Ipare omboyeupi sese oso ãgua. ³⁶ Oyeupise oso guaricu harive, oipipira ava oturucuar peri rupi senonera imboetei guasusave yuvireco. ³⁷ Ovirovise ivitri Olivo sui ogüeyi ãgua oso, opacatu ava seroyasar supi oguata vahe omboipi osapucái yuvireco vorivetesave mbahe poromondiisa sembiapogüer rese Tüpa upe ³⁸ aipo ehi yuvireco:

—¡Sovasapri secoi mborerecuar guasu ou vahe yande Yar rer pipe! ¡Mbahe tupri toime ivave iyavei imboeteipri Tüpa tasecoi! —ehi.

³⁹ Evocoiyase amove fariseo yuvirecoi vahe supi aipo ehi chupe:

—Porombohesar, eñehe nde rupi oguata vahe upe imonguiriri ãgua —ehi tēi yuvireco.

⁴⁰ Evocoiyase aipo ehi:

—Supi eté amombehu pēu: co ava iquiririse yuvireco, ita rumo evocoiyase osapucaí pĩratara che mboeteisave —ehi.

⁴¹ Oyepota senimise tecua Jerusalén ve, ahe tecua repiase, oyaseho sese ⁴² aipo ehi: “¡Psenducua tarahu co co arí pipe teco tupriisa amondo pota vahe pēu viña, cūrítei rumo ocañi tupriño pe sui, ndapeicatuí eté sepia!” ehi oyaseho.

⁴³ “Oimera rumo arí imombehupri naporai vahe pēu curi. Pe amotarēhimbar oñachi irira pe recua. Ipare oyere tupriira yuvireco pe rese pēu ovava ãgua. ⁴⁴ Iyavei yuviroiquera pe recua pipe, opara pe rēta omonduru yuvireco, pe yuca aveira yuvireco. Ndipoi chietera ita que ñepeí oya vahe ambuae rese. Esepia, ndapeicuai eté Tũpa ouse pēu pe pĩsiro ãgua” ehi Jerusalén pendar rese oyaseho.

Jesús omombopa ava mbahe rerecosar tũparo pipe sui

⁴⁵ Ichui Jesús oi que judío tũparo guasu pipe. Aheve omboipi ava mbahe mondosar mombopa tupri ocarve oico ⁴⁶ aipo ehi:

—Icuachiapri aracahendar pipe aipo ehi: ‘Che rēta yeruresa rētarã’ ehi. Pe rumo, imonda rai vahe rēta nungar tēi pereco —ehi.

⁴⁷ Ichui ahe tũparo guasu pipe arí yacatu oporombohe oico. Aheve avei rumo pahí eta

rerecuar yuvirecoi vahe, Moisés porocuita rese oporombohe vahe iyavei tecua rerecuar guasu yuvirecoi vahe, ‘¿Mara yahera pīha yuca uca ãgua viña?’ ehi yuvireco chupe. ⁴⁸ Ndoicatu rumo yuvireco. Esepia, ava rehii oyapısaca iporombohesa rese yuvireco.

20

Jesús mborerecuasa

¹ Ñepeí arí Jesús judío tũparo guasu pıpe güecose, ombohe ava eta, omombehu ñehesa pĩsirosa re-sendar oico. Ahese yugüeru pahı eta rerecuar guasu yuvireco iyavei Moisés porocuita rese oporombohe vahe, ava rerecuar guasu yuvirecoi vahe avei ² aipo ehi:

—¿Ava nde cuaita pıpe vo ereyapo co nungar eico? ¿Ava vo ombou nde mborerecuarã? —ehi ahe ava yuvireco chupe.

³ Ahe omboyeveı chupe:

—Che avei aporandura mbahe rese pẽu. Pemboyeveıra cheu —ehi—. ⁴ ¿Ava vo Juan ombou ava ãpiramo ãgua: Tũpa pıha, ava tẽi tie? —ehi ahe ava yuvirecoi vahe upe.

⁵ Ahese, “¿Mara yahera pıha?” ehi-ehi tẽi oyeupe yuvireco. “‘Tũpa’ yahese chupe, ‘¿Mahera ru ndaperoyai?’ ehıra yandeu. ⁶ Anise, ‘Ava tẽi remımbou’ yahese chupe, opacatu seroyasar evocoyase yande api-apıra ita pıpe yuvireco. Esepia, ava, ‘Juan omombehu vahe ñehesa Tũpa suıdar’ ehi eté yuvireco chupe” ehi tẽi oyeupe yuvireco. ⁷ Evocoyase ahe ava, “Ndroicuai rumo

Juan mbousar, que sui oporoãpiramo oico” ehiño yuvireco chupe. ⁸ Sese aipo ehi ahe ava upe:

—Sese che avei, ‘Ahe iporocuaíta pipe co mbahe ayapo’ ndahei chietera pëu —ehi mborerecuar guasu upe.

Ava mbahe tēi oporaviqui vahe recocuer sui yembohesa

⁹ Ipare Jesús oñehe ava eta upe ambuae ava recocuer rese aipo ehi: “Oime mbia oñoti vahe uva oivi pipe. Ipare oseya oivi ava oporaviqui vahe upe iporu ãgua. Ichui oso pucu que amombri vahesa rupi. ¹⁰ Evocoyase oyepotase ari uva pohosa, ahese omondo ñepeí güembiguai oporaviqui vahe upe imboporandu ‘tomboumi uva pohopri cheundar cheu cute’ oyapave viña. Ahe rumo oinupanupaño imboyevi tupri tēi yuvireco serecuar upe. ¹¹ Ipare ambuae güembiguai omondo iri no. Ahe oinupa-nupaño, iñehe mara-mara tēi avei ipogüer tēi imboyevi imondo yuvireco. ¹² Ichui omondo iri tēi imombosapisa rese ambuae güembiguai no. Ahe oyapicha-pichaño imosē imondo yuvireco.

¹³ “Coiye miti yar aipo ehi: ‘¿Mara ahera pñha? Amondora revo che rahir, che rembiaisu. Ahe tie revo, osepiase, omboyeroyara yuvireco’ ehi. ¹⁴ Evocoyase ahe ava tahir repiase, ‘Co aipo oipisira vu mbahe. Yaucaño. Yandeu nara pãve topita co ivi’ ehi oyeupe yuvireco. ¹⁵ Evocoyase ovinose miti pãhu sui, oyuca ité yuvireco.

“¿Mbahe vo evocoyase oyapora ivi yar ahe ava naporai vahe upe? ¹⁶ Oura evocoyase ahe ava mocañipa ãgua, omondora ambuae ava upe oivi rese oporaviqui vaherã” ehi.

Aipo renduse,

—¿Egüe tehi eme! —ehi ava yuvireco chupe.

¹⁷ Omahese rumo ahe ava rese aipo ehi:

—¿Mara oya vo co aipo ehi icuachiapri aracahendar pipe?:

‘Co ita oi aposar opaño omombo yuvireco, ahe ita rumo aviye catu vahe oi moviracua tupri ãgua’ ehi.

¹⁸ Acoi que oviapi vahe evocoi ita harive, opa tẽira ahe ae oyemomara. Iyavei oviapise que ava harive, opa tupri aveira omocañi —ehi Jesús judío rerecuareta upe.

¹⁹ Pahi eta rerecuar guasu iyavei oporombohe vahe Moisés porocuita rese, ñehe vitesese, oipisi pota tẽi Jesús yuvireco. Esepia, osenducua ité oyesendar iporombohesa yuvireco. Osiquiyeño rumo ava rehii sui yuvireco.

Judío rerecuar osecõãha iri tẽi Jesús guarepochi rese yuvireco

²⁰ Ahe judío rerecuar evocoiyase omondo ava ndaseco asimi angahu vahe iviro, chupe ñehe ãgua ‘toyavi angahu õñehe’ oya viraso vaheã mborerecuar Pilato rovai. ²¹ Ahe evocoiyase,

—Porombohesar, ore oroicua nde ñehe iyavei nde porombohesa supi eté vahe. Iyavei nderemboyoavirati vahe nde ñehe yepi. Nde rumo eroporombohe mbahe supi tupri vahe Tũpa recocuer rese. ²² ¿Aviyera pĩha yamondo guarepochi Roma pendar mborerecuar ivate catu vahe upe viña? ¿Aní tie? —ehi yuvireco chupe.

²³ Opa rumo oicua ñehe porombopasa tẽi. Sese,

24—Pemboyecua ru ñepeí guarepochi cheu. ¿Ava rahanga vo vireco; ava rer icuachiapri vo co sese? —ehi ahe ava upe.

—Roma pendar mborerecuar guasu —ehiño yuvireco chupe.

25—Taa, pemondo ru mborerecuar uve chupendar, iyavei Tũpa upendar pemondoño ité Tũpa upe —ehi ahe ava upe.

26 Ndoyavi uca catui eté iñehe ava rovaque ipisi ãgua yuvireco. Ahe rumo oyeupe imboyevisé, iquiriripa tupriño oyepihamondiisa pipe yuvireco.

Porandusa cuerayevisa rese

27 Ipare saduceo, ahe “ndipoi eté cuerayevisa” ehi vahe, yugüeru Jesús upe. Oporandu tẽi angahu yuvireco chupe:

28 —Porombohesar, Moisés niha oseyá güembicuachiagüer yandeu aipo ehi: ‘Que cuimbahe omenda vahe omanose guahiẽhiseve, tivri evocoyase omendara sembirecocuer rese. Ahe viquehir omano vahecuer upe nara tahira oico’ ehi. 29 Evocoyase oime siete tupri oyesuindar pãve yuvirecoi vahe. Yipindar vahe omenda. Ipare omanoño guahiẽhiseve. 30 Ichui tivri omenda sese. Ahe omanoño avei guahiẽhiseve. 31 Ipare imombosapisa tivri omenda iri tẽi sese. Êgüe ehi tupriño avei chupe. Ambuae ichuindar êgüe ehi tupri avei omanopa yuvireco guahiẽhiseve. 32 Coiye cuña avei omanocute. 33 Evocoyase opase ocuerayevi yuvireco, ¿uma rembireco itera pĩha omendase opacatu

siete yuvirecoi vahe rese? —ehi saduceo yuvireco chupe.

³⁴ Ahe rumo ombovevi chupe:

—Co ivi pipe cuimbahe iyavei cuña omenda vahe yuvireco yepi. ³⁵ Ocuerevevi pare oicatu vahe ivave yuviroique vahe, chupe ndipo iri chira mendasa. ³⁶ Iyavei nomanoi chietera aheve. Esepia, yuvirecoira Tupa rahir, Tupa rembiguai eta iva pendar nungar yuvireco. ³⁷ Moisés rembicuachia aguer pipe niha caha pahu sendi vahe resendar oicua uca cuerevevisa yandeu. Aheve aipo ehi: “Ahe niha yande ramo aracahendar Abraham, Isaac, Jacob Tupa” ehi. ³⁸ ¡Tupa ndahei omano vahe Tupa! ¡Ahe rumo oicove vahe ite Tupa secoi! Esepia, chupe opacatu yuvirecove vahe — ehi saduceo upe.

³⁹ Evocoyase moviro Moisés porocuita rese oporombohe vahe aipo ehi:

—Supi ete aipo ere, Porombohesar —ehi yuvireco chupe.

⁴⁰ Sese niquerēhi iri ete mbahe rese oporandu āgua yuvireco chupe.

¿Ava suindar pīha Poropīsīrosar?

⁴¹ Evocoyase Jesús aipo ehi ahe ava upe:

—¿Mahera ru, “Poropīsīrosar David suindar ite” ehi yuvireco? ⁴² David teiete niha aipo ehi güembicuachia pipe:

‘Yar aipo ehi che Yar upe:

Eguapi che acato coti ⁴³ acoi che amondose voi ete nde amotarēhimbar ñenopiha āgua nde povrive yuvireco’ ehi David aracahe.

44 ¿Mahera ru, “Poropĩsĩrosar David suindar sec-oira” peye? David teieté, “Che Yar” ehise chupe —ehi Jesús ahe ava upe.

Jesús oicua uca Moisés porocuita rese oporom-bohe vahe recocuerai

45 Opacatu ava oñehe rendu vitesese, Jesús aipo ehi güemimbohe upe: 46 “Peicua catu co Moisés porocuita rese oporombohe vahe sui. Esepia, ahe oturucuar ipucu vahe rese oguata pota rai yuvireco yepi, iyavei oipota oyeupe ‘avirave’ apo ãgua ocar rupi omboeteisa pipe yuvireco. Oseca avei tenda porañete catu vahe güenara otũparo pipe, carusave avei oseca tenda avıye catu vahe yuvireco. 47 Iyavei vırocua-rocuano tẽi cuña imer mano vahecuer rẽta ichui. Oarondaguã tẽi avei oyerocu pucu-pucu yuvireco. Ahe rumo oipısira Tũpa ñemoirosa ipĩrata catu vahe yuvireco curi” ehi güemimbohe eta upe.

21

Cuña imer mano vahecuer iparaisu vahe porere-cosa

1 Ipare Jesús osepia ava imbahe eta vahe omondose oporerecosa guarepochi rıru pipe yuvireco.

2 Aheve avei cuña imer mano vahecuer iparaisu vahe, omondo ñuviriomi guarepochi oporerecosa.

3 Evocoiyase Jesús aipo ehi:

—Supi eté co cuña iparaisu vahe omondo catu oporerecosa opacatu mbahe yar sui. 4 Esepia, ava imbahe eta vahe, oguarepochi rumbırer tẽi omondo oporerecosa Tũpa upe yuvireco. Co cuña rumo oparaisusa pipe vırecomi vahe guarepochi

oyeupe, opacatu ité omondo oporereco ãgua Tũpa upe —ehi.

Jesús omombehu tũparo guasu monduru ãgua

⁵ Evocoyase amove semimbohe oñehe yuvireco tũparo guasu recocuer rese: “Co tũparo niha icatupri vahe, ita mopuhapri, porerecosa sui opacatu mbahe icatupri ipipe” ehi yuvireco. Jesús rumo aipo ehi:

⁶—Oimera ari opacatu co mbahe cõritei pesepia vahe pipe ndipoi chietera que ñepei ita oyeha vite vahe; opacatu ité imondurusara curi —ehi güemimbohe eta upe.

Cañi renonde sepiasara setá mbahe poromondisa ìva rese

⁷ Evocoyase semimbohe eta oporandu yuvireco chupe:

—Ore mbohesar, ¿mbahese vo aipo mbahe yaviyera? ¿Mbahe poromondisa rese rane vo icuasara curi? —ehi yuvireco.

⁸ Evocoyase aipo ehi güemimbohe eta upe: “Pecua catu, peyembopa ucai rene catu. Esepia, setá ava yugüerura, ‘Che niha Poropisrosar aico, cõritei osupiti ari imombehupri yandeu’ ehi tẽira yuvireco. Ndaperoyai chira rumo ava aipo ehi vahe. ⁹ Acoi peyanduse vavasa iyavei tecua pipendar oyeupe vavase, ndapeyembosiquiyei chira rumo serãcua anduse ichui. Evocoi nungar rane ité niha oimera. Ndehi vitei chira rumo ari cañi” ehi.

¹⁰ “Ñepei ivi pipendar ovavara ambuae ivi pipendar rese oyeupe yuvireco. ¹¹ Ahese avei oimera ivi ririã tuvichá vahe, tiavor, mbaherasisa

opacatu-catu tēi tecua rupi. Iyavei pesepiara iva rese mbahe pe mbosiquiye vahe, poromondiisa tuvichá vahe avei curi.

¹² “Co mbahe-mbahe tēi reime renondeve rumo pe pisira yuvireco che recocuer sui mara-mara tēi pe rereco água. Pe reraso aveira pēu porandu água tūparove, pe roquenda aveira, iyavei pe rerasora mborerecuar rovai, mborerecuar ivate catu vahe rovai avei yuvireco che recocuer sui tēi. ¹³ Ipipe pemombehura che recocuer chupe yuvireco. ¹⁴ ‘Aipo ahera añehe’ ndapeyei chira pepihañemoñeta rereco pe yeepi água. ¹⁵ Esepia, che amondora che mbahecuasa pe ñehe água. Ndoicatu chietera evocoyase pe amotarēhimbar imboyevi yuvireco pēu. ¹⁶ Pe amotarēhira rumo pe yesupa, pe mu, pe rivri, pe riquehir, pe mboripar avei. Iyavei oyucara amove pe pāhu pendar yuvireco. ¹⁷ Opacatu ava ndape ambotai chira che recocuer sui tēi yuvireco. ¹⁸ Nocañii chietera rumo que ñepepe pe ha pe ãca sui. ¹⁹ ¡Peyemoviracua evocoi nungar mbahe upe pe ñepisiro água!

²⁰ “Iyavei pesepiase ava Jerusalén rese sundao oyere tuprise, peicudara evocoyase mbahe-mbahe tēi reime água yuvireco chupe. ²¹ Evocoyase Judea ve yuvirecoi vahe toñemipa poyava voi ivitri rese yuvireco ichui; tecua Jerusalén pīpe yuvirecoi vahe, ahe toyuvinose poyava avei ichui. Iyavei acoi que rupi yuvirecoi vahe, ahe toyevi iri eme yuvireco. ²² Esepia, ahe arī oimera Tūpa ñemoirosa. Ahe omboaviyera icuachiapri arachendar pīpe imombehupri. ²³ ¡Iparaisu itera ahe arī pīpe cuña ipuruha vahe, imembi pītani vahe avei! Esepia, oimera tecoasisa co ivi pīpendar

upe, ñemoirosa tuvichá vahe ahe ava recocuer rese. ²⁴ Iyavei quise pucu pipe setá ava omanora yuvireco iyavei ambuae setá ava ipisipri sera-sosara ambuae ivi rese amombrisave. Iyavei ambuae ivi pipendar ava ndahei vahe judío yuvirecoi vahe oiporu itera tecua Jerusalén acoi osupitise voi eté ari imombehupri yuvireco chupe” ehi.

Ava Riquehir yevisa

²⁵ “Iva rese iporéhira poromondiisa, ari rese, yasi rese, yasitata rese; iyavei ivi pipe, opacatú tecua rupi ava ndayaracua iri chira yuvireco. Oyembosiquiye guasu-guasú tēi aveira yuvireco para guasu riapugüer renduse. ²⁶ Ahese ava setá yaracua cañi tēira osiquiyepave yuvireco opihañemoñeta guasu aise co ivi pipe mbahe oime vaherã sui. Ahese avei iva resendar opacatu mbahe oririra. ²⁷ Ahese ramo opacatu ava che, Ava Riquehir, che repiara yuvireco, agüeyise iva quiha rese che pīratasa rendigüer porañetesa pipe. ²⁸ Omboipise evocoi nungar mbahe, peyemongerēhi catura, peyemopoase pe querēhisa pipe. Esepia, pe renosesa pihavira mbahe tēi sui” ehi.

²⁹ Iyavei oporombohe ambuae mbahe rese: “Peicua tupri higuera ivira recocuer, anise que ambuae ivira avei. ³⁰ Co ivira soqui ramose, yaicua cōimi ari sacú vahe yepota ãgua yandeu yepi. ³¹ Na ehi aveira pēu che ñehe rupi tupri mbahe pesepiase. Sese peicua Tūpa mborerecuasa cōimi eté secoise.

³² “Supi eté yuvirecove vitera ava osepia vahe co mbahe opase yaviye. ³³ Iva, ivi opara ocañi,

che ñehengagüer rumo imboaviyesa rane itera” ehi güemimbohe upe.

³⁴ “Peicua catu, aní pemboavai etepri pe mbahe reroya ãgua mbahe tēi aposa pipe, pe caguar tēisa pipe, co ivi pipendar tecocuer rese pe pihañemoñeta tēisa pipe avei. Evocoyase topoesapiha eme ³⁵ inungar ivonde oviapi vahe ahe ari pipe. Esepia, opacatu ava eta upe oimera evocoi nungar mbahe. ³⁶ Sese peyemoingatu, peyeroqui ari rupi co mbahe tēi sui pe yepēpi ãgua, pe yemboyecua tupri ãgua che, Ava Riquehir, rovai” ehi güemimbohe eta upe.

³⁷ Ëgüe ehi Jesús oporombohe ari rupi tūparo guasu pipe. Pītu pipe evocoyase opīta ivitri Olivo rese. ³⁸ Iyavei opacatu ava yuviraso añihiveive tūparo guasu pipe ñehe rendu ãgua yepi.

22

Yemomborandusa Jesús yuca ãgua

¹ Ovirovise Pascua pieta pan ndayapepoi vahe hu ãgua, ² ahese pahi rerecuareta, Moisés porocuaite rese oporombohe vahe avei ava sui osiquiyepave, oseca-seca tēi Jesús yuca ãgua yuvireco.

³ Evocoyase Carugar oi que Judas piha pipe, ahe acoi doce tupri semimbohe pāhu pendar Iscariote serer vahe. ⁴ Ahe oso pahi eta rerecuar yuvirecoi vahe upe, tūparo rārosar yuvirecoi vahe upe avei imoñeta ãgua, “Tamondo Jesús pe povrive” ehi. ⁵ Ahe evocoyase oyemboviharēte yuvireco. “Yamondo guarepochi chupe” ehi voi eté yuvireco. ⁶ Judas evocoyase, “Aviye” ehi.

Oseca voi ava porêhiseve Jesús mondo ãgua yamotarêhimbar upe.

Yande Yar caru agüer ipa vahe

⁷ Oyepota ari yipîndar vahe pan ndayapepoi vahe hu ãgua. Ahe pipeve avei ovesa Pascua pieta resendar yucapri seropovêhesa yepi. ⁸ Evocoyase Jesús omondo güemimbohe Pedro, Juan reseve aipo ehi:

—Peso, tapemoingatu yande caru ãgua Pascua pieta resendar —ehi.

⁹ Semimbohe rumo,

—¿Que vo ereipota oromoingatura? —ehi yuvireco chupe.

¹⁰ Evocoyase aipo ehi:

—Peyepotase tecua pipe, aheve pesepiara mbia vireco vahe cambuchi pipe i. Pesora sêtave supi.

¹¹ Aipo peyera peñehe oi yar upe: “Ore mbohesar oporandu: ‘¿Uma oi pipe vo Pascua pieta resendar orohura che remimbohe rese?’ ehi” peyera. ¹² Evocoyase ahe omboyecuara oi guasu, ivatendar pëu. Aheve pemoingatura yande caru ãgua —ehi güemimbohe upe.

¹³ Ipare ahe yuviraso, semimombehu rupi tupri ité osepia mbahe. Aheve omoingatu carusa Pascua pieta resendar yuvireco.

¹⁴ Osupitise icaru ãgua apóstol reseve yuviroguapi mesave. ¹⁵ Evocoyase aipo ehi:

—¿Cueseve tēi eté niha aipota acarú vaheã pe piri Pascua pieta resendar rese che mano ãgua renonde! ¹⁶ Esepia niha, ndayapo iri chira pieta Pascua resendar acoi yaviyese voi eté Tūpa mborerecuasa pipe —ehi.

17 Evocoiyase oipisi igua riru, “Aviye ndeu” ehi Vu upe, iyavei aipo ehi:

—Co amondora pëu, perova-rova peyacatu.

18 Esepia, co pipe suive ndaihu iri chira uva ricuer acoi ouse voi Tūpa mborerecuasa —ehi.

19 Ipare oipisi pan, “Aviye ndeu” ehi Vu upe. Aipo ohe pare ombohi-mbohi imondo güemimbohe upe.

—Co che rete, omboyecua imondopirã pe recocuer rese. Na peyera pe mahenduhasa pipe che rese yepi —ehi.

20 Ëgüe ehi avei carusa pare yapo igua riru rese aipo ehi:

—Co igua riru pipendar omboyecua che Ru remimbotar ipiasu vahe pëu nara, ahe che ruvi ipiyerepirã pe recocuer rese nara. 21 Cūritei rumo oime mbia mesave yande piri che mondo vaheerã che amotarëhimbar upe. 22 Supi eté imboaviyesa itera che, Ava Riquehir, rese ñehesa yipive imombepupri. ¡Iparaisu catura rumo acoi mbia che mondosar! —ehi.

23 Evocoiyase aipo ehise, semimbohe oporandurandu tēi oyeupe: “¿Ava pīha ëgüe ehi?” ehi tēi yuvireco.

¿Ava vo ivate catu vahe?

24 Ipare voi semimbohe oñemoñeta guasu yuvireco oyese, ipihañemoñeta ‘aviyeteramo che imboeteipri catu vahe aicora oporocuaise Jesús’ ohesave yuvireco. 25 Evocoiyase Jesús aipo ehi: “Ava mborerecuar co ivi pipendar oyocuai pīrata ava yuvireco yepi. Ahe chupe rumo, ‘Mbahe tupri aposar’ ehi yuvireco. 26 Pe rumo ëgüe ndapeyei chira. Acoi oyemboivate pota vahe,

toyemochĩhivaheño güeco mbegüesa pipe. Acoi ava cuaisar, tihañeco catu ambuae ava rese. ²⁷ ¿Uma pĩha ivate catu vahe: co mesave oguapĩ vahe ocaru yuvireco? ¿Sese ihañeco vahe tie? Acoi mesave oguapĩ vahe niha. Che rumo co aico pe pãhuve inungar pe rese ihañeco vahe.

²⁸ “Pe rumo peico vahe che rupi yepi opacatu che recoãhasa pipe. ²⁹ Sese che amondo pẽu pe mborerecuasa inungar che Ru ombou cheu che mborerecuã ãgua. ³⁰ Esepia, pecarura iyavei peihura che mborerecuasave che pĩri. Iyavei peguapĩra opacatu judío recocuer rese porandu ãgua” ehi güemimbohe upe.

Jesús, “Ndaicuai vahe evocoi mbia’ erera cheu” ehi Pedro upe

³¹ Aipo ehi avei yande Yar:

—Simón, Simón, esendu: Carugar oporandu pe recoãha ãgua rese. ³² Che rumo ayeroqui nde rese nde yeroyasa paneẽhi ãgua. Ereyevise cheu, emonguerẽhi catu ambuae nde rivireta imoviracua uca ãgua yuvireco oyese —ehi Pedro upe.

³³ —Che Yar, che rumo ayemoingatu voi eté nde rupi che so ãgua nde roquendasave iyavei che mano ãgua nde rupi —ehi Pedro chupe.

³⁴ —Pedro, supi eté amombehu ndeu: co pipe, tacura ñehe renondeve, nde, “Ndaicuai eté evocoi mbia” erera mbosapĩ oyupagüer rupi cheu —ehi.

Virovi ité Jesús recoãha ãgua

³⁵ Evocoyase Jesús oporandu güemimbohe eta upe:

—Opomondose acoi mbahe rîru porêhi, guarepochi rîru porêhi, ambuae pe pîtaqui ndugüer rerasoêhise, ¿ipane vo acoi mbahe ahese pëu? — ehi.

—Aní eté —ehi yuvireco chupe.

³⁶ Evocoyase,

—Cûritei, acoi mbahe rîru vîreco vahe, tovîrecoveño, guarepochi rîru vîreco vahe, tovîrecoveño avei; acoi ndovîrecoi vahe quise pucu, tomondo oyeaosa quise repîrã. ³⁷ Supî eté amombehu pëu: iyacatu ité imboaviye tupri âgua co che rese ñehesa imombehupri aipo ehi vahe: ‘Ava vîreco ndaseco pōrai vahe nungar yuvireco’ ehi vahe. Supî eté yaviyera co icuachiapîrer che resendar —ehi.

³⁸ Evocoyase semimbohe aipo ehi yuvireco:

—Ore Yar, cohave oime ñuvirío quise pucu —ehi.

—Ahe güeraño ité aviye —ehi güemimbohe eta upe.

Jesús oyerogui Getsemaní ve

³⁹ Ipare Jesús osê oso ivîtri Olivo ve. Ahe ivîtrive oso yepi, aheve semimbohe yuvîraso yuvireco supî. ⁴⁰ Oyepotase aheve yuvireco, Jesús aipo ehi güemimbohe upe:

—Peyeroqui angaipa pe yapoêhi âgua —ehi.

⁴¹ Ipare oyepepi güemimbohe sui, inungar ita imombosa vahe amombrimi, aheve oñenopîha, oyerogui ⁴² aipo ehi: “Che Ru, ereipotase, che renose eve co mbahe tēi sui; tayapo eme che remimbotar tēi, nde remimbotar rupira rumo” ehi.

⁴³ Evocoyase oyemboyecua Tūpa rembiguai chupe, seco momirata âgua. ⁴⁴ Mbahe-mbahe tēi

porarasa pipe oyerogui catu. Ahese sacuvor inungar tuvi osē ichui otiqui ivive.

⁴⁵ Oñarapuhase oyeroguisa sui, oyevi oso güemimbohe uve. Ahe rumo opaño yuviroque yuvirocua oviharēhisa pipe. ⁴⁶ Evocoiyase,

—¡Mahera opaño peque! Peñarapuha, peyeroqui catu pe viapiēhi āgua mbahe tēi pipe —ehi güemimbohe upe.

Jesús oipisi yuvireco

⁴⁷ Jesús ñehe viteseve, oyepota ati ava yuvireco chupe. Judas doce semimbohe pāhu pendar tenonde secoi. Ahe oyemboya oso sese sovaupite āgua. ⁴⁸ Evocoiyase aipo ehi Judas upe:

—Judas, ¿mahera vo che, Ava Riquehir, rovaupitesa pipe che mondo eve che amotarēhimbar upe? —ehi.

⁴⁹ Semimbohe eta rumo, mbahe-mbahe tēi repiase, oporandu yuvireco:

—Ore Yar, ¿yavavara yande quise pucu pipe? —ehi yuvireco chupe.

⁵⁰ Ñepei rumo supindar, pahi rerecuar ivate catu vahe rembiguai nambi yasu cotindar oyasía.

⁵¹ Ahe rumo,

—Teheni, evocoi rupive —ehi güemimbohe eta upe.

Ipare opoco inambi rese ombogüera voi. ⁵² Ichui aipo ehi güecasar opacatu pahi eta rerecuar upe, tūparo rārosar upe, tecua pipendar rerecuar upe avei:

—¿Quise pucu, ivira reseve-seve rutei co peyu che ropeña, imonda rai vahe nungar che rereco

peye? ⁵³ Aicose tũparo pipe pe pãhuve ari yacatu rupi, na ndapeyapoi eté co nungar cheu. Aviyeño rumo, oyepota ité niha pẽu imombehupri Caruguar pĩratasa pipe mbahe-mbahe tẽi apo ãgua —ehi.

Pedro, “Ndaicuai vahe evocoi mbia” ehi Jesús upe

⁵⁴ Evocoiyase Jesús oipisi yuvireco, oviraso pahi eta rerecuar ivate catu vahe rêtave yuvireco. Pedro rumo amombri rupive tẽi osaquicue moñaño oso. ⁵⁵ Aheve ñachimbrĩ pipe oyatapi yuvireco, oyere tupri tata rese oyephe yuvinoi. Aheve avei Pedro ipãhuve chini. ⁵⁶ Evocoiyase cuña mbiguai, osepiase Pedro, omahe tupri iri sese aipo ehi:

—Co ava avei niha acoi Jesús rupindar —ehi.

⁵⁷ Ahe rumo aipo ehiño:

—Cuña, ndaicuai vahe ité ahe mbia —ehi.

⁵⁸ Iparemi tẽi ambuae osepiase aipo ehi chupe no:

—Nde ité niha acoi supindar ereico —ehi.

—Aní mbia, aipo ere tẽi, ndahei eté rumo che supindar aico —ehi.

⁵⁹ Ñepe hora paremi tẽi, ambuae aipo ehi chupe: —Supi eté rumo co ité supi secoi vahe. Esepia, Galilea iguar ité niha —ehi.

⁶⁰ Sese aipo ehi:

—¿Mbahe vo catu aipo nde ñehesa? Ndasenducuai eté —ehi.

Aipo ihe viteseve, oñehe tacura. ⁶¹ Evocoiyase yande Yar oyemboyere sese. Ahe ramoseve oye-momahenduha: “Co pipe tacura ñehe renondeve, ‘Ndaicuai vahe’ erera mbosapi oyupagüer rupi

cheu” ihe agüer rese. ⁶² Ahese osẽ, oyasehó iteanga oso.

Sãrosar mara-mara tẽi Jesús vireco yuvireco

⁶³ Evocoyase ava Jesús rãrosar iguayĩ tẽi yuvirocua-rocua yuvireco sese. ⁶⁴ Osesacua yuvireco. Ipare oporandu yuvireco chupe:

—¡Eicua ité ru, ava evocoi ocua nde rese! —ehi yuvireco chupe.

⁶⁵ Iyavei setá mbahe rese oñehe-ñehe tẽi yuvireco chupe.

Jesús serasosa ava ñemonuhasa ivate catu vahe-save

⁶⁶ Ahe ari pipe, cõhese, oñemonuha ava judío rerecuar, pahi eta rerecuar iyavei opacatu Moisés porocuaíta rese oporombohe vahe yuvireco Jesús reraso uca ãgua ava ñemonuhasa ivate catu vahe-save, oporandu mbahe rese yuvireco chupe:

⁶⁷ —¿Supi eté vo nde Poropĩsĩrosar ereico? Emombehu ru oreu —ehi yuvireco chupe.

—Amombehuse rumo pẽu, ndache reroyai chitera peye —ehi judío rerecuar upe—. ⁶⁸ Inungar che aporanduse mbahe rese pẽu, pe avei ndapemboyevĩ chitera cheu viña no. ⁶⁹ Co pipe suive rumo che, Ava Riquehir, aguapira Tũpa mbahe mboavaisarẽhi acato coti —ehi.

⁷⁰ Ichui opacatu ava oporandu yuvireco chupe:

—Evocoyase, ¿nde ité ereico Tũpa Rahir? —ehi.

—Supi eté niha aipo aipo peye cheu —ehi mborerecuareta upe.

⁷¹ Evocoyase ahe aipo ehi yuvireco:

—¡Indó! ¿Ava iri vo evocoyase mbahe omombe-hura yandeu? Yasendu niha iñehe ité cute —ehi mborerecuar oyeupe yuvireco.

23

Jesús serasosa mborerecuar Pilato rovai

¹ Evocoyase opacatu ava opũha yuvireco Jesús reraso ãgua mborerecuar Pilato rovai. ² Aheve oiñehengapo aipo ehi yuvireco:

—Orosepia co mbia oipihañemoñeta rerova ati uca ava yande recua rupindar aipo ehi: “Pe-mondoi rene Roma pendar mborerecuar ivate catu vahe upe guarepochi” ehi. Iyavei, “Che Poropĩsirosar mborerecuar ivate catu vahe aico” ehi oico —ehi yuvireco Pilato upe.

³ Evocoyase Pilato oporandu chupe:

—¿Nde ité vo judío rerecuar ivate catu vahe? —ehi.

—Nde niha aipo, “Ahe ereico” ere cheu —ehi imboyevi Pilato upe.

⁴ Evocoyase Pilato aipo ehi pahi eta rerecuar upe opacatu ava upe avei:

—Che rumo namohai eté co mbia que mbahe oyapo vaherã —ehi

⁵ Ahe ava eta rumo,

—Supi eté opacatu ava oipihañemoñeta mboyeaviratí uca opacatu tecua rupindar. Yipindar omboipi Galilea rupi oico. Cũritei co Judea ve ãgüe ehiño ité —ehi ava eta Pilato upe yuvireco.

Jesús imondosa mborerecuar Herodes rovai

⁶ Pilato osenduse aipo ñehesa oporandu, “¿Supi eté p̄iha co mb̄ia Galilea iguar?” ehi. ⁷ “Ahe pendar ité” ehise yuvireco chupe, ahese omondo Herodes upe, ahe acoi mborerecuar Galilea rupindar. Ahese avei seci Jerusalén ve. ⁸ Herodes sorivete Jesús repiase. Esepia, setá ari osepia pota t̄ei serãcua anduse yepi. Evocoiyase oipota ité poromondiisa oyapo vaheerã oyeovaque viña. ⁹ Sese oporandu ati mbahe rese chupe. Nomboyev̄i eté rumo Herodes upe. ¹⁰ Aheve opacatú pahi eta rerecuar iyavei Moisés porocuita rese oporombohe vahe eta seroĩrosave oñemoñeta-ñeta t̄ei sese Herodes rovaque yuvireco. ¹¹ Evocoiyase Herodes osundao eta reseve iñehe mara-mara t̄ei Jesús upe sese uguaȳi t̄eisa pipe yuvireco. Omboyemunde avei turucuar iporañete vahe pipe yuvireco. Ëgüe ehi imboyev̄i Herodes Pilato upe. ¹² Ahe ari pipe suive oyembori Pilato Herodes rese. Ndoyeambotai vahe tie yipindar yuvireco viña.

“¡Tayaticasa!” ehi Jesús upe yuvireco

¹³ Evocoiyase Pilato opa uca omonuha opacatu pahi eta rerecuar, judío rerecuareta, opacatu ava eta avei. ¹⁴ Ipare aipo ehi chupe:

—Pe niha peru co mb̄ia cohava cheu, ‘Omañeco t̄ei ava secua rupi’ peye. Che rumo aporandu t̄ei pe rovaque mbahe rese chupe. Ndipoi eté rumo mbahe sembiapo naporai vahe pe remimombehu rupi. ¹⁵ Herodes avei, ‘Ndipoi mbahe sembiapo naporai vahe imano ãgua’ ehi. Sese omboyev̄iño Jesús imbou cheu. ¹⁶ Ainupa ucara rumo. Ipare amoseñora —ehi Pilato.

17 Pascua pieta pipe iya ité Pilato ava upe ñepei soquendapri mose ãgua.

18 Opatatú guasu rumo ava oñehe pĩrata yuvireco aipo ehi:

—¡Co topitaño oreu! ¡Barrabás emoseño! —ehi ava eta Pilato upe.

19 Co mbia Barrabás tecua pipe mbahe tẽi mopuhasa sui iyavei oporapichisa sui oyeoquenda uca vahe. 20 Pilato rumo omose pota Jesús viña. Sese oporandu iri ava upe imose ãgua. 21 Ahe rumo osapucaí pĩrata catu yuvireco:

—¡Aní, tayaticasa! ¡Tayaticasa curusu rese! —ehi ati-atiño yuvireco.

22 Imombosapisa rese Pilato oñehe iri:

—¿Mbahe ité vo oyapo naporai vahe? Ndipoi eté niha que mbahe sembiapo yuca ãgua, ainupa uca tẽira rumo. Ipare amoseñora —ehi.

23-24 Ava rehii rumo osapucaí pĩratá catu yuvireco, “Tayaticasa ité” ehi-ehiño yuvireco. Sese chupe, “Tayaposa evocoyase semimbotar yuvireco” ehiño Pilato ava eta upe. 25 Ëgüe ehi imose co mbia Barrabás, acoi soquendapri mbahe-mbahe tẽi mopuhasa sui, iporapichisa sui avei ava remimbotar rupi. Ipare omondo Jesús sãrosar upe ava remimbotar apo ãgua sese.

Jesús yaticasa curusu rese

26 Oime mbia Simón serer vahe Cirene iguar ou vahe que co coti rupi sui. Ovirasose Jesús yuvireco yatica ãguave, ahe mbia upe, “Nde terevosii curusu rese Jesús raquicuei” ehi voiño tẽi yuvireco.

²⁷ Ava rehii yuviraso saquicuei. Cuña avei setá oyaseho oviharēhisave yuvireco sese. ²⁸ Omahese rumo cuña rese aipo ehiño chupe:

—Cuña Jerusalén iguar, peyasehoi rene che rese. Peyese ae peyaseho, pe membri rese avei. ²⁹ Esepia, oura ari naporai vahe. Ahese aipo peye tēira: ‘Aviye catu acoi cuña nimembii vahe iyavei ndoicuai vahe imocambu omembri’ peye tēira. ³⁰ Ahese avei ava ivitri uve aipo ehira yuvireco: ‘iToviapi ore harive!’ ehira osiquiyepave. Iyavei ivivate vahe upe: ‘iTore mi!’ ehi tēira yuvireco. ³¹ Esepia, ēgüe ehise ivira yivive vitesē, ¿mara ehira vo catu oipise? —ehi cuña eta upe.

³² Iyavei viraso ñuvirío mbia ndaseco pōrai vahe supive yaticapirã yuvireco. ³³ Oyepotase Ava Āca Cangüer serer vahesave, aheve oyatica curusu rese yuvireco. Iyavei oyatica ñuvirío mbia, ñepi mbahe rese ipocosa coti, ambuae evocoyase mbahe rese ipocoēhisa coti. ³⁴ Ahese Jesús aipo ehi:

—Che Ru, ndeñero co ava upe sembiapo rai rese. Esepia, ndoicuai co mbahe güembaliapo yuvireco —ehi.

Sundao evocoyase iguayíño Jesús turucuar rese oyeupe imboyaho-yaho āgua yuvireco. ³⁵ Ava rehii osepia yuvireco; mborerecuareta avei seroĩrosave aipo ehi yuvireco chupe:

—Oipĩsiro ambuae ava, toñepisiro ru ahe ae ité cute Tūpa Rembiporavo Poropĩsirosar güecosa pipe —ehi yuvireco.

³⁶ Iyavei sundao seroĩropare omondo vinagre itoihu yuvireco, ³⁷ iyavei aipo ehi yuvireco chupe:

—¡Nde niha aipo ava judío eta rerecuar guasu ereico! ¡Eñepisiro ru nde ae ité! —ehi sundao eta yuvireco chupe.

³⁸ Curusu rese ñaca harive icuachiapri aipo ehi oĩ: “Co judío rerecuar guasu” ehi.

³⁹ Evocoyase ndaseco pōrai vahe yaticapri iñehe mara tēi chupe aipo ehi:

—¡Nde Poropisrosar ereicose, eñepisiro ru nde ae, ore avei ru ore p̃isiro eve! —ehi chupe.

⁴⁰ Ambuae evocoyase aipo ehi voi ondugüer uve:

—¿Nderesiquiyeimi rutei vo Tūpa sui? Nde avei niha ocañi tēi vaherã. ⁴¹ Yande rumo co yande rembiapo sui tēi mara-mara tēi yande rereco yuvireco; co mbia rumo mbahe sembiapoēhi pipe sui tēi na ehi serecosa —ehi ondugüer upe.

⁴² Evocoyase aipo ehi iri:

—Jesús, che paraisurecomi tēi eve nde eremboipise nde mborerecuasa —ehi.

⁴³ Evocoyase omboyevi chupe:

—Supi eté co pipe ereicora tecua apirēhi vahe-save che rupi —ehi Jesús ahe mbia upe.

Jesús mano agüer

⁴⁴ Osupitise rumo mbiter ari, opa tupri p̃itu ivi rupi; las tres pipe rumo opa icatu. ⁴⁵ Ari avei ogüe tupri, turucuar guasu tūparo asiasa avei mbiter rupi tupri ovo. ⁴⁶ Evocoyase Jesús oñehe p̃irata:

—¡Che Ru, amondo che espíritu ndeu! —ehi.

Aipo ohe pare voi omano.

⁴⁷ Evocoyase Roma iguar sundao rerecuar os-epiase co mbahe poromondiisa Tūpa mboeteisa pipe aipo ehi:

—Supi eté co mbia ndaseco marai vahe —ehi.

⁴⁸ Iyavei opacatu ava supindar yuvirecoi vahe osepiase co nungar mbahe, oyepochiha nupa-nupa tēi oyepihamondiisa pipe yuvireco.

⁴⁹ Opacatu avei ava oicua vahe Jesús, ipãhuve cuña Galilea sui yugüeru vahe, osepiaño tēi amombrive co nungar mbahe yuvireco.

Jesús apocatu agüer tuvipa pipe

⁵⁰⁻⁵¹ Oime mbia aviye etepri vahe, ahe serer José, tecua Arimatea pendar. Ahe tecua ivi Judea pipendar, judío rerecuar ñemonuhasa ivate catu vahe pendar seci. Ahe mbia viroya vahe ité Tüpa ombou vaherã omborerecuasa pipe mbahe moingatu água. Sese ndahei ipihañemoñeta rupi co mborerecuar oyapo vahe mbahe Jesús upe yuvireco. ⁵² Evocoiyase ahe oso Pilato rêtave oporandu água Jesús rehögüer rese. ⁵³ Curusu sui seroyi pare voi, oimama turucuar secose vahe pipe, ipoyava imondo tuvipa pipe ita guasu yohopri ndiporusa vitei vaheve yuvireco. ⁵⁴ Esepia, ahe ari omoingatu mbahe mbituhusa ari upe nara, ahe mbituhusa rumo osupiti pota ité.

⁵⁵ Cuña yugüeru vahe Jesús rupi Galilea sui, yuvirasoño ité suvipave, osepia sehögüer apocatus yuvireco. ⁵⁶ Oyevise güetave yuvireco omoingatu mbahe siacua vahe tehögüer resendar ipichi água.

24

Jesús ocuerayevi

Ahe cuña opituhu mbıtuhusa ari pipe judío porocuaita reroyasave yuvireco. ¹ Cõhe ramomise domingu pipe, oyevi yuviraso tuvıpave mbahe sıacua vahe reseve. ² Oyepotase yuvireco tuvıpave, osepia soquendasa ita guasu ndipo irise güendagüerve. ³ Evocoiyase yuvıroique voi tuvıpa pipe. Ndoyosui rumo yande Yar rehögüer yuvireco. ⁴ Ndoyembovıhai tēi; ndoicatu iri. Ahese avıyeteramo tēi osepia ñuvırío mbıa iturucuar sendı vahe oıpıve yuvireco. ⁵ Opaño ñaca ivıso ivı cotı yuvireco osiquıyepave. Evocoiyase co mbıa aipo ehi yuvireco chupe:

—¡Mahera pesca tuvıpa pãhu rupi ava oicove vahe! ⁶ Ndıpoi mo cohave; ocuerayevi mo ahe. Peyemomahenduha ñehengagüer ivı Galilea rupi omombehu vahecuer rese, ⁷ “Che, Ava Rıquehir, imondoprıra ava angaipa viyar povrıve, iyavei che atıcara curusu rese yuvireco. Mbosapı ari pare rumo acuerayevıra” ehi acoi —ehi cuña upe yuvireco.

⁸ Evocoiyase cuña oyemomahenduha voi Jesús ñehengagüer rese yuvireco. ⁹ Oyevise tuvıpa sui yuvireco, omombehu opacatu co once apóstol yuvırecoi vahe upe, opacatu ambuae upe avei. ¹⁰ Co omombehu vahe Jesús resendar ñehesa yuvireco apóstol eta uve, ahe: María Magdalena, Juana, Santiago sı María iyavei ambuae cuña eta no. ¹¹ Apóstol upe rumo oyeupe mombehuse avıye aipo ehi tēi vahe; ndovıroyai eté yuvireco.

¹² Pedro rumo yandu ramoseve voi, osē, oña oso tuvıpave. Omahese tuvıpa pipe, turucuar güeraño osepia co cotımi tıse. Evocoiyase oyepıhamondıi

tēi ‘¿mara ehi rutei pīha?’ oya oyevī oive oso.

Jesús oyemboyecua ñuvirío güemimbohe upe tecua Emaús piar rupi

¹³ Ahe ari pipeve caharuse, ñuvirío semimbohe yuviraso tecua Emaús ve. Ahe once kilómetro tecua Jerusalén sui. ¹⁴ Ahe peri rupi oñemoñeta yuviraso opacatu co mbahe oime vahecuer rese. ¹⁵ Oñemoñeta viteseve, Jesús teieté oyemboya sese, oguata supi. ¹⁶ Yepe osepia tēi, ahe rumo ndoyepiacua ucai eté chupe. ¹⁷ Evocoiyase Jesús oporandu chupe:

—¿Mbahe rese vo pe ñehe etepri pe guatasa rupi peico? —ehi.

Aipo hese, opita, ndovihai yuvinoha. ¹⁸ Ipāhu pendar Cleofas serer vahe omboyevī chupe:

—Nde güeraño revo Jerusalén ve ereico vahe ndereicuai mbahe oime vahe tecua pipe —ehi.

¹⁹ Evocoiyase,

—¿Mbahe vo oime yandeu? —ehi.

—Jesús mo Nazaret pendar, ahe Tūpa ñehe mombehusar seco pīrata vahe opacatu mbahe apo āgua, mbahe mombehu āgua avei Tūpa rovaque iyavei opacatu ava rovaque. ²⁰ Omondo pahi rerecuar iyavei yande rerecuareta yamotarēhisave yuca uca āgua curusu rese yuvireco. ²¹ Ore rumo oroyeroya ité sese. “Ahe yande pīsirora yande amotarēhimbar sui” orohe chupe viña. Cūritei rumo opa mbosapi ari yucare. ²² Ore pāhu pendar cuña ndore mbovihai eté oyevise suvipa sui yuvireco. Esepia, yipindar yuvirasose añihiveive tuvipave, ²³ ndoyosui eté sehōgüer yuvireco. Ahese aipo osepia Tūpa rembiguai aipo ehi vahe

yuvireco chupe: “Jesús mo oicove cūrítei” ehi. Ahe evocoyase yugüeru imombehu oreu. ²⁴ Iyavei ambuae ore ndugüer yuvirasose tuvipave cuña remimombehu rupi tupri avei. Ndosepiai eté rumo Jesús yuvireco —ehi Cleofas chupe tupri ité.

²⁵ Evocoyase aipo ehi ahe ñuvirío mbia upe:

—¿Ndapeicuai eté rumo pe piha pipe seroya tupri ãgua opacatu Tūpa ñehe mombehusar remimombehugüer! ²⁶ ¿Ndapeicuai vo Poropĩsirosar iparaisu rane itera mbahe-mbahe tēi virecosa pipe güecua porañetesave güeique ãgua renondeve? — ehi.

²⁷ Ipare opa omombehu icuachiapri Moisés cuachiar pipendar iyavei opacatu Tūpa ñehe mombehusar cuachiar pipendar oyese ñehe agüer.

²⁸ Oyepotase ahe tecuave yuviraso, Jesús rumo aviye oguataño vite vaheñã senonde. ²⁹ Co mbia rumo oñehe yuvireco chupe:

—Epitaño ore piri, caharu etepri. Pitura moco ndeu —ehi yuvireco chupe.

Evocoyase oique, opitaño ipiri yuvireco. ³⁰ Oguapise yuvinoi mesave, oipisi pan, “Aviye ndeu” ehi Tūpa upe. Ipare ombohi co ñuvirío mbia upe imondo. ³¹ Ahese voi semimbohe omahecua ramo yuvireco sese, ahe rumo cūríteimi ndoyemboyecua iri sovai chupe. ³² Evocoyase aipo ehi oyeupe yuvireco:

—Yande mbopihañemoñeta pĩratami eté peri rupi oñehese yandeu co tecocuer icuachiapri rese —ehi yuvireco.

³³ Ipare ndopita pucu iri; oyeviño voi yuviraso tecua Jerusalén ve. Aheve osepia once tupri vahe

apóstol, omboetasa avei. ³⁴ Ahese oñemonuha vahe aipo ehi yuvireco:

—Supi eté rumo yande Yar ocuerayevi. Esepia, oyemboyecua ité Simón upe —ehi.

³⁵ Evocoyase ahe avei omombehu, “Oreu avei oyemboyecua oroguatase perî rupi. Ombohise pan ore pîri, ahese ramo oroicua” ehi yuvireco omboetasa upe.

Jesús oyemboyecua güemimbohe eta upe

³⁶ Ahe oñehe vitesese yuvireco co tecocuer rese, ahese Jesús oyemboyecua chupe aipo ehi:

—Avirave, mbahe tuprî pîpe tapeico —ehi güemimbohe eta upe.

³⁷ Ahe rumo oyembosiquiye guasu yuvireco ‘hãgüer revo’ oyapave.

³⁸ —¡Mahera pesiquiye! ¡Mahera pereco vite pe poreroyaẽhisa pe pîha pîpe! ³⁹ Pemahe che po rese, che pî rese avei. Che ité niha co aico. Pepoco ru che rese. Tache reroya ru peye. Esepia, ava hã ndovirecoi voho iyavei ocangüer; che rumo areco ité —ehi güemimbohe eta upe.

⁴⁰ Aipo ohe vitesese omboyecuapa opo, opi avei chupe. ⁴¹ Ahe rumo vorivetesa pîpe iyavei oyepihambosiquiye vitesa sui ndoviroya tuprî vitei eté yuvireco. Evocoyase aipo ehi:

—¿Perecomi vo mbahe yande caru ãgua? —ehi güemimbohe upe.

⁴² Evocoyase omondo pira apîremi oyî vahe yuvireco chupe. ⁴³ Ipare oipîsi, ohu opacatu güemimbohe rovaque. ⁴⁴ Ipare aipo ehi:

—Co rese acoi añehe vichico cuese pe rese aico vitesese che mano renondeve. Yaviye ranera

opacatu ñehesa che resendar Moisés porocuita cuachiapri pipe, iyavei Tūpa ñehe mombehúsar yuvirecoi vahe rembicuachiagüer pipe, Salmo pipe avei —ehi.

⁴⁵ Ëgüe ehi evocoyase opacatu osenducua uca aracahendar icuachiapirer güemimbohe upe ⁴⁶ aipo ehi:

—Co icuachiasa Poropisírosar iparaisura omano água. Ipare mbosapi ari pare ocuerayevira. ⁴⁷ Jerusalén sui tupri opacatu ivi yacatu rupi imombehúsara serer pipe, “Pemboasi pe angaipa, peyevi Tūpa upe pëu ñeroi água” hesara. ⁴⁸ Pe niha peico opacatu co nungar mbahe repiasar imombehu água. ⁴⁹ Che amboura che Ru remimombehu pe harive. Pepitañora rumo cohave tecua Jerusalén ve acoi peipisise voi pĩratasa iva suindar —ehi güemimbohe eta upe.

Ivave Jesús so agüer

⁵⁰ Evocoyase Jesús yuvinose tecua sui yuviraso tecua Betania popive. Aheve ñuvirío opo omopuha, osovasa mbahe tupri reime água chupe. ⁵¹ Ipare oyepepi güemimbohe sui. Ahe ramoseve serasosa ivave. ⁵² Semimbohe evocoyase osapucái imboeteisave. Ipare oyevi Jerusalén ve vorivetesa pipe yuvireco. ⁵³ Iyavei ahe ari yacatu rupi yuviraso tūparo guasu pipe osapucái Tūpa mboeteisave yuvireco yepi. Aipo rupive.

Tũpa Ñehengagüer
New Testament in Guarayu (BL:gyr:Guarayu)

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files
dated 29 Jan 2022

c27c2d97-c359-59f5-b367-83efb2e33739